

清史列傳

冊九







清史列傳 卷六十九

儒林傳下二

孫星衍 畢亨 李貽德

孫星衍字淵如江蘇陽湖人少與同里楊芳燦洪亮吉黃景仁文學名齊袁枚品其詩曰天下奇才與訂忘年交星衍雅不欲以詩名深究經史文字音訓旁及諸子百家皆心通其義既從錢大昕遊精研漢學元和江聲注尙書以堯稽古爲同天皋陶稽古爲順考古道前後歧說星衍著論云鄭注稽古同天言堯同於天也鄭意蓋以堯稱帝爲同天書正義誤引其文云稽同也古天也天爲古之說雖見周書未必唐時卽有此義又嘗於江寧瓦官寺閣見元應一切經并慧苑華嚴經音義引倉頡爲多乃刺取其文兼摭他書爲倉頡篇三卷謂元應慧苑書世多不傳然足與陸德明經典釋文並垂於世屬友人刊行乾隆五十二年一甲二名進士授翰林院編修充三通館校理五十四年散館改刑部主事故事一甲進士改部或奏請留館又編修改官可得員外郎前此吳文煥有成案大學士和珅示意

欲使往見星衍不肯自是編修改主事遂爲成例官刑部爲法寬恕大學士阿桂尙書胡季堂悉器重之有疑獄輒令依古義平議全活甚衆退直之暇仍理舊業高麗使臣朴齊家入貢特謁星衍爲書問字堂扁賦詩以贈五十七年遷員外郎洵陞郎中六十年授山東兗沂曹濟道嘉慶元年七月曹南水漫灘潰決單縣地星衍與按察使康基田鳩工集夫五日夜從上游築隄遏禦之不果決基田謂此役省國家數百萬帑金尋權按察使凡七閱月平反數十百條活死罪誣服者十餘獄濰縣有武人犯法賄和珅門屬託大吏星衍訪捕鞠之械和門來者於衢及回本任值江南豐工及山東曹工同時漫溢星衍以無工處所得疏防咎特旨予留任曹工分治引河三道星衍治中段工畢較濟東道登萊道上下段省三十餘萬先是河工分賠之員或得羨餘謂之扣費星衍不取悉以給引河工費時曹工尙未合河督巡撫亟奏合龍移星衍任尋又奏稱合而復開開則分賠兩次壩工銀九萬兩當半屬後任而司事者並以歸星衍星衍亦任之曰吾旣兼河務不能不爲人受過也四年六月丁母憂歸儀徵阮元撫浙聘主詁經精舍星衍課諸生以經史疑義及小學天部地理算學詞章不十年舍中士皆以撰述名家服闋入

都奉旨仍發山東十年補督糧道十二年權布政使值侍郎廣興在省供張煩擾星衍不肯妄支後廣以賄敗豫東兩省多以支庫獲罪星衍不與焉湯陵舊在山西榮河星衍據漢崔駰晉伏滔及皇覽說皆云濟陰有湯陵任曹南時常申上府請齎祀典至是陵始修整給地畝奉香火又考太平寰宇記知先賢閔子墓在范縣今所傳在歷城者誤爲修築之申禁樵采又以伏生傳書二十七篇使二帝三王之訓典不墜於地欲奏請建立伏博士乃具稿移學政屬鄒平令訪其嫡裔資使讀書越七年竟得入告奉旨准以伏生六十五代孫敬祖世襲五經博士十六年引疾歸星衍博極羣書勤於著述又好聚書聞人家藏有善本借鈔無虛日金石文字靡不考其原委常病古文尙書爲東晉梅頤所亂官刑部時卽集古文尙書馬鄭注十卷逸文二卷歸田後又爲尙書今古文注疏三十九卷其序列云尙書古注散佚今刺取書傳升爲注者五家三科之說一司馬遷從孔氏安國問故是古文說一書大傳伏生所傳歐陽高大夏侯勝小夏侯建是今文說一馬氏融鄭氏康成雖有異同多本衛氏宏賈氏逵是孔壁古文說皆疏明出典其先秦諸子所引古書說及緯書白虎通等漢魏諸儒今文說許氏說文所載孔壁古文注

中存其異文異字其說則附疏中其書意在網羅放失舊聞故錄漢魏人佚說爲多又兼采近代王鳴盛江都段玉裁諸人書說惟不取趙宋以來諸人注以其時文籍散亡較今代無異聞又無師傳恐滋臆說也凡積二十二年而後成論者以爲勝王鳴盛書其他撰輯有周易集解十卷夏小正傳校正三卷明堂考三卷考注春秋別典十五卷爾雅廣雅古訓韻編五卷魏三體石經殘字考一卷孔子集語十七卷晏子春秋音義二卷史記天官書考證十卷建立伏博士始末二卷寰宇訪碑錄十二卷金石萃編二十卷京畿金石考二卷續古文苑二十卷詩文集二十五卷又有九經正俗字考十三經佚注集馬昭孫叔然難王申鄭之書山海經音義鄭康成年譜其所校刊若岱南閣叢書平津館叢書均據善本有資學藝二十三年卒年六十六星衍性誠正無僞言僞行立身行事皆以儒術尤喜獎借後進所至之地士爭歸附其所撰輯能集衆人之才智準以己之識力再三審擇而後成編其卒也海內學者皆悼慕之 畢亨原名以田字九水山東文登人初從休寧戴震遊精漢人故訓之學尤長於書後與星衍交星衍以金滕秋大熟以下據尚書大傳及史記當爲亳姑逸文後人或以其文有啟金滕之語遂入於金

滕篇中亨釋之曰尙書王出郊謂祭天於郊以周公配書序所云成王葬周公於畢告周公作亳姑卽其事此經上文云今天動威以彰周公之德惟予小子其親迎言親迎而祭之迎迎尸也惟郊祭周公之事故云我國家禮亦宜之禮者謂祭也尙書大傳曰乃不葬周公成周而葬於畢尊以王禮申命魯郊據此而言則魯之郊禘由風雷之變始也星衍載其說文集中星衍撰周易集解左右采獲亨力居多其尙書今古文注疏亦多采亨說每稱以爲經學無雙曲阜桂馥說文義證引亨篤論百數十事中嘉慶十二年舉人道光六年以大挑知縣分發江西署安義縣有兄殺胞弟案亨執不念鞠子哀泯亂倫彝刑茲無赦義不準援赦大府怒將劾亨會欵程恩澤重亨事乃解後補崇義縣以積勞卒於官年且八十矣著有九水山房文存二卷星衍晚年所著書又多付嘉興李貽德爲卒其業李貽德字次白嘉慶二十三年舉人年二十六謁星衍於江寧事以師禮星衍與上下古今窮晝夜不息屬分纂十三經佚注貽德因著春秋左氏傳賈服注輯述二十卷其書援引甚博字比句櫛於義有未安者亦加駁難又有詩考異詩經名物考周禮賸義十七史考異攬青閣詩鈔夢春廬詞道光十二年卒年五十



陳鱣

陳鱣字仲魚浙江海寧人父璘字昆玉諸生嘗著許氏說文正義未成而歿鱣博學好古彊於記誦尤專心訓詁之學時同州人吳騫拜經樓多藏書鱣亦喜聚書得善本互相鈔藏以故海昌藏書家推吳氏陳氏嘉慶元年舉孝廉方正督學阮元稱浙中經學鱣爲最深手摹漢隸孝廉二字以顏其居復爲書士鄉堂額以贈三年中式舉人在公車時與嘉定錢大昕大興翁方綱金壇段玉裁質疑問難後客吳門與黃丕烈定交取所藏異本往復異校鱣學宗許鄭嘗繼其父志取說文九千言聲爲經偏旁爲緯竭數十年之心力成說文正義一書又以鄭康成注孝經見於范書本傳鄭志目錄無之中經簿但稱鄭氏解而不書其名或曰是其孫小同所作然鄭六藝論序孝經序春秋皆云元又爲之注鄭注春秋未成後與服子慎遂爲服氏注故從來列鄭注無及春秋者竊以其注孝經亦未寫定小同追錄成之故不敢載入目錄中經簿所題蓋要其終范書所紀則原其始也因綴拾遺文爲孝經鄭注一卷又以六藝論未見輯本廣爲蒐討成一卷又著鄭康成年譜一卷又著論訓古訓十卷凡漢人之注及皇疏無不采取玉裁見所著諸書歎



其精覈晚築講舍於紫薇山麓寢處其中一意撰述有石經說六卷聲類拾存一卷埤蒼拾存一卷經籍跋文一卷續唐書七十卷恆言廣證六卷綴文六卷對策六卷詩人考三卷詩集十卷二十二年卒年六十五

王聘珍

王聘珍字貞吾江西南城人自幼以力學聞乾隆五十四年學使翁方綱拔貢成均常客浙西與歛淩廷堪論學廷堪深許之又爲謝啟昆阮元參訂古籍爲人厚重誠篤廉介自守治經確守後鄭之學著大戴禮記解詁十三卷目錄一卷其言曰大戴與小戴同受業於后倉各取孔壁古文記非小戴刪大戴馬融足小戴也禮察保傳語及秦亡乃孔襄等所合藏是賈誼有取於古記非古記采及新書也三朝記曾子乃劉氏分屬九流非大戴所哀集也又曰近代校讐不知家法王肅本點竄此經私定孔子家語反據肅本改易經文又或據唐宋類書如藝文類聚太平御覽之流增刪字句或云據永樂大典改某字作某凡茲數端率以今義繩古義以今音證古音以今文易古文遂使孔壁古奧之經變而文從字順經義由茲而亡故其發凡大旨禮典器數墨守鄭義解詁文字一依爾雅說文及兩漢經

師訓詁有不知而闕無杜撰之言如五義義字據周禮注讀若儀五鑿五字釋若忤青史子引漢書君子養之讀若中心養養之養皆能根據經史發蒙解惑凡積二十餘年而後成阮元謂其書義精語潔多所發明爲孔廣森諸家所未及江都焦循稱其不爲增刪一仍其舊列爲三十二讀書贊之一又著九經學引申詁訓考定漢制具有家法又有經義考補

洪亮吉 子節孫 符孫 嗣孫

洪亮吉字君直江蘇陽湖人六歲而孤母將賢明督課嚴風雪夜受經至雞鳴亮吉純孝既壯爲嬰兒戲娛母家貧橐筆出遊節所入養母及歸聞母凶耗慟絕墜水得救免三年徹酒肉不入中門少工文辭與同邑黃景仁詩歌唱和時稱洪黃後從安徽學政朱筠遊同幕戴震邵晉涵王念孫汪中等皆通古義乃立志窮經家居與孫星衍相摯摩學益宏博時又稱孫洪乾隆五十五年一甲二名進士授翰林院編修五十七年充順天鄉試同考官卽拜貴州學政之命亮吉以古學教士黔省僻遠無書籍爲購經史通典文選等散置各府書院奏禮記宜用鄭氏注今功令試士從元陳澹注舛漏不足闡發經義未奉部議施行嘉慶二年命在上

書房行走三年正月大考命擬征邪教疏時川陝餘匪未靖亮吉指陳規畫慷慨數千言是月因弟霽吉卒引古人期功去官之義病免家居又明年高宗純皇帝上賓亮吉以供奉內廷奔京哭臨仁宗親政詔求直言極諫之士亮吉念身自微賤受知兩朝居侍從之列欲終不言則非人臣匪躬之義言之又慮其不可以徑達也自聞詔後不知寢食者累月一日奮曰吾終不可以立仗馬辜聖天子恩乃反覆極陳時事累數千言略謂故福郡王所過繁費州縣供億致虛帑藏故相和珅擅權時達官清選或執贄門下或屈膝求擢羅列中外官罔上負國者四十餘人手書爲三函乞成親王大學士朱珪兵部尙書劉權之代奏上見視朝稍晏小人熒惑等語以爲論及宮禁震怒革職對簿詔亮吉讀書人體弱毋許用刑亮吉感慟伏地問何爲上書從容應曰庶人傳語況翰林乎王大臣等當亮吉大不敬律斬立決奉旨免死發往伊犁交將軍保寧嚴加管束明年二月亮吉至伊犁四月京師早上禱雨心切命清理庶獄故事戍伊犁者滿三年則伊犁將軍入奏未及期不得上請自四月二十四日皇上親禱社稷壇之後經旬尙未得雨閏四月初三日奉上諭從來聽言爲致治之本拒諫乃失德之尤朕從不敢自作聰明飾

非文過兼聽并觀惟求一是而已去年編修洪亮吉既有欲言之事不自陳奏轉向成親王及朱珪劉權之私宅呈送原屬違例妄爲經成親王等先後呈進原書朕詳加披閱實無違礙之句仍有愛君之誠惟視朝稍晏小人熒惑等句未免激令王大臣等訊問擬以重辟施恩改發伊犁然此後言事者日見其少卽有言亦論官吏之常事而與君德民隱休戚相關之實絕無言者豈非因洪亮吉獲咎鉗口不敢言以致朕不聞過下情復壅爲害甚鉅洪亮吉所論實足啟沃朕心故銘諸座右時常觀覽若實悖逆亦不能壞法沽名况皆屬子虛何須置辨而勤政遠佞更足警省朕躬今特明白宣諭王大臣并洪亮吉原書使內外諸臣知朕非拒諫飾非之主實可與言之君諸臣倖遇可與言之君而不與言大失致君之道負朕求治之苦心矣仍各殫心竭思隨時密奏軍機大臣卽傳諭伊犁將軍保寧將洪亮吉釋放回籍是日午刻皇上硃筆親書諭旨交軍機頒發中外午後同雲密布卽得甘霖御製得雨敬述詩紀事御製詩注有納言克己乃爲民請命之大端本日親書諭旨將去年違例上書發往新疆之編修洪亮吉立予釋回宣諭中外並將其原書裝潢成卷常置座右以作良規正在頒發是夜子時甘霖大沛連

宵達晝旋據報近郊入土三寸有餘保定一帶亦皆深透天鑿中誠捷於呼吸可感益可畏也自關新疆以來漢員賜環之速未有如亮吉者亮吉遂歸署其室曰更生表不殺恩十四年卒年六十四亮吉忼爽有志節自稱性褊急不能容物好古人偏奇之行每惡胡廣中庸不悅孔光張禹之爲人生平好學不以所遇榮枯釋卷帙嘗舉荀子語爲人戒有暇日故其學於經史注疏說文地理靡不參稽鉤貫窮日著書老而不倦少好春秋左氏傳覺杜注望文生義不遵古訓者十居五六於是冥心搜錄以他經證此經以別傳校此傳寒暑不輟者十年遵漢藝文志例分經爲四卷傳爲十六卷訓詁則以賈許鄭服爲主以三家固專門許則親問業於賈者也掇及通俗文者服子慎之所注與李虔所續者截然而兩徐堅初學記等所引可證也地理則以班固應劭京相璠司馬彪等爲主輔晉以前輿地圖經可信者亦酌取焉又舊經多古字古音半亡於杜氏而俗字之無從鈎校者又半出此書因一一依本經與二傳暨漢唐石經陸氏釋文與先儒之說信而可徵者逐件校正疑者闕之成春秋左傳詁二十卷其他所著有公羊穀梁古義二卷六書轉注錄八卷漢魏音四卷比雅十二卷弟子職箋釋一卷傳經表二卷通經



表二卷四史發伏十二卷三國疆域志二卷東晉疆域志四卷十六國疆域志十六卷西夏國志十六卷乾隆府廳州縣圖志五十卷曉讀書齋雜錄八卷卷施閣詩文甲乙集三十二卷更生齋詩文甲乙集十六卷詞二卷又有外家紀聞二卷伊犁日記二卷天山客話二卷北江詩話六卷子飴孫符孫齡孫 飴孫字孟慈嘉慶三年舉人湖北東湖縣知縣博極羣籍聞見既洽心力尤銳撰世本輯補十卷三國職官表三卷史目表二卷毘陵藝文志四卷青埕山人詩十卷又撰漢書藝文志考證隋書經籍志考證皆未成二十一年卒年四十四 符孫字幼懷撰齊雲山人詩文集 齡孫字子齡道光十九年舉人廣東鎮平縣知縣著有梁疆域志四卷淳則齋駢文二卷

桂馥 許瀚

桂馥字東卉山東曲阜人乾隆五十五年進士選雲南永平縣知縣居官多善政嘉慶十年卒於任年七十馥博涉羣書尤潛心小學精通聲義嘗謂士不通經不足致用而訓詁不明不足以通經故自諸生以至通籍四十年間日取許氏說文與諸經之義相疏證爲說文義證五十卷云義證者取梁書孔子祛傳中語也其



書薈萃羣書力窮根柢爲一生精力所在馥與段玉裁生同時同治說文學者以桂段並稱而兩人兩不相見書亦未見段氏之書聲義兼明而尤遂於聲桂氏之書聲義並及而尤博於義段氏鈎索比傳自以爲能冥合許指勇於自信自成一家的言故破字擲義爲多桂氏數佐許說發揮旁通令學者引申貫注自得其義之所歸故段書約而猝難通關桂書繁而尋省易了其專臚古籍不下己意則以意在博證求通輾轉孳乳觸長無方亦如王氏廣雅疏證阮氏經籍纂詁之類非可以己意爲獨斷者也馥尙有說文諧聲譜考證本欲與義證并行歿後遇亂散失數卷馥又繪許祭酒以下及魏濟陽江式唐趙郡李陽冰南唐廣陵徐鉉徐鍇兄弟宋吳興張有錢塘吾邱衍之屬爲說文統系圖大興朱筠嘗爲之記及就宦滇南追念舊聞隨筆疏記十卷以其細碎比之匠門木杙題曰札樸然馥嘗引徐幹中論鄙儒博學務於物名詳於器械考於訓詁摘其章句而不能統其大義之所極以獲先王之心故使學者勞思慮而不知道費日月而無成功謂近日學者風尙六書動成習氣偶涉名物自負倉雅略講點畫妄議斯冰叩以經典大義茫乎未之聞也此尤爲同時小學家所不能言足以鍼育起廢他著有晚學集十二

卷繆篆分韻五卷續三十五舉一卷 許瀚字印林山東日照人道光十五年舉人官嶧縣教諭博綜經史及金石文字於訓詁尤深至校勘宋元明本書籍精審不減黃丕烈顧廣圻晚年校刊說文義證謂原稟臺下有查高唐賦原文六字此爲馥脫稟未校之書因爲之補正數年乃成甫成而板燬於搶寇並盡瀚所藏經籍金石遂悒鬱而歿年七十其答門弟子問曰說文序云今敍篆文合以古籀而亦有以篆文爲重文者如上之重文上下之重文下皆篆文者是蓋重文爲古籀者卽正文爲篆文重文爲篆文者卽正文爲古籀鄭康成注禮參用古今文循是例也古籀之外又有奇字古文之別體也又有或俗篆文之別體也許書古文宗孔氏篆文宗倉頡篇一字而數古文皆孔氏奇字則異孔氏者也一字而數或體皆倉頡俗體則異倉頡者也異孔氏異倉頡而必取之者爲其合於六書也此重文之例也顧重文之在同部者易曉重文之在異部者難知如叫與𠵽逾與踰蹠與越之類遽數難終或疑此有重複錯亂則又不然請卽有明文者徵之如首古文百百古之重文也而自爲部儿古文奇字人人之重文也而自爲部介籀文大大之重文也而自爲部此必不可易者也哥古文以爲哥字哥哥重文也而歌在

欠部爲歌之重文。厶古文以爲覲字。厶覲重文也。而覲在面部。其重文作厶。此又不可易者也。然則分寄重文於衆部。謂非許君之妙用哉。又有一字複見各部者。如右在口部。又見右部。吁在口部。又見于部。歎爲嘯籀文。又見欠部。𠂔爲磬古文。又見革部。愬爲哲或體。又見心部。類此者蓋三十餘事。而爲徐鼎臣校出者十有八事。類以爲重出。許書傳寫既久。重字衍文。固不能免。然如難草部。又爲然重文。校以汗簡。則變之誤也。踞足部。又爲居重文。校以繫傳。則屣之誤也。此又不可謂重也。他著有別雅訂五卷。印林遺著一卷。又有韓詩外傳勘誤。攀古小廬文。

朱彬姪士端

朱彬字武曹。江蘇寶應人。乾隆六十年舉人。彬幼有至行。年十一喪母。哀戚如成人。丁父憂。斂葬盡禮。三年疏食。居外時。祖母劉尙存。寒暑飲食盡心調護。一如其父在時。同懷兄早殤。與羣從。舅弟友于甚篤。自少至老。好學不厭。承其鄉王懋竑經法。又與外兄劉台拱。高郵王念孫引之父子。李惇。江都汪中。餘姚邵晉涵諸人。互相切磋。每有所得。輒以書札往來。辨難必求其是。而後已。於訓詁聲音文字之學。用力尤深。著有經傳考證八卷。又輯禮記訓纂四十九卷。取爾雅說文玉篇廣

雅諸書之故訓虎觀諸儒之論議鄭志弟子之問答以及魏晉以降諸儒之訓釋又刺取北堂書鈔通典太平御覽諸書之涉是書者旁證國初及乾嘉間諸家之書亦不下數十種而一以注疏爲主擷其精要緯以古今諸說其附以己意者皆援據精確足以薈衆說而持其平他著有游道堂詩文集四卷道光十四年卒年八十二子士彥字休承由編修官至吏部尙書諡文定自有傳姪士端士端字銓甫道光元年舉人官廣德州訓導引疾歸父毓楷有孝行通許鄭之學士端少承家學又從從父彬游研究古義於許氏形聲之學尤精嘗以二徐本互校擇善而從不擅改原文又以鐘鼎彝器諸文考合說文所載古籀各體著說文校定本二卷考訂精確所斟正金壇段玉裁刪改之失甚多又著彊識編八卷蕭山湯金釗稱爲有益經傳之作又有說文形聲疏證三家詩輯宜祿堂金石記檢身錄吉金樂石山房詩文集

汪德鉞呂飛鵬

汪德鉞字崇義安徽懷寧人嘉慶元年進士改翰林院庶吉士散館授禮部主事遷員外郎充會典館總纂官以書吏繕寫錯誤奪職卒年六十一德鉞性孝嘗割

股療母疾未達時隱居其鄉之雲田坂自謂與俗迥暱我者琴書山水四友也因撰四一居士傳嘗言君子立身務厲廉恥刻苦自治日之所爲夜必書之揭經書要義撰箴銘自警又言浮薄以厚藥之躁率以靜藥之傲誕以敬藥之不能精進病在因循因字銳齋又字三藥朱珪巡撫安徽政體寬大德鉞上書謂宜法子產之治鄭不宜如曹參之治齊宜如蜀相諸葛武侯不宜如東海相劉寬公不忍於頭會箕歛之人而獨忍於纍纍然匍匐入井之赤子耶珪善之仁宗親政珪被召德鉞復上書言四事曰輔盛德教胄子慎用人以舉衆職辨上下以定民志故事曹司見長官皆長揖後乃易爲半跪因仍數十年德鉞啟座右尙書紀昀爭之卒復長揖山東巡撫議以肥城邱氏爲左邱明後據廣韻引風俗通證之咨部請立五經博士德鉞議駁曰唐林寶元和姓纂於邱氏云齊大夫封於營邱支孫以地爲姓左傳有邾大夫邱弱於左氏云齊公族有左右公子因以爲氏後乃出左邱云齊國臨淄縣有左邱明之後舉左雍左思爲證林寶唐博聞士姓纂邱獨不用應劭說必證據明白始削之邱氏譜近出去林氏又千餘年乃反引風俗通爲證誤矣又姓纂以倚相爲邱明別族今譜乃以爲邱明祖紕繆顯然何可信也或謂



善善從長然欲報左氏傳經之功而俾非種冒承左氏有靈其式憑耶事遂寢德  
鉞篤信宋儒書然實潛心考據閉戶讀書日有筭記其說尚書乃服維宏王謂王  
當爲大左傳引周書曰惠不惠茂不茂康叔所以服宏大也此其證說詩不長夏  
以革爲夏楚也革鞭也書鞭作官刑扑作教刑古以與通說儀禮士冠特牲筮日  
謂寫卦皆卦者事執筮示主人皆筮者事士冠不言筮者文不具鄭注以特牲書  
卦爲卦者事誤也又馬融注論語以三綱五常解因以文質三統解損益朱子集  
注因之德鉞謂三綱五常定之自天者也非夏殷先王所剏也不可謂因且孔子  
言禮一而已馬以爲五常則益之以仁義智信信如其說曰殷因於夏之仁義智  
信周因於殷之仁義智信可乎蓋因與損益爲一事損者損其禮益者益其禮禮  
也者吉凶軍賓嘉之謂非指其辭讓之心爲禮之端而言也湯武革命故禮亦隨  
之然革其節目而不能革其大體故同一始加冠而牟追章甫委貌異其制同一  
三加而收嘏弁異其名同一尸而夏立殷坐周旅酬同一降神而殷先求諸陽周  
先求諸陰同一牲而異其黑白赤同一祭而異其心肝同一飲而異其明水醴同  
一尊而異其山著義象乃因風氣之醇澆而有盈縮監前人之得失而裒益其多



寡是聖人之善其因也禮者人之隄防也其因與損益亦若是而已故君臣父子之名不可卽名以禮而仁義智信之德不可獨以禮當之也其說皆能發前人所未發著有周易義例一卷周易雜卦反對互圖一卷七經餘說一卷語錄四卷女範一卷銳齋偶筆一卷日記六卷文鈔六卷詩一卷又有詩經文辭異同考三國志補注 呂飛鵬字雲里安徽旌德人年十七從寧國凌廷堪治禮廷堪器之以爲能傳其學山陽汪廷珍視學安徽喜士通古經義補飛鵬縣學附生飛鵬少讀周禮長而癖嗜廷堪嘗著周官九拜九祭解鄉射五物考援據禮經疏通證明足發前人所未發飛鵬師其意而變通之成周禮補注六卷其大旨以鄭氏爲宗廣搜衆說補所未備或旁采他經舊注或兼取近儒經說要於申明古義又著周禮古今文義證六卷平居書齋閣自銘誠粹然出於儒先道學鄉饑籌粟倡賑人多德之有爭辯一言立釋嘗戒其子賢基曰成名易成人難又曰言官不易爲母陳利而昧大體毋挾私而務高名其本行如此賢基卒以忠節著道光二十三年卒年七十三

張惠言子成孫 江承之 胡祥麟

張惠言字皋聞江蘇武進人少受義經卽通大義年十四爲童子師修學立行敦品自守嘉慶四年進士時大學士朱珪爲吏部尙書以惠言學行特奏改庶吉士充實錄館纂修官六年散館奉旨以部屬用珪復特奏改授翰林院編修七年卒年四十二惠言鄉會兩試皆出朱珪門未嘗以所能自異默然隨羣弟子進退而已珪潛察得之則大喜故屢進達之而惠言亦斷斷相諍不敢隱珪言天子當以寬大得民惠言言國家承平百餘年至仁涵育遠出漢唐宋之上吏民習於寬大故奸孽萌芽其間宜大伸法以肅內外之政珪言天子當優有過大臣惠言言庸猥之輩倖致通顯復壞朝廷法度惜全之當何所用珪喜進淹雅之士惠言言當進內治官府外治疆場者與同縣編修洪亮吉於廣坐諍之惠言少爲辭賦擬司馬相如揚雄之文及壯又學韓愈歐陽修篆書初學李陽冰後學漢碑額及石鼓文嘗奉命詣盛京篆列聖加尊號玉寶惠言言於當事謂舊藏寶不得磨治又謂翰林奉命篆列聖寶宜奉請馳驛以格於例不果行生平精思絕人嘗從歛金榜問故其學要歸六經而尤深易禮著有周易虞氏義九卷虞氏消息二卷嘗謂自漢武帝時劉向校書考易說以爲諸易家皆祖田何楊叔丁將軍大義略同惟京

氏爲異而孟喜受易家陰陽其說易本於氣而後以人事明之八卦六十四象四正七十二候變通消息諸儒祖述之莫能具當漢之季年扶風馬融作易傳授鄭康成作易注而荊州牧劉表會稽太守王朗潁川荀爽南陽宋忠皆以易名家各有所述惟翻傳孟氏學旣作易注奏上之獻帝翻之言易以陰陽消息六爻發揮旁通升降上下歸於乾元用九而天下治依物取類貫穿比附始若瑣碎及其沈深解剝離根散葉暢茂條理遂於大道後儒罕能通之自魏王弼以虛空之言解易唐立之學官而漢世諸儒之說微獨資州李鼎祚作周易集解頗采古易家言而翻注爲多其後古書盡亡而宋道士陳搏以意造爲龍圖其徒劉牧以爲易之河圖洛書也河南邵雍又爲先天後天之圖宋之說易者翕然宗之以至於今牢不可拔而易陰陽之大義蓋盡晦矣大清有天下元和徵士惠棟始考古義孟京荀鄭虞氏作易漢學又自爲解釋曰周易述然掇拾於亡廢之後左右采獲十無二三其所述大抵宗禰虞氏而未能盡通則旁徵他說以合之蓋從唐五代宋元明朽壞散亂千有餘年區區修補收拾欲一旦而其道復明斯固難也翻之學旣邃又具見馬鄭荀宋氏書考其是否故其義爲精又古書亡而漢魏師說可見者

十餘家然惟鄭荀虞三家畧有梗概可指說而虞又較備然則求七十子之微言田何楊叔丁將軍之所傳者舍虞氏之注其何所自焉故求其條貫明其統例釋其疑滯信其亡闕庶以探蹟索隱存一家之學其所未寤俟有道正焉耳又著虞氏易禮二卷虞氏易候一卷虞氏易言二卷初惠棟作周易述大旨遵虞翻補以鄭荀諸儒學者以未能專一少之儀徵阮元謂漢人之易孟費諸家各有師承勢不能合惠言傳虞氏易卽傳漢孟氏易矣孤經絕學也惠言又著周易鄭氏義三卷周易荀氏九家義一卷周易鄭荀義三卷易義別錄十四卷易緯略義三卷易圖條辨二卷其易義別錄序謂不盡見其辭而欲論其是非猶以偏言決獄也不盡通各家而欲處其優劣猶援白而嘲黑也故其所著皆羽儀虞氏易者於禮有儀禮圖六卷讀儀禮記二卷皆特精審又有茗柯文五卷詞一卷子成孫成孫字彥惟少時惠言課以說文令分六書譜之成象形二卷惠言著說文諧聲譜未竟而卒成孫後從莊述祖游得其大要乃續成之卷第篇例多所增易凡五十卷其書分中僮薨林巖筐榮葵詵干萋肄揖支皮絲鳩萑蕞咀二十部此乃於毛詩中拈其最先出之字爲建首加以易韻屈韻而又以說文之聲分從之犁然不紊

有各家所未及者嘗以示儀徵阮元元歎其超卓精細後臨桂龍啟瑞見其稿以爲較段氏書爲密而不失之拘古韻之書此爲集其大成時啟瑞著古韻通說因節錄之以備考遭亂稿佚惟節本九卷存成孫兼精天學同里董祐誠歿爲較刊其遺書又著有端虛勉一居文集 江承之字安甫安徽歙縣人學於惠言時弟子從惠言受易禮者十數其甥董士錫受易通陰陽五行家言承之兼受儀禮著有周易爻義虞氏易變表儀禮名物鄭氏詩譜 胡祥麟字仁圃浙江秀水人嘉慶十八年舉人少遊吳江陸燿幕講求實學治經好深沈之思得張惠言虞氏易義消息思索屢月衍其說爲虞氏易消息圖說一卷性鯁直自名其齋曰省過嘉興錢泰吉目爲諍友道光三年卒詩學楊鐵崖李西厓有省過齋詩鈔

### 許宗彥

許宗彥字積卿浙江德清人父祖京乾隆三十四年進士官至山東布政使著有詩經述八卷詩四卷宗彥九歲能讀經史善屬文侍郎王昶愛其才作積卿字說以贈嘉慶四年進士是科得人最盛總裁朱珪尤重宗彥謂兼有張惠言王引之吳鼎諸子之長授兵部主事就官兩月以親老遽引疾歸親歿卒不出居杭州杜



門以讀書爲事其學問無不通探蹟索隱發千年儒者所未發考周五廟二祧以爲周制五廟之外別有二祧爲遷廟之殺以厚親親之仁宗廟之外別立祖宗與禘郊同爲重祭以大尊尊之義諸經無文武二廟不毀之誤誤始於韋元成而劉歆因之鄭康成亦因之祧者遷廟乃謂爲不遷之廟名實乖矣又考文武二世室以爲周文武皆配於明堂太室故有文武世室之號孔穎達誤謂伯禽稱文世室武公稱武世室以公羊傳周公稱太廟魯公稱世室羣公稱宮證之舛甚又考禹貢三江以爲漢志言分江水首受江東至餘姚入海夫曰分江水曰首受江則非南江之正流可知曰東至餘姚入海則非在吳入海可知與禹貢三江無與又考太歲太陰以爲太歲者歲星與日同次斗杓所建之辰也太陰始寅終丑太歲始子終亥漢律志曰太初元年歲前十一月朔旦冬至歲在星紀婺女六度歲名困敦此太歲始子之確證武帝詔曰年名焉逢攝提格此太陰始寅之確證漢書天文志始誤以甘石之言太陰者係之太歲而與太初之太歲遂差兩辰乃以爲星有贏縮非矣又說六書轉注以爲從偏旁轉相注說文曰轉注者建類一首同意相受考老是也後序曰其建首也立一爲耑卽建類一首之謂也如示爲部首從



示之偏旁注爲神祇等字從神祇注爲祠祀祭祝等字輾轉相注皆同意爲一類戴震指爾雅詁訓爲轉注而不知詁訓出於後來非制字時所豫有也段玉裁引戴說又言爾雅字多假借而不知假借者本無其字今如初哉首基之訓非本無首字而假初哉等字以當之也其他所著學說能持漢宋儒者之平禮論治論諸篇皆稽古證今通達政體尤精天文得泰西推步祕法自製渾全球別具神解嘗援緯書四游以疏本天高卑而知不同心非渾圓之理考周髀北極璿璣以推古人測驗之法七政皆統於天而知東漢以前用赤道不用黃道爲得諸行之本又論日左右旋一理以王錫闡解黃道右旋赤道平行戴震分黃道黃極爲二行其說頗不分明爲剖析之皆言天家所未及性孝友慎於交游體羸而神理澁淡見者皆肅敬之儀徵阮元會試舉主也重其學術行誼以子女爲媼家宗彥嘗訓諸子曰讀書人第一須使此心光明正大澄清如止水無絲毫苟且私曲不可對人處故名所居曰鑑止水齋二十三年卒年五十一著有鑑止水齋集二十卷

郝懿行 牟庭

郝懿行字恂九山東棲霞人嘉慶四年進士授戶部主事二十五年補江南司主

事道光三年卒年六十九懿行謙退訥若不出口然自守廉介不輕與人晉接遇非素知者相對竟日無一語迨談論經義則喋喋忘倦所居四壁蕭然庭院蓬蒿常滿僮僕不備懿行處之晏如浮沈郎署視官之榮悴若無與於己者而一肆力於著述漏下四鼓者四十年所著有爾雅義疏十九卷春秋說略十二卷春秋比一卷山海經箋疏十八卷易說十二卷書說二卷鄭氏禮記箋四十九卷懿行嘗曰邵晉涵爾雅正義蒐輯較廣然聲音訓詁之原尙多壅闕故鮮發明今余作義疏於字借聲轉處詞繁不殺殆欲明其所以然又曰余田居多載遇草木蟲魚有弗知者必詢其名詳察其形考之古書以徵其然否今茲疏中其異於舊說者皆經目驗非憑胸臆此余書所以別乎邵氏也懿行之於爾雅用力最久稿凡數易垂歿而後成訓故同異名物疑似必詳加辨論疏通證明故所造較晉涵爲深高郵王念孫爲之點閱寄儀徵阮元刊行元總裁會試時從經義中識拔懿行者也其著春秋說略有十例一曰說春秋不得褒貶天王以明臣子之義二曰說春秋不得妄生褒貶春秋直書其事褒貶自見三曰說春秋者好於經所無處尋褒貶春秋皆實錄其多一字少一字皆事實如此非聖人意爲增減四曰春秋多闕文

然以義推之皆大略可見五曰春秋經文當從左氏左氏闕誤乃從公穀六曰左氏深於經公穀說經字字求褻貶左氏但敘本事褻貶自見得聖人渾厚之旨七曰說春秋者好緣傳生義不顧經文說經當一以經爲主范武子曰三傳殊說擇善而從此言可爲治經者法八曰春秋刑書也刑書之例一成不移故法必行而人知畏九曰春秋聖人義理之書本不待傳而明十曰比事屬辭春秋教也事同相比事異相比辭同相屬辭異相屬其義自見河間紀昀覩其書以爲能剗盡千秋藤葛其箋疏山海經援引各籍正名辨物事刊疏謬辭取雅馴阮元謂吳氏廣注徵引雖博失之蕪雜畢沅校本訂正文字尙多疏略惟懿行精而不鑿博而不濫懿行妻王照圓字瑞玉博涉經史當時著書家有高郵王父子棲霞郝夫婦之日照圓聰慧過人每與懿行持論不合諍辨竟日著有詩說一卷烈女傳補注八卷附女錄一卷女校一卷又與懿行以詩答問懿行錄之爲詩問七卷其爾雅義疏亦間取照圓說光緒七年倉場侍郎游百川進呈懿行所著春秋爾雅山海經四種奉旨郝懿行所著書當交南書房翰林閱看據稱郝懿行學問淵博經術湛深嘉慶年間海內推重所著各書精博邃密足資考證卽著留覽八年府尹畢道

遠等續進懿行及照圓所著書六種奉旨著留覽懿行所著未經進者有詩經拾遺一卷汲冢周書輯要一卷竹書紀年校正十四卷荀子補注一卷晉宋書故一卷補晉書刑法志一卷食貨志一卷宋瑣語一卷寶訓八卷蜂衙小紀燕子春秋海錯各一卷證俗文十八卷筆錄六卷文集十二卷懿行以養疴輟爾雅業時瀏覽晉宋史鈔晉文百數十首謂王右軍虛談廢務浮文妨要二語切中當時之弊所鈔屏黜虛浮一以切實爲主其自作雜文亦出入漢魏晉宋之間雜記數帙旁徵稗說閒采時事皆意主勸戒照圓所著未經進者又有列仙傳校正二卷夢書一卷 牟庭初名庭相字默人亦棲霞人貢生與郝懿行友善同研樸學庭少懿行二歲懿行每有著述輒與商榷庭嘗謂孫叔炎受學康成而鄭注士昏禮曰壻悉計反從士從胥又漢書陳勝傳應劭注沈音長含反地理志應劭注沓音長答反項羽傳注服虔曰喘音章瑞反揚雄傳注服虔曰踢音石奠反應服與鄭同時輩大於叔炎然則謂反語始於叔炎非也懿行以爲然庭博通羣經兼明算術尤好今文尙書之學所著書五十餘種遭亂亡佚獨詩切一書首尾完具又周公年表投壺算草兩句合與兩股較及帶縱和數立方算草各一卷今尙存同時萊

陽趙曾字慶孫乾隆五十四年舉人官江蘇知縣爲今文尙書及三禮左氏之學與庭友善甘泉江藩嘗稱爲山左翹楚也

莫與儔 子友芝

莫與儔字猶人貴州獨山人嘉慶四年進士改翰林院庶吉士散館改知縣授四川鹽源縣縣俗富人好買無徵之田貧人鬻產存賦久輒逃亡與儔責賦富人而貰其隱占之罪河西有寧遠子稅所橫徵與儔言病民得裁去木裏喇嗎左所有山產銀銅郡守徇奸民之求請布政司符縣開礦與儔覘知出銀之山實土官經堂所據彼人重經堂視祖廟且開廠聚衆滋擾夷境患且不測力持不可上游是之檄往覆勘至則礦山者果在其經堂右其衆嚴兵以待瞻與儔貌又聆溫語皆解甲羅拜縣令入土司境居有供行有餽與儔盡卻其物又懸諸禁比還老幼遮道多有垂涕者舉治行卓異以父憂去職服闋事母十四年終養後改遵義府學教授創祠漢三賢於學宮左日以樸學倡其徒舉閩若璩六經宗服鄭百行法程朱之榜以樹依歸其國朝專經大師所爲故訓如易惠氏書閻氏詩陳氏禮江氏說文段氏王氏未嘗隔三宿不言其示諸生謂學莫先於正趨向趨向之正不正



視乎義利之明不明又謂讀書當求實用經典所載孰非法言言而求諸身事  
事而思其用則讀一卷書自有一卷書之益遵義之人爭就受業學舍不足僦居  
半城市道光二十一年卒於官年七十九自來言都勻地理者率自五代後始有  
據依與儔參互史籍作都勻府南齊以上地理攷所爲書有二南近說四卷仁本  
事韻二卷詩文雜藁四卷門人鄭珍子友芝並通許鄭之學珍別有傳 友芝字  
子偲道光十一年舉人咸豐八年截取知縣且選官意不樂棄去同治初中外大  
臣密薦學問之士詔徵十四人友芝其一也朋好爭勸出仕謝不就友芝少承先  
訓通會漢宋兩學於蒼雅故訓六經名物制度靡不探討旁及金石目錄家之說  
遇人無貴賤一接以和而中故介然有以自守黔自有明開省文獻乃稍可述與  
儔有貴州置省以來建學記以見黔文興起之所由又蒐采黔人詩歌斷自明代  
成黔詩紀略三十二卷同治十年卒年六十有一著有經說詩文集又聲韻考略  
四卷過庭碎錄十二卷樗蘭譜注一卷唐本說文本部箋異一卷宋元舊本書經  
眼錄三卷附錄二卷遵義府志四十八卷

陳壽祺字恭甫福建閩縣人父鶴書歲貢生以質行稱壽祺少能文年十八臺灣平撰上福康安百韻詩並序沈博絕麗時稱爲才子然壽祺自咎不能高行遂學不可告人乃從同縣孟超然游爲宋儒之學凜然以古君子自期嘉慶四年成進士改翰林院庶吉士散館授編修尋告歸性至孝不忍言仕家貧無食父命之入都九年充廣東鄉試副考官十二年充河南鄉試副考官十四年充會試同考官旋記名御史壽祺以不得迎養常愀然不樂將告歸俄聞父憂慟幾絕奔歸服除乞養母母歿終喪年五十三有密薦於朝者卒不出壽祺會試出朱珪阮元門乃專爲漢儒之學與同年張惠言王引之齊名又及見錢大昕段玉裁王念孫程瑤田諸人故學益精博解經得兩漢大義每舉一義輒有折衷兩漢經師莫先於伏生莫備於許氏鄭氏壽祺闡明遺書著尙書大傳箋三卷序錄一卷訂誤一卷附漢書五行志綴以他書所引劉氏五行傳論三卷序曰伏生大傳條撰大義因經屬指其文辭爾雅深厚最近大小戴記七十子之徒所說非漢諸儒傳訓之所能及也康成百世儒宗獨注大傳其釋三禮每援引之及注古文尙書洪範五事康誥孟侯文王伐崇弒耆之歲周公克殷踐奄之年咸據大傳以明事豈非閱識博

通信舊聞者哉且夫伏生之學尤善於禮其言巡狩朝覲郊尸迎日廟祭族燕閭塾學校養老擇射貢士考績郊遂采地房堂路寢之制后夫人入御太子迎問諸侯之法三正之統五服之色七始之素八伯之樂皆唐虞三代遺文往往六經所不備諸子百家所不詳今其書散逸十無四五尤可寶重宋朱子與勉齋黃氏纂儀禮經傳通解攬摭大傳獨詳蓋有裨禮學不虛也五行傳者自夏侯始昌至劉氏父子傳之皆善推甌福著天人之應漢儒治經莫不明象數陰陽以窮極性命故易有孟京卦氣之候詩有翼奉五際之要春秋有公羊災異之條書有夏侯劉氏許商李尋洪範之論班固本大傳摠仲舒別向歆以傳春秋告往知來王事之表不可廢也是以錄漢書五行志附於後以備一家之學云又著五經異義疏證三卷序曰石渠議奏之體先臚衆說次定一尊覽者得以考見家法劉更生采之爲五經通義惜皆散亡白虎通義亦多闕佚且經班固刪集深沒衆家姓名殊爲疏失不如異義所援古今百家皆舉五經先師遺說其體仿石渠論而詳贍過之許君又著說文解字綜貫萬原當世未見遵用獨鄭君注儀禮旣夕記小戴禮雜記周禮攷工記嘗三稱之所以推重之者至矣顧於異義爲之駁者祭酒受業賈

侍中敦崇古學故多從古文家說司農囊括網羅意在宏通故兼從今文家說此其判也案張懷瓘書斷叔重安帝末年卒鄭君別傳康成永建二年生鄭氏於許爲後進而繩糾是非爲汝南之諍友夫向歆父子猶有左穀之違何鄭同室奚傷箴肱之作聖道至大百世莫殫仁者見仁智者見智斬於事得其實道得其真而已今許鄭之學流布天下此編雖略然典禮之闕達名物之章明學者循是而討論焉其於昔人所譏國家將立辟雍巡守之儀幽冥而莫知其原者庶乎可免也他著又有左海經辨二卷左海文集十卷左海駢體文二卷絳趺堂詩集六卷東粵儒林文苑後傳二卷東觀存稿一卷壽祺歸後阮元延課詁經精舍趙坦徐養原嚴杰洪頤煊等皆從問業元纂羣經古義爲經邗壽祺爲撰條例明所以原本訓辭會通典禮存家法而析異同之意後主泉州清源書院十年主鼇峰書院十一年與諸生言修身勵學教以經術作義利辨知恥說科舉論以示學者規約整肅士初苦之久乃悅服家居與諸當事書於桑梓利弊蒿目痡心雖觸忌諱無所隱明儒黃道周孤忠絕學壽祺搜輯遺文爲之刊行又具呈大吏乞疏請從祀孔廟議上如所請道光十四年卒年六十四子喬樅 喬樅字樸園道光五年舉人

二十四年以大挑知縣分發江西歷官分宜弋陽德化南城諸縣署袁州臨江撫州知府以經術節吏治居官有聲同治七年卒於官年六十一初壽祺以鄭注禮記多改讀又嘗鉤考齊魯韓三家詩佚文佚義與毛氏異同者輯而未就病革謂喬樅曰爾好漢學治經知師法他日能成吾志九原無憾矣喬樅乃紬繹舊聞勒爲定本成禮記鄭讀考六卷三家詩遺說考十五卷又著齊詩翼氏學疏證二卷詩緯集證四卷謂齊詩之學宗旨有三曰四始曰五際曰六情皆以明天地陰陽終始之理考人事盛衰得失之原言王道治亂安危之故齊先亡最爲寡證獨翼奉存其百一且其說多出詩緯察躔象推曆數徵休咎蓋齊學所本也詩緯亡而齊詩遂爲絕學矣又著今文尙書經說考三十四卷歐陽夏侯經說考一卷謂二十九篇今文具有十六篇既無今文可考遂莫能盡通其義凡古文易詩書禮論語孝經所以傳悉由今文爲之先驅今文所無輒廢向微伏生則萬古長夜矣歐陽大小夏侯各守師法苟能得其單辭片義以尋千百年不傳之緒則今文之維持聖經於不墜者豈淺眇哉喬樅撰述多準壽祺遺訓又有詩經四家異文考五卷毛詩鄭箋改字說四卷禮堂經說二卷少喜治三禮撰東夾西夾考一篇推勘



精密王引之亟稱之最後爲尙書說時宿儒漸蕪考據家爲世訾警獨湘鄉曾國藩見其書以爲可傳國朝古學元和惠氏高郵王氏外惟喬樞能修世業張大其家法壽祺同里治古學者有謝震何治運 謝震原名在震字甸男福建侯官人乾隆五十四年舉人順昌學教諭震嘗與閩縣林一桂甌寧萬世美爲經會與一桂世美俱精三禮震尤篤學嗜古史傳百家篆隸金石靡不通曉然斷斷持漢學好排擊宋儒鑿空逃虛之說壽祺與震鄉試同年少震六歲視爲畏友震重氣誼有志用世而不遇於時嘗過漢中謂人曰終南瓦七百餘里連跨數郡秦蜀門戶也守險安可忽鄖庸以西夔巫以東巴閬之北武都之南大山老林螳螂其間今將吏狃昇平而弛控馭不數稔難其作乎及嘉慶初邪教起震言皆驗年四十卒弟子輯其遺著有禮案二卷精覈勝敖氏又有四書小箋一卷四聖年譜一卷工詩有櫻桃軒詩集二卷 何治運字郊海福建閩縣人嘉慶十二年舉人洽聞疆識篤志漢學粵督阮元嘗聘纂廣東通志後遊浙中巡撫陳若霖爲鈐其經解及論辨文字四卷名何氏學又著有公羊精義論語解詁孟子通義周書後定太元經補注道光元年卒年四十七治運與壽祺友及卒壽祺以謂無與爲質不獲以

輔成其學也。孫經世字濟侯福建惠安人壽祺弟子也壽祺課士不一格遊其門者若仙遊王捷南之詩禮春秋諸史晉江杜彥士之小學惠安陳金城之漢易將樂梁文之性理建安丁汝恭德化賴其煥建陽張際亮之詩古文辭皆足名家而經世學成早世世以儒林推之經世少喜讀近思錄後沈研經義謂不通經學無以爲理學不明訓詁無以通經不知聲音文字之原無以明訓詁著說文會通十六卷爾雅音疏六卷釋文辨證十四卷韻學溯源四卷十三經正讀定本八十八卷經傳釋辭續編八卷又著春秋例辨八卷孝經說二卷夏小正說一卷詩韻訂二卷惕齋經說六卷讀經校語四卷其四書集解十二卷周易本義發明十二卷則少作也經世善事父母居喪不御酒肉不居內泉俗好鬪訟大姓爲甚孫氏族衆萬數漸漬身教竟爲仁里新城陳用光督學閩中舉優行第一嘗詫於涇縣包世臣曰吾歸裝得一濟侯勝筭河三百石矣筭河朱筠號筠去閩時士各饋一石因積成山建三百三十三士亭故用光云然經世又謂治經當體之身心用之家國嘗欲編定經義纂集古今之言學言治以證明之名曰通經略書未竟道光十二年卒於京邸年五十 柯蘅山東膠州人從壽祺受許鄭之學嘗以史漢諸表

爲紀傳之綱領而譌誤舛奪最稱難治乃條而理之著漢書七表校補二十卷爲例十一曰辨事誤二曰辨文字誤三曰辨注誤四曰辨諸家考證之誤五曰以本書證本書之誤六曰史漢互證而知其誤七曰漢書荀紀互證而知其誤八曰漢書水經注互證而知其誤九曰據紀傳以補表之闕十曰據今地以證表之誤鈎稽隱蹟掇拾繁碎凡前人之說皆取而辨其是非至前人之未及者又得二三千事亦專門之學也尤長於詩論者謂可配其鄉先輩王士禎趙執信著有聲詩聞微二卷舊雨草堂詩集四卷其說經說史之作門人集爲舊雨草堂札記

馬宗槌 子瑞辰

馬宗槌字器之安徽桐城人由舉人官東流縣教諭嘉慶六年成進士又一年卒少從舅氏姚鼐學詩古文詞所作多沈博絕麗旣而精通古訓及地理之學鄉舉時以解論語過位升堂合於古制大興朱珪亟拔之後從邵晉涵任大椿王念孫遊其學益進嘗以解經必先通訓詁而載籍極博未有彙成一編者乃偕同志孫星衍阮元朱錫庚分韻編錄適南旋中輟後元視學浙江萃諸名宿爲經籍纂詁其凡例猶昔年所手訂也生平敦實行寡嗜好惟以著述爲樂嘗撰左氏補注三

卷博徵漢晉諸儒之說不苟同立異論者謂足與顧炎武惠棟兩家之書相表裏其自序云效子慎之作解誼家法是守鄙冲遠之爲疏證曲說鮮通蓋紀實也所著別有毛鄭詩詁訓考證周禮鄭注疏證穀梁傳疏證說文字義廣注戰國策地理考南海鬱林合浦蒼梧四郡沿革考嶺南詩鈔共數十卷校經堂詩鈔二卷子瑞辰 瑞辰字元伯嘉慶十年進士改翰林院庶吉士散館授工部營繕司主事擢郎中因事罷誤發盛京效力旋賞給主事奏留工部補員外郎復坐事發往黑龍江效力未幾釋歸歷主江西白鹿山東嶧山安徽廬陽書院講席咸豐二年冬髮逆陷桐城衆驚走賊脅之降瑞辰大言曰吾前翰林院庶吉士工部都水司員外郎馬瑞辰也吾命二子團練鄉兵今仲子死少子從軍吾豈降賊耶賊熱其背而擁之行行數里罵愈厲遂死年七十九事聞奉旨贈道銜賜卹廕如例敕建專祠瑞辰豐頤長身言論娓娓勤學著書耄而不倦嘗謂詩自齊魯韓三家旣亡說詩者以毛詩爲最古據鄭志答張逸云注詩宗毛爲主毛義隱略則更表明是鄭君大旨本以述毛其箋詩改讀非盡易傳而正義或誤以爲毛鄭異義鄭君先從張恭祖受韓詩凡箋訓異毛者多本韓說其答張逸亦云如有不同卽下己意而

正義又或誤合傳箋爲一毛詩用古文其經字多假借類皆本於雙聲疊韻而正義或有未達於是撰毛詩傳箋通釋三十二卷以三家辨其異同以全經明其義例以古音古義證其僞互以雙聲疊韻別其通借篤守家法義據通深同時長洲陳奐著毛詩傳疏亦爲專門之學由是治毛詩者多推此兩家之書子三俊字命之優貢生舉孝廉方正學宗程朱兼取陸王之說詩古文亦力追秦漢魏晉以國難家仇憤欲殺賊四年六月率練勇追賊至周瑜城力戰死年三十五著有馬徵君遺集

### 林春溥

林春溥字立源福建閩縣人嘉慶七年進士改翰林院庶吉士散館授編修歷充順天鄉試會試同考官以父年八十陳請歸養遂家居不出咸豐十一年重與恩榮宴得旨賞加四品卿銜十二月卒年八十七春溥自少至老丹鉛不少閒有得卽隨手劄記其著述貫串經史一衷至當以金履祥通鑑前編本之皇極經世強事繫年鑿定甲子乃推究竹書紀年證以他書上溯黃帝下接左氏爲古史紀年十四卷又唐僧一行大衍曆每據竹書以推古年甲子其佚雜見他說端委靡竟



亦資異聞乃表而列之參稽同異爲說於後爲古史考年異同表二卷又以武王克殷甲子見於武成逸書乃參之傳記爲武王克殷日紀一卷又以傳春秋者左氏杜預始分經之年與傳相附乃參以公穀國語史記諸書附注其異文其逸事不知日月附錄於後爲春秋經傳比事二十二卷又以戰國諸侯史記滅於秦火史遷掇拾秦記日月不備傳聞異詞乃本通鑑綱目之舊增而輯之爲戰國紀年六卷表一卷又以竹書出後人綴輯乃旁考諸家所引疏通證明復取後人所以致疑者統爲後案爲竹書紀年補證四卷他著又有開闢傳疑二卷滅國五十考一卷孔孟年表二卷孔子世家補訂一卷孟子列傳纂一卷孟子外書補證一卷四書拾遺五卷古書拾遺四卷開卷偶得十卷

嚴可均 嚴元照

嚴可均字景文浙江烏程人嘉慶五年舉人官建德縣教諭引疾歸可均博文強識精考據之學與姚文田同治說文徧索異同爲說文長編亦謂之類考有天文算數地理類草木鳥獸蟲魚類聲類說文引羣書類羣書引說文類積四十五册又輯鐘鼎拓本爲說文翼十五篇將校定說文撰爲疏異孫星衍促其成乃撮舉

大略就毛氏汲古閣初印本別爲校義三十卷專正徐鉉之失又與丁榕同治唐石經著校文十卷自序云余弱冠治經稍見宋槧本旣又念若漢若魏若唐若孟蜀若宋嘉祐紹興各立石經今僅嘉祐四石紹興八十七石皆殘本而唐太和石壁二百二十八石巋然獨存此天地閒經本之最完最舊者夫唐代四部之富埒於梁隋而鄭覃唐元度輩皆通儒頗見古本苟能彙正積非歸於真是卽方駕熹平不難而僅止於是今也古本皆亡欲復舊觀已難爲力可慨也然而後唐雕版實依石經句讀鈔寫歷宋元明轉刻轉誤而石本幸存縱不足與復古以匡今謬有餘也獨怪數百年來學士大夫尠或過問者閒有一二好古之士亦與冢碣寺碑同類而並道之康熙初顧炎武始略校焉觀其所作九經誤字金石文字記刺取膠膠是非寡當又誤信王堯惠之補字以誣石經顧氏且然況其他乎嗚呼石經者古本之終今本之祖治經不及見古本而並荒石經匪直荒之又交口誣之豈經之幸哉余不自揆欲爲今版本正其誤爲唐石經釋其非爲顧氏等祛其惑隨讀隨校凡石經之磨改者旁增者與今本互異者皆錄出輒據注疏釋文旁稽史傳及漢唐人所徵引者爲之左證而石臺孝經附其後焉嘉慶十三年詔開全

唐文館可均以越在草茅無能爲役慨然曰唐之文盛矣哉唐以前要當有總集乃輯全上古三代秦漢三國六朝文使與全唐文相接多至三千餘家人各系以小傳足以考證史文皆從蒐羅殘賸得之覆檢羣書一字一句稍有異同無不校訂一手寫定不假衆力唐以前文咸萃於此焉又校輯諸經逸注及佚子書等數十種合經史子集爲四錄堂類集千二百餘卷又著有鐵橋漫稿十三卷其說文類考稿佚惟聲類二卷存道光二十三年卒年八十二 嚴元照字九能浙江歸安人諸生治經務實學尤熟於爾雅說文嘗曰說文古文家學爾雅今文家學也著爾雅匡名八卷旁羅異文佚訓鉤稽而疏證之又有悔菴文鈔八卷詩鈔詞鈔娛親雅言等書嘉慶二十二年卒年三十五

焦循 子廷琥 顧鳳毛 鍾懷 李鍾泗

焦循字里堂江蘇甘泉人嘉慶六年舉人曾祖源祖鏡父葱世傳易學循少穎異八歲在阮賡堯家與賓客辨壁上馮夷字曰此當如楚辭讀皮冰切不當讀如縫阮奇之妻以女旣壯雅尙經術與阮元齊名元督學山東浙江俱招循往遊性至孝丁父及嫡母謝艱哀毀如禮一應禮部試後以生母殷病愈而神未健不復北

行殷歿循毀如初服除遂託足疾不入城市者十餘年葺其老屋曰半九書塾復構一樓曰雕菰樓有湖光山色之勝讀書著述其中嘗歎曰家雖貧幸蔬菜不乏天之疾我福我也吾老於此矣嘉慶二十五年卒年五十八循博聞彊記識力精卓每遇一書無論隱奧平衍必究其源以故經史曆算聲音訓詁無所不精幼好易父問小畜密雲二語何以復見於小過循反復其故不可得既學洞淵九容之術乃以數之比例求易之比例漸能理解著通釋二十卷自謂所悟得者一曰旁通二曰相錯三曰時行旁通者在本卦初與四易二與五易三與上易本卦無可易則旁通於他卦亦初通於四二通於五三通於上先二五後初四三上爲當位不俟二五而初四三上先行爲失道易之道惟在變通二五先行而上下應之此變通不窮者也或初四先行三上先行則上下不能應然能變而通之仍大中而上下應如乾四之坤初而成小畜復失道矣變通之小畜二之豫五姤二之復五復初不能應姤初則能應小畜四不能應豫四則能應坎三之離上成井豐失道矣變通之井二之噬嗑五豐五之渙二豐上不能應渙上則能應井三不能應噬嗑三則能應此所謂時行也比例之義出於相錯如睽二之五爲无妄井二之噬

嗑五亦爲无妄故睽之噬膚卽噬嗑之噬膚坎三之離上成豐噬嗑上之三亦成豐故豐之日昃卽離之日昃豐之日中卽噬嗑之日中漸上之歸妹三歸妹成大壯漸成蹇蹇大壯相錯成需故歸妹以須須卽需也歸妹四之漸初漸成家人歸妹成臨臨通遯相錯爲謙履故眇能視跛能履臨二之五卽履二之謙五之比例也旣復提其要爲圖略八卷又成章句十二卷總名易學三書初循以易學質王引之引之以爲鑿破混沌年四十七病危以書未成爲憾後乃誓於先聖先師盡屏他務凡四易稿乃成其學易時隨筆記錄有易餘籥錄二十卷易話二卷註易日記三卷易廣記三卷又以古之精通易理深得義文周孔之指者莫如孟子生子後深知其學者莫如趙氏僞疏躋駁未能發明著孟子正義三十卷謂爲孟子作疏其難有十然近代通儒已得八九因博采諸家之說而下以己意合孔子相傳之正指又著六經補疏以說漢易者每屏王弼然弼解箕子用趙賓說讀彭爲旁借雍爲甕通孚爲浮解斯爲廝蓋以六書通借其解經之法未遠於馬鄭諸儒爲周易王注補疏二卷以尙書僞孔傳說之善者如金縢我之不辟訓辟爲法居東卽東征罪人卽管蔡大誥周公不自稱王而稱成王之命皆非馬鄭所能及



爲尙書孔氏傳補疏二卷以詩毛鄭義有異同正義往往雜鄭於毛比毛於鄭爲毛詩鄭氏箋補疏五卷以左氏傳稱君君無道稱臣臣之罪杜預揚其辭而暢衍之預爲司馬懿女壻目見成濟之事將以爲司馬飾卽用以爲己飾萬斯大惠士奇顧棟高等未能摘姦而發覆爲春秋傳杜氏集解補疏五卷以禮以時爲大訓詰名物亦所宜究爲禮記鄭氏注補疏三卷以論語一書發明義文周公之旨參伍錯綜引申觸類亦與易例同爲論語何氏集解補疏三卷合之爲二十卷又錄當世通儒說尙書者四十一家書五十七部仿衛湜禮記之例以時之先後爲序得四十卷曰書義叢鈔又著禹貢鄭注釋一卷毛詩地理釋四卷毛詩鳥獸草木蟲魚釋十一卷陸璣疏考證一卷羣經宮室圖二卷論語通釋一卷循於天文算術以梅文鼎弧三角舉要環中黍尺撰非一時繁複無次戴震句股割圓記務爲簡要變易舊名著釋弧三卷又以弧線之生緣於諸輪輪之弗明法無從附著釋輪二卷又以雍正癸卯律書用橢圓法實測隨時而差則立法亦隨時而改著釋橢一卷又以九章不能盡加減乘除之用而加減乘除可以通九章之窮著加減乘除釋八卷又得秦道古數學大略因著天元一釋二卷開方通釋一卷吳縣李

銳序之云此書於帶分寄母同數相消之故發揮無餘蘊李欒城郭邢臺後爲此學者未能如此妙也他著有北湖小志六卷揚州足徵錄一卷邦記六卷里堂道聽錄五十卷最愛柳柳州文習之不倦謂唐宋以來一人而已著有雕菰樓文集二十四卷又詞三卷詩話一卷循壯年卽名重海內錢大昕王鳴盛程瑤田等皆推敬之始入都謁座主英和和曰吾知子之字曰里堂江南老名士屈久矣歿後阮元作傳稱其學精深博大名曰通儒世謂不愧云子廷琥廷琥字虎玉優廩生性醇篤善承家學阮元稱爲端士循嘗與廷琥纂孟子長編三十卷後撰正義其廷琥有所見亦本范氏穀梁之例爲之錄存循又以測圓海鏡益古衍段二書不詳開方之法以常法推之不合旣得秦道古數學九章有正圓開方法爲開方通釋乃謂廷琥曰汝可列益古衍段六十四問用正圓開方法推之廷琥布策下算一一符合著益古衍段開方補一卷陽湖孫星衍不信西人地圓之說以楊光先之斥地圓比孟子之距楊墨廷琥謂古之言天者三家曰宣夜曰周髀曰渾天宣夜無師承渾蓋之說皆謂地圓泰州陳氏宣城梅氏悉以東西測景有時差南北測星有地差與圓形合爲說且大戴有曾子之言內經有岐伯之言宋有邵子

程子之言其說非西人所自蒞因博搜古籍著地圓說二卷他著有密花館詩文鈔 顧鳳毛字超宗江蘇興化人乾隆四十九年高宗南巡召試列二等五十三年副貢生父九苞字文子長於詩禮九苞母任氏大椿祖姑通經達史九苞之學母所教也四十六年進士歸時卒於路著述不傳鳳毛亦受經於祖母年十一通五經及長傳九苞學與焦循同學循就鳳毛問難始用力於經鳳毛又學音韻律呂於嘉定錢塘撰楚辭韻考入聲韻考毛詩韻考皆得塘旨又撰毛詩集解董子求雨考三代田制考未成而卒年二十七卒後循理其喪作招亡友賦哭之 鍾懷字保岐甘泉人優貢生與儀徵阮元同縣焦循相善共爲經學旦夕討論務求其是居恆禮法自守不與世爭名交遊中稱爲君子嘉慶十年卒年四十五所著有春秋考異說書區別錄祭法解周官識小論語考古漢儒考等書凡十三種卒後循刺其精華編爲菽匡考古錄四卷其漢儒考較陸德明所載增多十餘人 李鍾泗字濱石亦甘泉人嘉慶六年舉人治經精左氏春秋撰規規過一書抑劉伸杜焦循服其精博

李銳

汪萊 張敦仁 談泰 陳懋齡

李銳字尙之江蘇元和人諸生篤學樸厚長於經義習公羊春秋虞氏易嘗著周易虞氏略例十八篇爲一卷幼好算術因受經嘉定錢大昕聞中西異同之奧大昕誨之曰凡爲弟子者不勝其師不爲賢弟子於是閉戶沈思五年盡通疇人家言尤深古曆自三統以迄授時悉能洞澈本原以鄭注召誥周公居攝五年二月三月嘗爲一月二月不云正月者蓋待治定制禮乃正言正月故也鄭君精於步算此破二月三月爲一月二月以緯候入部數推知上推下驗一一符合江聲王鳴盛以爲據召誥十二月戊辰逆推之其說未覈因著召誥日名考融會古曆以發明經術大昕嘗以太乙統宗寶鑑求積年術日法一萬五百歲實三百八十三萬五千四十八分二十五秒爲疑銳據宋同州王湜易學謂每年於三百六十五日二千四百四十分之外有終於五分者五代王樸欽天曆是也以七千二百爲日法有終於六分者近年萬分曆是也以一萬分日法有終於五六分之間者景祐曆法載於太乙遁甲中是也以一萬五百分爲日法此暗用授時法也試以日法爲一率歲實爲二率授時日法一萬爲三率推四率得三百六十五萬二千四百二十五分卽授時之歲實也大昕釋然銳勤於探討每得一書必窮幽極微王

孝通緝古算經詞隱理奧無能通之者銳與友人張敦仁共著細草三卷詳論二十術而商功之平地役功廣袤之術較若列眉又於同邑顧廣圻處得秦九韶九章算經乃窮究天元一術論其法與借根方不同於是郭守敬李冶之說始明而知唐順之顧應祥書甚無謂也銳嘗謂四時成歲首載虞書五紀明曆見於洪範曆學乃致治之要爲政之本以通典通考置而不錄因著曆法通考其書體例大略以顛項夏殷六曆記載久缺太初曆本之殷曆立法疏闊三統術雖推法較密然亦用太初四年增一日之術是四分術無異太初也故斷自三統術始國朝之橢圓法止唐瞿曇悉達九執曆宋荆執禮會天曆史佚其法乃於開元占經寶祐四年會天曆中求其術而爲之說惜未成書惟三統術注四分術注乾象術注奉元術注占天術注日法朔餘強弱攷六科而已儀徵阮元督學浙江延銳校禮記正義及輯疇人傳元以今之敬齋稱之敬齋李冶號也他著有方程新術草句股算術細草弧矢算術細草回回曆元攷磬折說戈戟攷等書卒以攻苦得疾嘉慶二十二年卒年四十五又著開方說三卷下卷未就易簣時命弟子黎應南續成之應南字見山廣東順德人嘉慶二十三年舉人官浙江麗水平陽知縣經史輿



地無不貫通於天元尤精熟嘗做水道提綱例著地理沿革提綱未成而卒年四十八銳與甘泉焦循歙縣汪萊齊名時稱談天三友循自有傳汪萊字孝嬰安徽歙縣人優貢生大學士祿康薦修天文時憲二志書成選石埭訓導嘉慶十八年卒於官年四十六萊少慕其鄉江永戴震諸人之學力通經史百家及推步曆算其學不由師授默識靜會洞悉本原性善攻堅不苟同於人嘗與焦循李銳論宋秦九韶元李冶立天元一及正負開方法銳謂少廣一章得此始貫於一萊獨推其有可知有不可知互相齟齬萊墨守西法不逮銳之通變然循稱銳善言古人所已言而闡發得其真萊善言古人所未言而引伸得其間絕學之顯厥由兩君云其治經務熟習本文博通注疏以一知半解爲陋與人接無厓岸有以撰著相質者必首尾研究爲之疏通證明同縣程瑤田撰磬折古義以明一矩有半之句倨謂設縣於股在鼓上稍右股橫於上所以壓之使正泥成說者或疑之萊覈以重心比例之法而磬鼓直縣之制以定萊嘗製渾簡平一方各儀器觀測官訓導時又考製樂舞等器一十七宗一百五十八件所著有衡齋算學七卷參兩算經十三經注疏正誤聲譜說文聲類今有錄及詩文集

張敦仁字古餘山西陽

城人乾隆四十年進士歷官直隸南宮江西高安廬陵縣知縣銅鼓川沙廳同知江寧揚州南昌吉安府知府洊陞雲南鹽法道以末疾乞歸生平實事求是居官勤於公事暇則研究經史雖老病家居亦不廢學官揚州時得元和顧千里所藏撫本禮記鄭注因取各本校讎爲攷異二卷又有鹽鐵論考證通鑑補識誤通鑑補略諸書尤嗜曆算初官江西借錄督學李潢所藏秦李諸書因得窺立天元一求一之妙及來吳門與李銳相友善因共討論著輯古算經細草又以大衍求一術載在秦書鮮有知者後著求一算術上中下三卷上以究其原中下以明其法中爲雜法下則演紀也又以測圓海鏡有翻法在記之注疑李冶別有開方記一書佚而不傳因取秦書所載正負開方法列式而詳稽之用補李氏佚書爲開方補記九卷道光十四年校刊成六卷遂卒年八十一李潢字雲門湖北鍾祥人博綜羣書尤精算學與李銳齊名稱南北李乾隆三十六年進士官至工部左侍郎談泰字階平江蘇上元人乾隆五十一年舉人官山陽南匯教諭泰淹通經史專志撰述不爲世俗之學尤精律算嘗從錢大昕游大昕贈序稱其學深造自得交游中習於數者戴東原歿後幸得階平泰於算例初從西法入後覺其不善及

交汪萊焦循見循所撰天元一釋遂渙然冰釋謂可與同門李銳所校測圓海鏡益古演段相輔而行泰嘗引申大昕從子塘周徑之說爲書一卷又以梅穀成赤水遺珍中有方田度里一篇正王制注疏之誤其法以原數立算與鄭康成注互合但所列諸率不明言乘除之數恐觀者無從稽覈因爲之疏解並用三率互視法詳推爲王制井里算法解一卷附列里數各表使初學易明皆有裨經義他著有禮記源流考二卷先聖生卒年月日辨二卷三十六字母陰陽辨一卷古今音韻識餘二卷古今樂疑義三卷絲竹考異與人歌譜三卷九宮辨二卷春秋戰國歲次考二卷談氏族考一卷多聞闕疑六卷偶讀漫記四卷歲次月建異同辨一卷明算津梁四卷推步稿三卷天元釋例四卷平方立方表六卷北斗考三卷疇人傳三卷桐音館雜文四卷 陳懋齡字勉甫亦上元人乾隆五十七年副貢生官青陽教諭博聞強記學歷於里中謝廷逸得梅氏之傳著有經書算學天文考一卷爲儀徵阮元所稱又有春秋朔閏交食考六朝地理考

朱瑋 胡世琦 左暄 包世榮

朱瑋字蘭坡安徽涇縣人生三歲而孤祖命爲季父後瑋事嗣母孝與生母同嘉

慶七年成進士改庶吉士與幸翰林院柏梁體聯句宴賜什物散館授編修十二年充山東鄉試副考官尋擢贊善遷侍講與修明鑑以事降編修二十五年充會試同考官道光元年入直上書房屢蒙宣宗嘉獎有品學兼優之褒二年充會試同考官尋以母病乞養歸琦愛書如命治經蒐討古訓不隅守一家之說而必求心之所安儀徵阮元稱其腓字手弓諸解徵實精確嘉興沈濤稱其言易彖辭爻辭皆用韻乾三爻終日乾乾與田人天淵韻說文引夕惕若夤夤亦韻初九潛龍勿用龍與用韻上九用九悔與首韻又言詩鄭箋申毛非改毛毛公訓詁用段借字鄭所改字卽傳之段借字皆前人所未道琦以我朝經學書散而不聚因摭拾各家文集札記分典章名物訓詁音韻四類爲詁經文鈔七十卷續二十卷告歸後主鍾山正誼紫陽書院垂三十年以實學造士成就者衆著有說文段借義證二十八卷經文廣異十二卷文選集釋二十四卷古文宗桐城有小萬卷齋詩文集七十卷又輯有國朝古文彙鈔二百七十二卷三十年卒年八十二 胡世琦字玉鏞亦涇縣人嘉慶十九年進士改翰林院庶吉士散館授山東費縣知縣再補曹縣以事罷歸世琦與琦少相友善治經從文字聲音訓詁以會通其旨趣嘗

著小爾雅疏證考校精博爲段玉裁所推又著三家詩輯禹貢地理彙說未成而卒年五十五 左暄字春谷亦涇縣人拔貢生官蒙城教諭暄博通經史勤於著述有三餘偶筆十六卷續筆十二卷其體例仿宋景文筆記洪容齋隨筆古義燦然如於詩證棘革之字同於爾雅辨犧獻之音合於春秋公羊傳定提月是月之本通又謂說文以偏旁諧聲可考古音因斥徐鉉反切盡依孫愐唐韻之非朱珔稱其考訂精核皆有益學者他著有五經文字考異二卷性道闡言二卷瓶管記疑六卷詩文鈔各四卷暄豐姿超邁自壯年喪偶不再娶官教諭時造就多名下士告歸後猶閉戶討論矻矻不倦年九十一卒 包世榮字季懷亦涇縣人道光元年舉人深於漢學嘗謂毛公恪遵雅訓義最優簡直難曉故鄭氏時出別義以輔之非好學深思者莫能猝通至於草木鳥獸之性質體用詩人所由託興又古文習於禮故舉時舉地舉器服卽以見得失寓美刺斯三者有一不明則茫然不得其解因成訓詁八卷草木蟲魚四卷輿地一卷名曰學詩識小世榮與甘泉薛傳均儀徵劉文淇旌德姚配中相友善朝夕講貫博覽羣籍尤嗜荀屈呂覽四史通典通鑑諸書每歲必數過又著有吉凶典禮器服樂章十卷毛詩禮徵



李富孫 兄超孫 弟遇孫 馮登府

李富孫字既沔浙江嘉興人嘉慶六年拔貢生良年來孫從祖集字敬堂乾隆二十八年進士官鄞縣知縣精研經學以漢唐爲宗嘗爲學規論以課窮經課經濟著有願學齋文鈔富孫學有原本與伯兄超孫從弟遇孫有後三李之目長遊四方就正於盧文弨錢大昕王昶孫星衍馮聞緒論阮元撫浙肄業詁經精舍遂湛深經術尤好讀易所經眼者不下百餘種深斥圖讖之說著易解賸義謂易學有三派有漢儒之學鄭虞荀陸諸家精矣有晉唐之學王弼孔穎達諸家卽北宋胡瑗石介東坡伊川猶是支流餘裔至宋陳邵之學出本道家之術創爲圖說舉義文周孔之所未及漢以後諸儒之所未言者以自神其附會之說理其理而非易之所謂理數其數而非易之所謂數而前聖之易道晦矣因歎李鼎祚所輯易解精微廣大聖賢遺旨略見於此然其餘三十六家之說尙多未采其遺文賸義間見他書猶可蒐輯爰綴而錄之成書三卷校異一卷又著七經異文釋就經史傳注諸子百氏所引以及漢唐宋石經宋元槧本校其異同辨其得失折衷以求一是凡易六卷尙書八卷毛詩十六卷春秋三傳十二卷禮記八卷同里馮登府稱

其詳該奧博爲詁異義者集其大成又謂說文一書保氏六書之指賴以僅存自篆變爲隸隸變爲眞文字日繁譌僞錯出或有形聲意義大相區別亦有近似而其實異後人多混而同之或有一篆之形從某爲古籀爲或體後人竟析而二之經典文字往往昧於音訓擅爲改易甚與本義相迕夫段借通用說文自有本字有得通借者有不容通借而并爲俗誤者因援據經典以相證契俾世之踵謬沿譌焯然可辨爲說文辨字正俗八卷同里錢泰吉謂其書大旨折衷段注而亦有段所未及者讀說文之津梁也他著有漢魏六朝墓銘纂例四卷鶴徵錄八卷後錄十二卷曝書亭詞注七卷梅里志十六卷校經廬文稿十八卷 超孫字引樹嘉慶六年恩科舉人會稽縣教諭剖析經義尤深於詩嘗以毛詩草木蟲魚則有疏名物則有解地理則有考而詩中所稱之人則未有纂輯成書者因取詩人氏族名字博考經史諸子及近儒所著述並列國之世次泊其人之行事搜羅薈集爲詩氏族考六卷官會稽時課諸生依寧化雷鉉學規條約士習日上又著拙守齋集 遇孫字金瀾嘉慶六年優貢生處州府訓導幼傳祖訓淹貫經史著有尙書隸古定釋文八卷漢孔安國以科斗文難知取伏生今文次第之爲隸古定宋

薛宣因之成古文訓遇孫又以隸古文難知引說文諸書疏通之譌者是正疑者則闕性嗜金石有芝省齋碑錄八卷金石學錄四卷官處州時以處州地僻山遠阮元兩浙金石志未免脫漏乃搜輯百餘種爲括蒼金石志八卷他著有日知錄補正一卷校正一卷古文苑拾遺十卷天香錄八卷隨筆六卷詩文集十八卷

馮登府字雲伯浙江嘉興人嘉慶二十五年進士改翰林院庶吉士散館授江西將樂縣知縣不兩月以親病去官服闋官寧波府教授大吏重其才將薦舉之力辭後以告歸時已得咯血疾聞英人滋事寧郡失守病遂劇尋卒登府劬書媚學於兩漢唐宋諸儒之經誼旁及諸子百家傳注靡不强識博通而聲音訓詁尤爲深邃嘗從儀徵阮元遊元重其學契洽甚至與同縣李富孫交尤密每著一書輒與商榷富孫以爲錢大昕全祖望之比所著有三家詩異文疏證六卷補遺四卷以毛詩多段借字三家詩多本字因卽宋王應麟書爲之疏證與傳箋互相發明又著三家詩遺說翼證二十卷皆勝范家相書又著論語異文考證十卷蒐羅遺佚并援前人之說稽其同異以闡明古義詮釋最爲精審又著十三經詁答問十卷石經考異十二卷金石綜例四卷並見稱於時其自謝詩有新書難得故人刊

之語熟於掌故中歲遊閩修鹽法志福建通志名震海嶠間他著有閩中金石志十四卷金屑錄四卷石餘錄四卷浙江磚錄一卷唐宋詞科題名錄一卷玉堂書史補六卷梵雅一卷小謫仙館撫言十卷酌史巖撫譚十卷古文宗桐城詩宗朱彝尊兼工倚聲有文集八卷詩四卷詞四卷同時海鹽崔應榴字秋谷諸生生平究心經史子集老而彌篤著吾亦廬稿四卷阮元刻入經解中又著有廣孝編廣慈編詩文集

洪頤煊 兄坤煊 弟震煊

洪頤煊字旌賢浙江臨海人五世祖若皋順治十二年進士著南沙文集十二卷頤煊苦志力學與兄坤煊弟震煊讀書僧寮夜每借佛鐙圍坐談經不輟時有三洪之稱學使阮元招頤煊震煊就學行省頤煊尤精研經訓熟習天文貫串子史嘉慶六年拔貢生爲山東督糧道孫星衍撰孫氏書目及平津館讀碑記十二卷考據明審於唐代地理尤多所得入貲爲直隸州州判署廣東新興縣事適阮元督兩廣知頤煊吏才短而文學優也延之入幕諏經諮史以爲常嘗謂禮經莫大於宮室宮室不明則古人行禮之節周旋升降皆茫然莫知其處宋李如圭釋宮

祇舉其凡近人考證亦多未密因思古人宮室制度與今人不甚相遠時醇世樸寢廟明堂不若後世之千門萬戶細繹禮經皆有丈尺可尋名位可辨著禮經宮室答問二卷又著孔子三朝記注八卷孝經記注補證一卷諸史考異十八卷漢志水道疏證四卷管子義證八卷讀書叢錄二十四卷經典集林三十五卷台州札記十二卷筠軒詩文鈔十二卷頤煊好聚書嶺南市多舊本重貲購之家藏善本書三萬餘卷碑版二千餘通多世所罕覲有倦舫書目十卷 坤煊字載厚早

慧好讀書才氣奮迅精訓詁之學亦能爲古文詞爲督學朱珪所賞以拔貢入京師乾隆五十七年舉順天鄉試榜發十餘日而歿著有地齋詩文鈔 震煊字百

里少有雋名阮元稱之曰侍郎之後復見洪生侍郎天台齊召南也元修十三經

校勘記震煊任小戴禮修經籍纂詁震煊任方言所刊書籍多經其手嘗謂太史公書以魯定公十二年冬孔子去魯適衛爲誤定爲十三年春就史記正之又讀

夏小正鞠則見知鞠星卽虛星爾雅釋詁鞠盈也盈與虛相反鞠之爲盈猶治之爲亂甘之爲苦日用夏正日躔以求昏且絕無差忒因著爲說又辨禹貢洛鄭康

成以淇水爲洛亦古文家舊說浙江卽岷江非漸江舉漢地理志郭璞山海經注



以證酈道元之誤兼精選學在閩中時適重構三百有三十士亭成酌酒賦詩又手立就舉坐閣筆嘉慶十八年拔貢生既廷試貧不能歸入直隸督學幕中二十一年以微疾卒於深州年四十六著有夏小正疏義五卷櫛堂詩鈔一卷石鼓文考異一卷

徐養原 臧壽恭 張應昌 周中孚 凌堃

徐養原字新田浙江德清人嘉慶六年副貢生養原讀書有識年十三隨父天柱官京師從一時名宿問業於學術源流靡不洞曉性至孝父乞養歸順事左右說經以博親歡母善鼓琴嘗自製譜乃復講求音律以娛母及父母歿不復應舉家居誦讀考論非疾病喪紀不輟業然安粗糲遠聲譽偶爲邑人評所著書嘉定錢大昕見之大驚歎浙撫阮元集高材生校勘諸經注疏養原任尙書儀禮儀禮脫文錯簡視他經爲多養原所校特精爲諸人所不及嘗言曰古之儒者必修六藝郵之書數居之禮樂以養性也於是條通經傳著其大者爲明堂說井田議禘祫廟制郊社辨等篇又考樂器聲律歌詩及考工記諸制著頊石廬經說十卷其說多墨守鄭氏至論明堂失之隘計侯道失之遠若斯類比乃參正他說又著周官

故書考四卷儀禮今古文異同疏證五卷春秋三家異同考一卷論語魯讀考一卷其儀禮疏證辨敖氏之誤甚多可與褚寅亮管見並傳其於六書有六書故檀園字說僅籥急就篇考異說文聲類毛詩類韻周易楚詞經傳諸子音證古音備徵記字說糾二徐釋許之誤聲類增析段氏十七部得十九部求其得聲之原尤精算學自言學之二十年有周髀解九章重差補圖劉徽割圓表長廣方說帶縱諸乘方記乘方補記三角割圓對數比例對數新論欲中西之法各明其真無相雜糅謂古義明可以知西法之莫能外也晚欲悉取太衍天元借根對數諸法次於古九章以會數度之全書未成道光五年卒年五十八他雜著及詩文尙十餘種嘉興錢儀吉述人言謂養原經爲人師行爲儀表洵無愧云 臧壽恭原名耀字眉卿浙江長興人嘉慶十二年舉人性耿介澹於進取嗜漢儒經學兼通天文句股之術烏程嚴可均少許可獨契壽恭以女妻之道光二十六年卒壽恭嘗以諸家經學後人輯述已徧惟春秋賈服義尙無所屬乃著左氏春秋經古義左氏傳古義二書凡七易稿始成經與傳分者依陸德明經典釋文也其據三統以考正歲星超辰朔閏之次又備掇漢志所引劉歆之說以左氏之學興於歆皆有裨

古義體例簡質亦得古注家法卒後無子傳稿全佚經則闕昭公二十三年以下其弟子歸安楊峴補完之爲六卷壽恭依公穀日食三十六以爲正經止此峴補獲麟後日食一與劉歆左氏日食三十七相足壽恭又有春秋朔閏表天步證驗句股六術衍張應昌字仲甫浙江歸安人錢塘籍嘉慶十五年舉人官內閣中書應昌孝友恂謹舉止若寒素鍵戶著述肆力於春秋者三十餘年嘗謂屬辭比事春秋教也聖經書法必聯屬其辭排比其事乃明若以例說春秋則拘泥穿鑿害不勝言蓋史所謂例乃策書之大體簡牘之恆辭於聖經筆削無涉也先儒傳說字字鑿生議論至謂聖人改正朔貶天王誅賞諸侯黜陟列國誣聖已甚而卒於全經不可通於是徧取三傳以下及國朝諸儒書四百餘家彙輯辨說於卷首分隸辨說於各門破其褒貶穿鑿之例折衷一是成春秋屬辭辨例編八十卷吳縣吳鍾駿稱其網羅舊聞比之李鼎祚周易集解衛湜禮記集說同治九年同里詹事夏同善等進呈是書得旨嘉獎有耆年好學之諭是年重宴鹿鳴十三年卒年八十五他著有補正南北史識小錄二十八卷國朝詩鐸二十六卷壽彝堂集周中孚字信之浙江烏程人嘉慶十八年副貢生博聞強識邃於考證以紀事

纂言爲己任阮元修經籍纂詁中孚與焉著鄭堂讀書記凡經十四卷史二十二卷子二十三卷集二卷又有孝經集解逸周書補注金石識小錄等書皆佚不傳惟存讀書記五卷 凌埜字仲訥亦烏程人十歲失後母愛日事榜箠兄以杖死埜求死不得乃走山西習醫卜轉徙恆忻朔代閒友人授以易筋經術盡傳其技嘗遇盜數十人於野行劫曳馬揮鞭擊之盜披靡後父官山西尋得之教之學中道光十一年舉人性奇僻好異書與黟縣俞正燮友善侯官林則徐嘗目之爲國士儀徵阮元埜座主也命之治經乃爲漢學深懲嚮壁虛造之言尤惡新說謂其以理殺人如酷吏舞法著尙書述周易翼學春秋禮辨又著德輿子論時政甚具長推步算術嘗於學春秋之暇表其嬗代興廢又以歲星紀年及太歲超辰之法漢以後失墜因爲之辨著王朝列國紀年一卷元刻入經解中埜客代時得不耕之地數頃畫溝洫引溱沔水委折溉之成畊田畝稻十五六鬴分十之二歲作疏防又分其六七以利佃徑畛種蔬溝渠育魚蝦歎曰推是以富天下管仲不足爲矣晚官金華教諭於署中作圃行區田法每畝倍收咸豐十年粵匪寇湖州棄官歸城陷罵賊死

胡承珙 胡秉虔

胡承珙字景孟安徽涇縣人嘉慶十年進士改翰林院庶吉士散館授編修十五年充廣東鄉試副考官尋遷御史轉給事中自以身居言路當周知天下利弊陳之於上方不負職故其數年中陳奏多見施行而其條陳虧空弊端一疏尤爲深切著明二十四年授福建延建邵道尋調補臺灣道臺灣素稱難治承珙力行清莊弭盜之法在臺三年民番安肅旋乞假歸里道光十二年卒年五十七承珙究心經學尤專意於毛氏詩傳歸里後鍵戶著書與長洲陳奐往復討論不絕於月著毛詩後箋三十卷其書主於申述毛義自注疏而外於唐宋元明諸儒之說及近人爲詩學者無不廣徵博引而於名物訓詁及三家詩異同類皆剖析精微折衷至當其最精者能於毛傳本文前後會出指歸又能於西漢以前古書中反復尋考貫通詩義證明毛旨凡四易稟手自寫定至魯頌泂水章而疾作遺言屬奐校補奐乃爲續成之又以鄭君注儀禮參用古今文二本撮其大例有必用其正字者有卽用其借字者有務以存古者有兼以通今者有因彼以決此者有互見而並存者閱意妙旨有關於經實夥遂取注中疊出之字並讀如讀爲當爲各條



排比梳櫛考其訓詁明其假借參稽旁采疏通而證明之作儀禮古今文疏義十七卷又謂惠氏棟九經古義未及爾雅遂補撰數十條成二卷小爾雅原本不傳今存孔叢子中世多謂爲僞書作小爾雅義證十三卷斷以爲眞復著有求是堂詩文集三十卷 胡秉虔字伯敬安徽績谿人嘉慶四年進士官刑部主事改甘肅靈臺縣知縣陞丹噶爾同知卒於官秉虔自幼嗜學博通經史嘗入都肄業成均夜讀必盡燭二條應酬紛紜課不少減後出彭元瑞朱珪阮元之門又與姚文田王引之張惠言爲同年友故其學有根柢尤精於聲音訓詁著古韻論三卷辨江戴段孔諸家之說細入毫芒確不可易說文管見三卷發明古音古義多獨得之見末論二徐書有灼見語蓋其所致力也他著有周易小識八卷尙書小識六卷論語小識八卷卦本圖考一卷尙書序錄一卷漢西京博士考二卷甘州明季成仁錄四卷河州景忠錄三卷又有經義聞斯錄槐南麗澤編月令小識四書釋名小學卮言對牀夜話惜分齋叢錄消夏錄詩文集

沈欽韓

陳逢衡

沈欽韓字小宛江蘇吳縣人嘉慶十二年舉人安徽寧國府訓導欽韓質敏而爲

學甚勤暑夕苦蚊置兩足於甕讀書常至漏三下家貧借書於人計日歸輒成誦遂淹通經史旁及諸子百家類書雜記其學自詩賦古文詞外尤長於訓詁考證嘗謂左氏親承聖訓博驗寶書依經立傳而公穀家攻之欲顯復晦杜氏注出雖得列學官然多人以邪說陰敗禮教其蠹左氏也逾於明攻爲左傳補注十二卷左氏地理補注十二卷以漢書顏氏注淺陋章懷後漢書注雜集衆手劉氏注司馬八志頗宏富而少統貫爲兩漢書疏證七十四卷以裴氏三國志注專補其事迹而典章名物闕焉爲補訓詁八卷釋地理八卷以地理之學古書惟存酈氏水經注近人戴震校定其倒置羨脫趙一清爲之刊誤其書乃漸可讀然戴氏短在憑臆趙氏蔽於輕信至如古書之有足證與近今志乘之目驗可據者二家又皆蒐討未逮也故爲水經注疏證四十卷然後郡縣之廢置沿革山川之高深變遷流合派分昔通今塞皆如提挈在手指掌可談又爲韓昌黎集補注王荊公詩補注文集注蘇詩查注補正又注范石湖集深明唐宋兩朝典章故實多得作者之意其爲注先寫於書上下左右幾無隙乃錄爲初藁久之增刪又錄爲再藁每一書成輒三四易藁兼工詩古文辭尤嗜駢體氣骨騫舉脈絡微至爲自來所未有

著有幼學堂文集八卷詩集十七卷道光十一年卒年五十七 陳逢衡字穆堂江蘇江都人諸生道光元年舉孝廉方正力辭不就父好藏書爲瓠室積十萬餘卷與馬氏玲瓏山館齊名逢衡四歲入塾讀書成誦比長喜治經恥爲帖括學中年開讀騷樓招致東南文學之士戶外之屨恆滿又嘗北遊燕薊窺邊關而返著有竹書紀年集證五十卷敘略一卷逸周書補注二十四卷穆天子傳注補正六卷讀騷樓詩二卷二集二卷博物志考證爲晚年定本尤精覈凡奇情異事而核以庸言至理旁推交通無不畢貫嗜古之儒多躋之道光十一年卒年七十一

劉逢祿 宋翔鳳 戴望

劉逢祿字申受江蘇武進人祖綸大學士謚文定自有傳外祖莊存與舅莊述祖並以經術名世逢祿盡傳其學嘉慶十九年進士改翰林院庶吉士散館授禮部主事二十五年仁宗睿皇帝大事逢祿搜集大禮創爲長編自始事至奉安山陵典章具備道光四年補儀制司主事時河南學政請以尙書湯斌從祀文廟議者以斌康熙中在上書房獲譴乾隆中嘗奉駁難之逢祿攬筆書曰后夔典樂猶有朱均呂望陳書難匡管蔡尙書汪廷珍善而用之遂奉俞旨是年越南貢使陳請

爲其國王母請人獲得旨賞給而諭旨有外夷貢道之語其使臣欲請改爲外藩部中以詔書難更易逢祿草牒復之曰周官職方王畿之外分九服夷服去王國七千里藩服九千里是藩遠而夷近說文羌狄蠻貊字皆從物旁惟夷從大從弓考東方大人之國夷俗仁仁者壽有東方不死之國故孔子欲居之且乾隆間奉上諭申敕四庫館不得改書籍中夷字作彝裔舜東夷之人文王西夷之人我朝六合一家盡去漢唐以來拘忌嫌疑之陋使者無得以此爲疑越南使者遂無詞而退逢祿在禮部十二年恆以經義決疑事爲衆所欽服類如此其爲學務通大義不專章句由董生春秋闕六藝家法由六藝求觀聖人之志嘗謂世之言經者於先漢則古詩毛氏後漢則今易虞氏文辭稍爲完具然毛公詳故訓而略微言虞翻精象變而罕大義求其知類通達微顯闡幽者則公羊在先漢有董仲舒氏後漢有何劭公氏子夏喪服傳有鄭康成氏而已先漢之學務乎大體故董生所傳非章句訓詁之學也後漢條理精密要以何劭公鄭康成氏爲宗然喪服於五禮特其一端春秋文成數萬其旨數千天道浹人事備以之貫羣經無往不得其原以之斷史可以決天下之疑以之持身治世則先王之道可復也於是尋其條

貫正其統紀爲公羊春秋何氏釋例三十篇又析其凝滯彊其守衛爲箋一卷答難二卷又推原穀梁氏左氏之得失爲申何難鄭四卷又博徵諸史刑禮之不中者爲議禮決獄四卷又推其意爲論語述何夏時經傳箋中庸崇禮論漢紀述例各一卷別有緯略二卷春秋賞罰格一卷愍時學者說春秋皆襲宋儒直書其事不煩褒貶之說獨孔廣森爲公羊通義能抉其蔽然不能信三科九旨爲微言大義所在乃著春秋論上下篇以張聖權逢祿論春秋左氏傳據太史公書本名左氏春秋若晏子春秋呂氏春秋比自王莽時國師劉歆增設條例推衍事迹彊以爲傳春秋翼奪公羊博士師法所當以春秋歸之春秋左氏歸之左氏而刪其書法凡例及論斷之謬於大義孤章斷句之依附經文者庶以存左氏之本真俾攻左者不得爲口實更成左氏春秋考證二卷知者謂與閻惠之辯古文尙書等逢祿於易主虞氏於書匡馬鄭於詩初尙毛學後好三家有易虞氏變動表六爻發揮旁通表卦象陰陽大義虞氏易言補各一卷又爲易象賦卦氣頌撮其旨要尙書今古文集解三十卷書序述聞一卷詩聲演二十七卷又以其餘力取史記天官書及甘石星經爲之疏證成書數卷又著說文衍聲記以舉分韻之要又仿經



典釋文之例存異文古訓爲五經考異已就兩經而未成他著石渠禮論一卷詩文集八卷道光九年卒年五十六弟子潘準莊濱澍趙振祚皆從學公羊及禮有名宋翔鳳字于庭江蘇長洲人嘉慶五年舉人湖南新寧縣知縣亦莊述祖之甥述祖有劉甥可師宋甥可友之語劉謂逢祿宋謂翔鳳也翔鳳通訓詁名物志在西漢家法微言大義得莊氏之真傳著論語說義十卷序曰論語說日子夏六十四人共撰仲尼微言以當素王微言者性與天道之言也此二十篇尋其條理求其旨趣而太平之治素王之業備焉自漢以來諸家之說時合時離不能盡一常綜覈古今有纂言之作其文繁多因別錄私說題爲說義又有論語鄭注十卷大學古義說二卷孟子趙注補正六卷孟子劉熙注一卷四書釋地辨證二卷卦氣解一卷尙書說一卷尙書譜一卷爾雅釋服一卷小爾雅訓纂六卷五經要義一卷五經通義一卷過庭錄十六卷論語發微經問樸學齋札記咸豐九年重賦鹿鳴次年卒年八十二戴望字子高浙江德清人諸生望始好辭章繼讀博野顏元書爲顏氏學最後謁長洲陳奐通聲音訓詁復從宋翔鳳授公羊春秋遂通公羊之學著論語注二十卷用公羊家法演劉逢祿論語述何之微言他著有管

子校注二十四卷顏氏學記十卷謫慶堂遺集四卷望性倨傲門戶之見持之甚力生平作書點畫悉本小篆見者以爲江聲復生同治十一年卒年三十七歲

雷學淇 王萱齡

雷學淇字瞻叔順天通州人父鐔字宗彞乾隆二十七年舉人江西崇仁縣知縣道光初元詔天下臣民嚴冠服之辨鐔著古今服緯以申古義抑奢侈至九年書成年九十矣學淇嘉慶十九年進士任山西和順縣知縣改貴州永從縣知縣生平好討論之學每得一解必求其會通務於諸經之文無所抵忤以父鐔著古今服緯爲之注釋附以釋問一篇異同表二篇又以夏小正一書備三統之義究心參考二十餘年以堯典中星諸經曆數采虞史伯夷之說據周公垂統之文檢校異同訂其譌誤網羅放失尋厥指歸著夏小正經傳考二卷又考定經傳之文爲之疏證成夏小正本義四卷每慨竹書紀年自五代以來頗多殘闕爰博考李唐以前諸書所稱引者積以九年之蒐輯頗復舊觀著考定竹書紀年十四卷謂孟子先至梁後至齊此經之明文卽無他左驗亦當從之爲說況竹書曰梁惠成王後元十五年齊威王薨十七年惠成王卒然則惠王後元十六年齊宣王始卽位

孟子至梁當卽在後元十六年王卒之前一歲也史記誤謂惠王立三十六年卽卒故云三十五年孟子至梁而以惠王改元之後十六年爲襄王之世今據竹書稱梁惠會諸侯於徐州改元稱王故孟子呼之曰王史謂孟子至梁之二年惠王卒襄王立以本經考之其言可信但卒於改元後之十七年非三十六年也襄王旣立孟子見其不似人君乃東至齊據竹書卽齊宣卽位之二年也梁至齊千數百里故曰千里而見王若孟子先見齊宣王由鄒之齊六百餘里不得云千里矣齊人取燕孟子明謂宣王時事史記於齊失載悼子侯剡二代將威宣之立皆移前二十二年於齊人伐燕事不知折衷孟子而年表謂在湣王十年司馬溫公終求其說而不得乃將宣之卽位下移十年以遷就孟子自後說者疑信各半皆未有定論今據紀年則伐燕在宣王七年實周赧王之元年凡孟子書所記古人之歲以史記漢書之說推之皆不合者以紀年推之無不合且以竹書長曆推驗列宿之歲差歷代之日蝕自唐虞以來無有差貸嘗自云傳箋注疏取舍多殊非敢訾議前賢期於事理之合云爾他著校輯世本二卷古經天象考十二卷附圖說二卷亦嘗鬻齋經義考及文三十二卷 王萱齡字北堂順天昌平人道光元年

副貢旋舉孝廉方正官新安柏鄉兩縣教諭嗜漢學精訓詁受業於高郵王引之經義述聞中時引其說著有周秦名字解詁補一卷卽補引之所闕疑者

### 沈濤

沈濤字西雝浙江嘉興人嘉慶十五年舉人官江蘇如皋縣知縣擢守直隸真定等府有政聲以候補道分發江西歷署鹽法糧儲道會粵匪事棘隨巡撫張芾嬰城拒守四十九日解圍後授福建興泉永道未到官改發江蘇病歿泰州濤幼有神童稱嘗從金壇段玉裁遊深研經訓著有論語孔注辨僞二卷謂孔注之僞其證有五漢書藝文志不云有孔氏說是安國未嘗作傳一也集解序云古論惟安國爲之集解而世不傳既不傳矣平叔所集又從何得二也司馬遷親從安國問故宜不背其師說今考之孔子世家弟子列傳皆與孔注不合三也鄭康成就魯論篇章考之齊古爲之注以齊古讀正凡五十事今釋文所引鄭讀之從古者孔注率同魯論安國既注古論字豈轉不從古四也說文序稱論語古文今說文所引之字每與孔注不同五也蓋當塗之世鄭學盛行平叔思有以難鄭故託安國以欺天下後世耳他著有說文古本攷十四卷銅熨斗齋隨筆八卷交翠軒筆談

四卷生平學尙考訂兼嗜金石官真定時搜郡中古碑自周穆王至元順帝凡二百五十餘種多前人所未見爲常山貞石志二十四卷又有文集四卷詩集四卷詩話三卷

江藩 黃承吉 黃昉

江藩字子屏江蘇甘泉人監生受業吳縣余蕭客及元和江聲得惠棟之傳博綜羣經尤深漢詁旁及九流二氏之書無不綜覽所爲古文詞豪邁雄俊作河賦以匹景純元虛江海二賦性不喜唐宋文每被酒輒自言文無八家氣人目爲狂不顧也爲人權奇倜儻能走馬奪槩豪飲徧遊齊晉燕趙閩粵江浙韓城王杰極重之曾恭撰純廟詩集注由杰進呈恩賞御製詩五集後諭召對圓明園值林爽文陷臺灣報至遂輟人惜其遇幼蓄書萬餘卷以好客貧其家歲饑盡以易米作書窠圖志感年五十以易筮之得坎之節乃思守所傳之經終老於家因自號節甫初惠棟作周易述未竟而卒闕自鼎至未濟十五卦序卦雜卦二傳藩乃著周易述補五卷羽翼惠氏歛淺廷堪謂棟猶不免用王弼之說藩悉無之方之惠書有過之無不及也又著漢學師承記八卷於兩漢儒林家法之承授國朝經學之源



流釐然可考又取諸家撰述專精漢學者倣唐陸德明經典釋文傳注姓氏之例著國朝經師經義目錄一卷凡言不關乎經義小學意不純乎漢儒詁訓者悉不著錄論者以爲二百年來談漢學不可少之書又錄孫奇逢以下諸人分南學北學附記著宋學淵源記三卷少嘗爲爾雅正字道光元年年六十一復重加刪訂爲爾雅小箋三卷他著有隸經文四卷炳燭室雜文一卷江湖載酒詞二卷卒窮困以終初藩著漢學師承記仁和龔自珍諍之大旨謂讀書者實事求是而已若以漢與宋爲對峙恐成門戶之見其後壽陽祁寯藻囑光澤何秋濤爲續記秋濤曰是編當依阮元疇人傳之例改爲學人傳若特立一漢學之名宋學家羣起而攻之矣方東樹漢學商兌所由作也然藩所著宋學淵源記多以禪學爲宋學亦爲世所譏云 黃承吉字謙牧江蘇江都人嘉慶十年進士補廣西興安縣知縣調攝岑溪時有乙爲甲傭忽告歸不至乙妻子控甲因鬪斃乙承吉察甲辭色非殺人者究得乙匿於廣東羅定州欲以詐甲財遣役捕獲之甲寃始白尋以事罷歸承吉幼聰敏博綜兩漢諸儒論說兼通曆算與同里江藩焦循李鍾泗友善以經義相切劘時有江焦黃李之目族祖生有字詒義府二書承吉爲加按語以發

明聲音訓詁其他著述校證經史多曠識嘗以司馬遷爲孟子後尊聖道明六經第一人而揚雄謂遷行不副文是非謬於聖人班固助雄抑遷以爲己地卽以其語爲遷傳贊漢書本不應爲雄立傳固特變史例全錄雄自序爲傳遂於仕莽事略不及因並論雄毀東方朔致毀柳下惠爲鄉原仁賊設勸風二字貶賦就以誣陷司馬相如追序甘泉賦自謂風戒其實通篇皆以崑崙諛頌趙昭儀所作太元自謂合天應曆然皆臆數與天曆不合著文說十一篇以辨正之總三十餘萬言儀徵阮元稱其正文章明臣節卓然必傳又有周官析疑二十卷讀毛詩記經說夢陔堂文集十卷詩集五十卷道光二十二年卒年七十二黃奭字右原江蘇甘泉人以資入爲刑部郎中道光中以順天府尹吳傑薦欽賜舉人奭少聰敏家世貨殖而奭獨嗜學嘗從南城曾燠遊燠異之曰爾勿爲時下學余薦老師宿儒一人爲爾師乃江藩也奭修重禮延藩館其家四年自是專精漢學藩以惠棟著十三經古義惟爾雅未成命奭卒其業奭乃就陸德明釋文敘錄十家舊注博引羣書爲之疏證更於十家外擴拾爲衆家注成爾雅古義十二卷藩卒又獨學十餘年閉戶探尋足不出外其學專鄭氏輯有高密遺書十三種嘗以所學質於儀

徵阮元元稱其勤博他著有端綺集二十八卷存悔齋集杜詩注三卷

凌曙

凌曙字曉樓江蘇江都人國子監生曙好學根性家貧讀四子未畢卽去鄉作雜備保而績學不倦年二十爲童子師問所當治業於歛包世臣世臣曰治經必守家法專法一家以立其基則諸家漸通乃示以武進張惠言所輯四子書漢說數十事曙乃稽典禮考故訓爲四書典故覈六卷歛洪梧甚稱之旣治鄭氏學得要領又從吳沈欽韓問疑義益貫穿精審後聞武進劉逢祿論何氏公羊春秋而好之及入都爲儀徵阮元校輯經郭盡見魏晉以來諸家春秋說深念春秋之義存於公羊而公羊之學傳自董子董子春秋繁露識禮義之宗達經權之用行仁爲本正名爲先測陰陽五行之變明制禮作樂之原體大思精推見至隱可謂善發微言大義者然旨奧詞蹟未易得其會通淺嘗之夫橫生訾議經心聖符不絕如綫乃博稽旁討承意儀志梳其章櫛其句爲注十七卷又病宋元以來學者空言無補惟實事求是庶幾近之而事之切實無過於禮著公羊禮疏十卷公羊禮說一卷公羊問答二卷家居讀禮以喪服爲人倫大經後儒舛議是非頗謬作禮論

百篇引申鄭義阮元延曙入粵課諸子曙出與元商榷乃刪合爲三十九篇爲一卷道光九年卒年五十五曙有甥儀徵劉文淇貧而穎悟愛而課之遂知名其學實則曙出云

朱駿聲

朱駿聲字豐芑江蘇吳縣人年十三受許氏說文一讀卽通曉十五爲諸生從錢大昕遊錢一見奇之曰衣鉢之傳將在子矣嘉慶二十三年舉人官黟縣訓導肆力著述諸生造門請業者常數十人官舍至不能容俞正燮歎曰朱君眞名士也咸豐元年以截取知縣入都進呈所著說文通訓定聲等四十卷序云此書以直說文轉注假借之隱略以稽羣經子史用字之通融題曰說文表所宗也曰通訓發明轉注假借之例也曰定聲證廣韻今韻之非古而導其源也先之以東字遵康熙字典之例使學者便於檢閱也終之以韻準就今一百六韻區分之俾不繆於古亦不悖於今也附之以說雅明說文之上繼爾雅可資以參互考訂也文宗披覽嘉其賅洽賞國子監博士銜旋遷揚州府學教授引疾未之官六年卒年七十一駿聲著述甚博不求知於世兼長推步明通象數嘗論爾雅太歲在寅推大

所說謂其時自以實測之歲星在亥定太歲在寅命之曰攝提格以紀年歲星所合之辰卽爲太歲然歲星閱百四十四年而超一辰至秦漢而甲寅之年歲星在丑太歲應在于漢詔書以太初元年爲攝提格者因六十紀年之名歷年以次排敘不能頓超一辰故仍命以攝提格也於是後人以寅卯等爲太歲強以攝提格等爲歲陰其實爾雅所云歲陽歲陰非如後人說也他著有六十四卦經解八卷尙書古注便讀四卷詩傳箋補十二卷儀禮經注一隅二卷夏小正補傳二卷大戴禮記校正二卷左傳旁通十卷左傳識小錄三卷論孟塙解二卷懸解四卷經史問答二十六卷天算瑣記四卷數度衍約四卷離騷補注一卷淮南書校正六卷說解商十卷小學識餘四卷說叢十二卷

薛傳均 薛壽

薛傳均字子韻江蘇甘泉人諸生少工駢文喬麗冠儕輩後博覽羣籍強記精識然沈潛謙退不以所能自高十赴鄉試輒報罷以家貧就福建督學陳用光聘用光見所著書恨相見晚旋以疾卒於汀州試院年四十一傳均於十三經注疏及資治通鑑功力最深注疏本手自校勘旁行斜上朱墨爛然於先儒訓詁抱殘守



闕實事求是未嘗以臆竄改讀史則研究治亂得失之故於遺文瑣事亦記誦靡遺嘉定錢大昕說文答問深明通轉假借之義傳均博引經史以證之成疏證六卷又以文選中多古字條舉件繫疏通證明爲文選古字通十二卷 薛壽字价伯江蘇江都人諸生性介直嗜學幼卽著揚州十二經師頌以志嚮往督學祁篤藻賞其精於說文擢第一告其友曰吾試揚州得二士謂劉毓崧及壽也壽專力許書於音韻尤有深造好以讀若例說詩經用韻正轉又欲分廣韻入聲緝盡爲一部葉帖以下爲一部皆未有成書著有續文選古字通二十卷讀經筭記二卷學古齋文集二卷

方成珪 趙坦 嚴杰

方成珪字國憲浙江瑞安人嘉慶二十三年舉人官海寧州學正陞寧波府教授成珪研精小學尤勤於校讎官俸所入悉以購書儲藏數萬卷丹黃殆徧老尤矻矻不倦嘗以晉干寶易注亡於北宋其學原本孟京輔翼奉六情十二律風角之占而證諸人事則專以殷周之際水衰土王反復推闡以明經義蓋易之興於殷末世周盛德當文王與紂之事聖言足徵堦有依據因擴撫佚文詳爲疏釋爲干

常侍易注疏證二卷又謂古韻書之存者莫善於集韻因據宋槧本及近時段玉裁嚴杰汪遠孫陳慶鏞諸家校本正曹刻之誤復以方言說文廣雅經典釋文玉篇廣韻諸書正宋槧本及景祐元修之誤爲集韻攷正十卷吳縣吳鍾駿及定海黃式三敍其書深推其精博又謂流俗字書承譌襲謬其所爲字有出於類篇集韻外者或矯其弊則又一以說文繩今隸惟元李文仲字鑑述古準今斟酌悉當因詳加考釋爲字鑑校注五卷其他著述有韓集箋正十卷正宋廖瑩中世綵堂本韓愈集注之誤又寶研齋詩鈔二卷咸豐間以老病告歸卒 趙坦字寬夫浙

江仁和人諸生道光元年舉孝廉方正坦少與錢塘嚴杰以品學相砥礪遂於經術長洲陳奐遊杭州聞兩人緒論服其淵博坦善說易謂孟氏主卦氣而章句闕佚難考虞仲翔原出孟氏發明消息之旨然於卦爻過求變動又與居則觀象之經不合惟鄭康成采爻辰卦氣諸說別爲變通閎深博大確可依據惜僅存十之三四因本武進張惠言書循其例而引申其說著周易鄭注引義十二卷其書之例凡十七曰中氣曰三才曰六位曰當位曰據乘承曰得應曰雜卦氣曰相直曰互卦曰卦象曰爻辰值宿曰爻辰取象四時五行十二肖曰爻辰通消息卦曰爻

辰得卦氣曰爻體曰爻體通辰曰爻位相就其繫傳引義取於乾鑿度爲多亦惠  
言意也又著春秋異文箋十三卷又寶璧齋札記文集多說經之文 嚴杰字厚  
民浙江錢塘人國子生儀徵阮元嘗使編經籍纂詁及皇清經解著有小爾雅疏  
證蜀石經殘本毛詩考證

劉文淇 子毓崧 孫壽曾 方申

劉文淇字孟瞻江蘇儀徵人嘉慶二十四年優貢生父錫瑜以醫名世文淇殫精  
古籍貫串羣經於毛鄭賈孔之書及宋元以來通經解誼博覽冥搜實事求是尤  
肆力春秋左氏傳嘗謂左氏之義爲杜注剝蝕已久其稍可觀覽者皆係襲取舊  
說爰輯左傳舊注疏證一書先取賈服鄭三君之注疏通證明凡杜氏所排擊者  
糾正之所剽襲者表明之其沿用韋氏國語注者亦一一疏記他如五經異義所  
載左氏說皆本左氏先師說文所引左傳亦是古文家說漢書五行志所載劉子  
駿說實左氏一家之學經疏史注御覽等書所引左傳不載姓名而與杜注異者  
皆賈服舊說凡若此者皆稱爲舊注而加以疏證其顧惠補注及近人專釋左氏  
之書說有可采咸與登列末始下以己意定其從違上稽先秦諸子下考唐以前

史書旁及雜家筆記文集皆取爲證佐傳左氏之大義炳然著明草創四十年長編已具然後依次排比成書爲左氏舊注疏證八十卷又謂左傳義疏多襲劉光伯述議隋經籍志及孝經疏云述議者述其義疏議之然則光伯本載舊疏議其得失其引舊疏必當錄其姓名孔穎達左傳疏序祇云據以爲本初非故襲其說至永徽中諸臣詳定乃將舊注姓氏削去襲爲己語因細加剖析成左傳舊疏八卷又據史記秦楚之際月表知項羽曾都江都覈其時勢推見割據之迹成楚漢諸侯疆域志三卷又據左傳吳越春秋水經注等書謂唐宋以前揚州地勢南高北下且東西兩岸未設隄防與今運河形勢迥不相同成揚州水道記四卷又讀書隨筆二十卷文集十卷詩一卷文淇事親純孝父年篤老日晡侍起居朝夕扶掖寒夜侍寢以溫其足舅氏凌曙極貧遺孤毓瑞文淇收育之延同里方申爲其師遂補諸生卒年六十六子毓崧孫壽曾能世其學 毓崧字伯山道光二十年優貢生從父受經長益致力於學以文淇故治左氏續述先業成春秋左氏傳大義二卷又以文淇考證左傳舊疏因承其義例著周易尙書毛詩禮記舊疏考正各一卷又謂六藝未興之先學各有官惟史官之立爲最古不獨史家各體各類

並支裔之小說家出於史官卽經子集三部及後世之幕客書吏淵源所昉亦出於史官班氏之志藝文論述史官尙未發斯旨其敘九流以明諸子所出之官必有所授而其中仍有分省失當者既析九流中小說家流歸入史官又辨道家非專出於史官改爲出於醫官又增益者凡三家曰名家出於司士之官兵家出於司馬之官藝術家出於考工之官統爲十一家博稽載籍窮極根要成史乘諸子通義各四卷又經傳通義十卷王船山年譜二卷彭城獻徵錄十卷舊德錄一卷通義堂筆記十六卷文集十六卷詩集一卷卒年五十壽曾字恭甫同治三年光緒二年兩中副榜父毓崧主金陵書局爲江督曾國藩所重毓崧卒後招壽曾入局中所刊羣籍多爲校定初文淇爲左氏春秋長編晚年欲編輯成疏甫得一卷而歿毓崧思卒其業未果壽曾乃發憤以繼志述事爲任嚴立課程孜孜罔懈至襄公四年而卒年四十五其讀左筭記春秋五十九凡列表皆治左疏時旁推交通發明古誼者屬草亦未竟他著有昏禮別論對駁義南史校議集平博雅堂集芝雲雜記方申字瑞齋本出自申爲舅氏後故姓方亦儀徵人諸生性至孝少孤奉母甘旨備盡色養受學於文淇通虞氏易自言幼年讀宋易注怪其舍實象



而言虛理及長博考古注參閱諸緯與春秋內外傳然後知易之有卦象猶詩之有比興箋詩者不言比興則美刺之意不彰述易者不言卦象則吉凶之理不著著周易卦象集證一卷又以易家言象虞氏最密惠棟所述凡三百三十則張惠言所述凡四百五十六則顧其所引仍屬未備且間有字誤乃縷析條分一一羅列共得逸象千二百八十一則著虞氏易象彙編一卷又以諸家易象雖與虞氏未盡符合然揆其宗旨所在則固不甚相遠著諸家易象別錄一卷又著周易互體詳述一卷周易變卦舉要一卷道光二十年卒年五十

胡培翬 楊大培

胡培翬字載平安徽績溪人嘉慶二十四年進士官內閣中書戶部廣東司主事居官勤而處事密時人稱其治官如治經一字不肯放過絕不受胥吏賄賂而抉隱指弊胥吏咸憚之假照案發司員失察者數十人惟培翬及蔡紹江無所汚然猶以隨同畫諾鐫級歸里後立東山書院又主講鍾山雲間於涇川一再至並引翼後進爲己任去涇川日門人設飲餞者相望於道篤友誼郝懿行胡承珙遺書皆賴培翬次第付梓道光二十九年卒年六十八門人祀之鍾山書院績溪胡氏

自明諸生東峯以來世傳經學培翬涵濡先澤又學於欽凌廷堪尤邃精三禮官京師時嘗與新城陳用光涇朱珩胡承珙桐城徐璈光聰諧武進張成孫元和蔣廷恩太倉陳奐陳兆熊鶴山馮啟綦邵陽魏源考定鄭康成之生爲永建二年七月五日公祀之萬柳堂初著燕寢考三卷王引之見而善之旣爲儀禮正義上推周公孔子夏垂教之旨發明鄭賈得失旁逮鴻儒經生之所議張皇幽渺闡揚聖緒二千餘歲絕學也其旨見與順德羅惇衍書曰培翬撰正義約有四例一曰疏經以補注二曰通疏以申注三曰彙各家之說以附注四曰采他說以訂注書凡四十卷至賈氏公彥之疏或解經而違經旨或申注而失注意不可不辨別爲儀禮賈疏訂疑一書宮室制度以朝制廟制寢制爲綱以天子諸侯大夫士爲目學制則分別庠序館制則分別公私皆先將宮室考定而以十七篇所行之禮條系於後名曰宮室提綱陸氏經典釋文於儀禮頗略擬取各經音義及集釋文以後各家音切挨次補錄名曰儀禮釋文校補培翬覃精是書凡四十餘年晚歲患風痺猶力疾從事尙有士昏禮鄉飲酒禮鄉射禮燕禮大射儀五篇未卒業而歿門人江寧楊大培從學禮爲補成之他著有禘祫答研六室文鈔 楊大培字雅

輪江蘇江寧人諸生篤學寡交研窮經訓初從元和顧廣圻吳縣鈕樹玉游備聞蒼雅閩奧著說文重文考六卷純以聲音求假借以偏旁繁省求古籀異同之變又作五廟考專駁王肅之失江督陶澍以防海議試諸生大堵洋洋千言大略謂中國官恃客氣居上臨下視洋人若小負販顧彼雖好利而越數萬里海洋至此必非無所挾持者鹵莽行之必生邊鄙將來之患不可勝言時承平久人習附和之談讀者變色他著論語正義毛詩補注三禮義疏辨正經亂皆散失

### 迨鶴壽

迨鶴壽字蘭宮江蘇吳江人道光六年進士選池州府教授父朗乾隆五十四年舉人鳳陽府訓導以文章名鶴壽少承父教好學篤行精研古義每事必究其根原嘗謂劉歆三統曆稱成王元年正月己巳朔此命伯禽俾侯於魯之歲也先是周公攝政五年孟統二十九章首積月六千五百八十無閏餘積日十九萬四千三百十三大餘三十三小餘七故推至此年爲正月己巳朔金仁山移侯魯於攝政之元年則正月乃庚辰朔矣其精心探索類如此以漢翼氏治齊詩言聞五際之要十月之交篇五際之說出於齊詩則四始之說亦出齊詩五際必兼四始言

之蓋四始爲之綱五際爲之紀也四始五際配陰陽五行久成絕學因考詩篇之部分值歲之多寡而銓次之著齊詩翼氏學四卷論者謂其洩千餘年不傳之祕又嘗讀劉昭續漢志注所引帝王世紀有堯時墾田若干頃民口若干人數語因推衍三代土田戶口之數至三萬餘言又爲夏殷周九州經界疏證分土疏證謂近代言禹貢者必東極朝鮮南踰嶺嶠西跨嶺臺北抵沙漠荒遠無憑非則壤成賦之指周九州之界限自雁門以北長沙以南亦非所轄又謂封建之法有穀土三等地有廛里九等地有溝洫三等地有采邑三等地有山林六等地有山澤邑居地孟子與周禮一舉其土地一舉其封疆非有二制井田始於公劉夏殷之田不以井授武王亦祇行於圻內非盡天下而井之或五十或七十或百畝若今江南之行田改移甚便復爲孟子班爵祿正經界兩章疏證以暢其說凡百二十卷鶴壽通籍時年已五十四官教授十年猶閉戶著書矻矻不倦云

丁晏

丁晏字柘堂江蘇山陽人性嗜典籍勤學不輟阮元爲漕督以漢易十五家發策晏條對萬餘言江藩稱其撫羣籍之精闡漢易之奧好學深思爲當世冠道光元

年舉人晏以顧炎武云梅賾僞古文雅密非賾所能爲考之家語後序及釋文正義而斷爲王肅僞作謂肅雅才好博好作僞以難鄭君鄭君之學昌明於漢肅爲古文孔傳以駕其上後儒遂誤信之而皆莫能發其覆近世惠棟王鳴盛頗疑肅作而未能暢明其旨特著論以申辨之誤尙書餘論二卷又以胡渭禹貢錐指能知僞古文而不能信好古學旣爲正誤以匡其失復采獲古文甄錄舊說斷以己意自史漢水經注及許鄭古學傳以後儒之解證以地志輯禹貢集釋三卷生平篤好鄭學於詩箋禮注研討尤深以毛公之學得聖賢之正傳其所稱道與周秦諸子相出入康成申暢毛義修敬作箋孔疏不能尋繹誤謂破字改毛援引疏漏多失鄭旨因博稽互考證之故書雅記義若合符譌毛鄭詩釋四卷康成詩譜宋歐陽氏補亡今通志堂刊本譌脫躋駁爰援正義排比重編譌鄭氏詩譜攷正一卷以康成兼采三家詩王應麟有三家詩攷附刊玉海之後舛繆錯出世無善本迺蒐采原書校讎是正譌詩考補注二卷補遺一卷鄭氏注禮至精去古未遠不爲憑虛臆說迄今可考見者如儀禮喪服注多依馬融師說士虞記中月而禫注二十七月依戴禮喪服變除周禮大司樂鼓鼗注依許叔重說與先鄭不同小胥



縣鐘磬注二八十六枚在一虞依劉向五經要義小宗伯注五精帝依劉向五經通義射人注稱今儒家依賈侍中注考工記山以章注作獐依馬季長注禮記檀弓瓦不成味注當作沫依班固白虎通王制大綏小綏注當爲綏依劉子政說苑玉藻元端朝日鄭讀爲冕依大戴禮朝事義祭法幽宗雩祭鄭讀爲禋依許氏說文鄭君信而好古原本先儒確有依據凡此釋義補孔之遺闕皆前人未發之祕疏通證明燭若燿火譔三禮釋注共八卷又輯鄭康成年譜署其堂曰六藝取康成六藝論以深仰止之思然晏治經學不掙擊宋儒嘗謂漢學宋學之分門戶之見也漢儒正其詁詁正而義以顯宋儒析其理理明而詁以精二者不可偏廢其於易述程子之傳譔周易述傳二卷於孝經集唐元宗宋司馬光范祖禹之注譔孝經述注一卷尤熟於通鑑故經世優裕嘗與人論鈔幣謂輕錢行鈔必有利而無害論禁洋煙謂不禁則民日以弱中國必疲禁則利在所爭外夷必畔且禁煙當以民命爲重不當計利立法當以中國爲先不當擾夷後悉如其言在籍時辦隄工司賑務修府城浚市河開通文渠中支均有功於鄉里咸豐二年粵匪蔓延大江南北兩江總督檄行府縣教練鄉勇廣積穀米爲守禦計以晏主其事旋以

事爲人所劾奉旨遣戍捐繳臺費部議免行十年捻匪擾淮安北關晏號召團練分部要隘城以獲全十一年以團練大臣晏端書薦奉旨隨同差遣委用敘前守城績由侍讀銜內閣中書加三品銜花翎同治十一年重讜泮林晏少多疾病迨長讀書養氣日益強固治一書畢方治他事手校書籍極多必徹終始光緒元年卒年八十二所著書四十七種凡一百三十六卷其已刊者爲頤志齋叢書

### 王筠

王筠字貫山山東安邱人道光元年舉人游京師三十年與漢陽葉志詵道州何紹基晉江陳慶鏞日照許瀚商確今古後官山西鄉寧縣知縣鄉寧在萬山中民樸事簡訟至立判暇則把一編不去手權徐溝再權曲沃地號繁劇二縣皆治然亦未嘗廢學少喜篆籀及長博涉經史尤長於說文嘗謂桂馥書專臚古籍取足達許說而止不下己意惟是引據失於限斷且泛及藻績之詞段玉裁書體大思精所謂通例又前人所未知惟是武斷支離時或不免又謂文字之奧無過形音義三端古人之造字也正名百物以義爲本而音從之於是乎有形後人之識字也由形以求其音由音以考其義而文字之說備六書以指事象形爲首而文字

之樞機卽在乎此其字之爲事而作者卽據事以審字勿由字以生事其字之爲物而作者卽據物以察字勿泥字以造物且勿假他事以成此事之意勿假他物以爲此物之形而後可與蒼頡籀斯相質於一堂也今說文之詞足從口木從少鳥鹿足相似從匕苟非後人所竄亂則許君之意荒矣乃標舉分別疏通證明著說文釋例二十卷釋例云者卽許書而釋其條例猶杜元凱之於春秋也又以二徐書多涉草略加以李燾亂其次第致分別部居之脈絡不可推尋段玉裁旣創爲通例而體裁所拘未能詳備乃采桂段諸家之說著說文句讀三十卷句讀云者用張爾岐儀禮鄭注句讀之名謂漢人經說率名章句此書疏解許說無章可言故曰句讀也筠治說文之學垂三十年其書獨闢門徑折衷一是不依傍於人論者以爲許氏之功臣桂段之勁敵其後吳縣潘祖蔭見其書謂筠書晚出乃集厥成補弊救偏爲功尤鉅云又有說文繫傳校錄三十卷文字蒙求四卷他著有毛詩重言一卷附毛詩雙聲疊韻說一卷夏小正正義四卷弟子職正音一卷正字略二卷蛾術編禹貢正字讀儀禮鄭注句讀刊誤四書說略咸豐四年卒年七十一同治四年子彥侗由禮部進呈所著釋例句讀二書奉旨覽

俞正燮 王曜南

俞正燮字理初安徽黟縣人讀書過目不忘年二十餘負其所業北謁孫星衍於  
兗州時星衍既爲伏生建立博士復求左氏後裔正燮因作左邱明子孫姓氏論  
左山攷申雜難篇星衍多采其文以折衆論故其議論學術與星衍恆相出入道  
光元年舉人十二年館新城陳用光所爲校顧氏方輿紀要明年儀徵阮元主會  
試闈中經義策問皆折衷羣言如讀唐人正義馬氏通考而汰其繁縟會有驚其  
迂誕者束之高閣元後知之嘗語人引以爲恨正燮足跡半天下得書卽讀讀卽  
有所疏記每一事爲一題巨冊數十鱗比行篋中積歲月證據周徧斷以己意一  
文遂立其治經以漢儒爲宗不纏牽於注疏偶有所作蒼萃羣書走筆立就尤善  
言天象暨日官法以爲泰西法極精然豈三代秦漢人所豫解以某時法衡某時  
象是非犁然則三代秦漢人不能委其過又善言地輿說方域以爲中外同軌不  
道險今昔異履不詳憲惟殊方遐國人所忽必當察乃至掌故之巨名物之細聲  
詰之雅七緯三式釋典道藏素靈之冊景教之碑諸儒橋舌方皇者引稱首首如  
肉貫串皆非恆量所測識手成官私鉅書如欽定左傳讀本續行水金鑑之類不

自名者甚多自名者有癸巳類稿癸巳存稿說文部緯校補海國紀聞而類稿爲最著十九年爲江蘇學政壽陽祁篤藻校寫三古六朝文目因聘掌教惜陰書舍未逾年卒年六十六性孝友少時侍父獻句容縣訓導署中飲食必先嘗味不正者不敢進居鄉邑言動不苟誘掖後進亶亶忘倦所得修脯盡濟親友之急篤藻嘗以經師人表稱之弟正禧亦舉人湛深經史善論文多義行與正燮齊名王曜南字燦文安徽婺源人貢生敦行嗜學殫心經義綜覈漢唐以來注疏及宋五子書剖晰異同數十年寒暑不輟晚更融貫百家獨抒心得著述極富咸豐元年舉孝廉方正辭不就授徒自給平居深衣方履兢兢以守身爲主著有禮書條考十五卷樂律條考五卷春秋釋義十二卷春秋總說四卷十二公時事略二卷詩經集義九卷毛詩采要四卷禹貢水道釋圖二卷儀禮醒要四卷離騷集注二卷務本堂文集六卷

姚配中

姚配中字仲虞安徽旌德人諸生少穎悟博覽經史百家尤嗜易初得張惠言虞氏義因研究李氏集解以鄭爲主而參以漢魏經師成周易參象後復定爲周易



姚氏學凡十六卷其言曰天一地二天三地四天五地六天七地八天九地十者何也一也一者元也元者易之原也是故不知一者不足與言易元藏於中爻周其外往來上下而易道周是故不知周者不足與言易日月爲易坎離相推一陰一陽窮理盡性是故不知太極之始終者不足與言易爻畫進退變化殊趣差之毫釐謬以千里是故不知四象之動靜者不足與言易以十翼爲正鵠以羣儒爲弓矢博學以厚其力思索以通其神審辨以明其旨庶乎其不遠也夫時儀徵劉文淇甘泉薛傳均丹徒柳興恩涇包世榮包慎言並治漢學與配中善皆歎爲莫及配中又以月令一編實先王體天窮民之大經其義一本於卦氣爲周易通論月令二卷素嗜琴時琴學有金陵常熟武林三派而皆出廣陵配中謂其傳譜多誤因爲琴學二卷嘗語涇包世臣謂七絃各有本數倍數半數損益上下旋相爲宮以定宮商角徵羽正變清濁之位而六十律三百六十四聲俱以和相應凡吟揉必在角羽位蓋君臣所有事皆爲民物故吟而上揉而下往復遲回必當民物之位也世臣請其鼓琴配中於對几設副琴鼓半副琴絃自鳴几案間杯盞及櫺隔時或響應怪問之曰凡物各有數數同則聲應唐書載寺磬無故自鳴萬寶常

爲剋磬成痕而鳴止蓋其磬與宮中鐘同數鐘鳴則磬應剋之則數與鐘異故鳴止也配中家貧而守堅有司慕其學行求識面不可得督學張鱗尤重之謂拔貢呂賢基曰姚生學行寧廣九學無匹若歸當益親近請業庶不致終於孤陋寡聞也道光二十四年卒年五十三世榮字季懷慎言字孟開並舉人世榮著有詩禮徵文十卷慎言著有經義考義公羊曆譜十卷

羅士琳 顧觀光

羅士琳字次璆江蘇甘泉人國子生嘗遊京師考取天文生以推算道光初元日月合璧五星聯珠見知於時爲同輩所嫉不得官東出山海關客汴梁楚中所至爲名德通人所賓接儀徵阮元尤推重之事母孝家貧餬口四方以供菽水未嘗一日輟學咸豐元年舉孝廉方正未就試三年粵匪陷揚州死於難年垂七十矣士琳少治經學精六書已乃專力步算嘗以春秋置閏失者十之四舊史誤者十之三傳鈔錯者十之二若夫元術絕滅七曆互相後先則不過十之一乃稽其同異著春秋朔閏異同又因讀書而旁及算術著淮南天文訓存疑周無專鼎考初精西法著憲法一隅比例匯通後連獲佚書悔其少作以爲天算書得周髀精意

者莫過於宋秦九韶之正負開方法與國朝李銳之天元一術而元朱世傑實集其成遂壹意專精通貫其術其言秦氏學有句股截積和較算例言李氏學有句股容三事拾遺三卷附例一卷三角和較算例一卷弧矢算術補一卷言朱氏學有四元玉鑑細草二十四卷四元釋例一卷演元九式一卷臺錐積演一卷校正算學啟蒙三卷四元玉鑑銳嘗欲補草而未果士琳殫精一紀就原書二十四門門各補草阮元以爲精思神解卽今之世傑算學啟蒙道光中始出土琳校其名術義例多與玉鑑相表裏因列七證定爲世傑書如謂玉鑑斗斛之斗別用斛此段借字本漢書平帝紀及管子乘馬篇尙雜見於唐以前孫子五曹張邱建諸算經其鈞石之石說文本作和玉鑑作碩碩與石古雖互通然段碩爲鈞石之石則僅見於毛詩甫田疏引漢書食貨志而算書罕見又若玉鑑皖田之皖雖見於李籍九章音義而字書所無此書并同亦其證也時稱其確他著有推算日食增廣新術一卷綴術輯補二卷校正國朝明安圖割圓密率捷法四卷續疇人傳六卷博能叢話觀我生室臆藁 顧觀光字賓王江蘇金山人少好讀書博通經史百家精校勘好輯古人逸書不下數十種其古史逸文卽所以補馬氏繹史者也尤

究極中西曆算能抉其所以然而蒐補其未備西人求對數以正數屢次開方對數屢次折半立術繁重同時諸人并有新術而未盡其理觀光別爲變通以求二至九之八對數因任意設數立六術以御之得數皆合復立還原四術又推而衍之爲和較相求八術自來言對數者未之聞也又謂數之用莫便於施之八綫而西人未言其立表之根因冥思力索得之仍用諸乘差法迎刃而解尤造微之詣其他算術亦多所糾正著有算牘初續編二卷九數存古九數外錄六曆通考九執歷解回回曆解推步簡法新曆推步簡法五星簡法等書嘗謂積世積測積人積智曆算之學後勝於前微特中國西人亦然然舊法者新法之所從出也而要  
不離乎舊法之範圍且安知不紬繹焉而別有一新法在乎故凡以爲已得新法舊法可唾棄者非也時以爲通論他著有古韻二十二卷七國地理考十四卷國策編年考一卷同治元年卒年六十四

曾釗 林伯桐 李黼平 吳懋清

曾釗字敏修廣東南海人道光五年拔貢生官合浦縣教諭調欽州學正釗篤學好古讀一書必校勘譌字脫文遇祕本或雇人影寫或懷餅就鈔積七八年得數

萬卷自是孳求經義文字則考之說文玉篇訓詁則稽之方言爾雅雖奧晦難通而因文得義因義得音類能以經解經確有依據入都時見武進劉逢祿逢祿曰篤學若冕士吾道東矣冕士釗號也儀徵阮元督粵震澤任兆麟見釗所校字林以告元元驚異延請課子後開學海堂以古學造士特命釗爲學長獎勵後進嘗因元說日月爲易爲合朔之辨在朔易更發明孟喜卦氣引繫辭懸象莫大乎日月死魄會於壬癸日、月下象未濟爲晦時元以爲足發古義宜再暢言之以明孟氏之學因著周易虞氏義箋七卷他著有周禮注疏小箋四卷謂惟王建國國謂諸侯國賈馬說是引左傳師服曰天子建國注立諸侯祭法天下有王分地建國注建國封諸侯爲證又引詩周頌序賚大封於廟也樂記武王未及下車而封黃帝之後於薊封帝堯之後於祝封帝舜之後於陳以駁賈疏王國未立先建諸侯之說謂辨方正位鄭司農云正君臣之位其說不可破鄭君引召誥謂定宗廟失之周營洛原以均諸侯貢道非有遷都之意故周末東遷以前宗廟皆在豐鎬詩振鷺潛及黍離序可證漢書韋元成傳禮廟在大門內不敢遠其親也五行志董仲舒災異對曰高廟不當居遼東譏原廟也苟洛立宗廟是原廟不始於漢矣



如斯之類皆特精審又詩說二卷長洲陳奐詩疏中往往采其說又詩毛鄭異同辨一卷毛詩經文定本小序一卷考異一卷音讀一卷虞書命義和章解一卷論語述解一卷讀書雜誌五卷面城樓集十卷其輯古書有楊議郎著書一卷異物志一卷交州記二卷始興記一卷欵程恩澤典試粵東耳釗名欲取作榜首適釗持服未預試榜發後恩澤邀釗飲於蒲澗作詩云我求明珠向南海離朱喫詬驚愚頑昆侖第一未即得羊鬚首捋緣希慳謂釗也釗好講經濟之學二十一年洋人焚掠海疆以祁墳還督兩粵番禺舉人陸殿邦獻議填大石獵德瀝濬河道以阻火船墳舉以問釗釗言易稱設險者不恃天塹不藉地利在人相時設之而已入省河道三獵德瀝濬皆淺由大石至大黃濬水深數丈三四月夷船從此入當先事防之以固省城城固然後由內達外墳甚踴之委釗相度堵塞形勢釗以大石爲第一要區糾南海番禺二縣團勇三萬六千晝夜演練防務遂密二十三年墳謀修復虎門礮臺釗進礮臺形勢議十條已而廉洋賊起墳以釗習知廉州情形委釗與軍事海賊投首咸豐四年卒於家林伯桐字桐君廣東番禺人嘉慶六年舉人生平好爲考據之學宗主漢儒而踐履則服膺朱子無門戶之見事親

孝道光六年試禮部歸父已卒悲慟不欲生居喪悉遵古禮蔬食不入內者三年自是不復上公車一意奉母與兩弟友愛教授生徒百餘人咸敦內行勉實學嘗言內行者默而成之不言而信者也行之著於外非其人之意鶴鳴九皋聲聞于天不自知也又曰篤行君子無所慕於外而有所得於己非學則不能故稱人必曰學行也粵督阮元鄧廷楨皆敬禮之元延爲學海堂學長廷楨聘課其二子然伯桐以道自重絕不預外事二十四年選授德慶州學正閱三年卒於官年七十伯桐於諸經無不通尤深於毛詩謂傳箋不同者大抵毛義爲長孔疏多以王肅語爲毛意又往往混鄭於毛爲毛詩學者當分別觀之庶幾不失家法因考鄭箋異義爲毛詩通考三十卷又著毛詩傳例二卷又綴其碎義瑣辭著毛詩識小三十卷皆極精覈他著有易象釋例十二卷易象雅訓十二卷三禮注疏考異二十卷冠昏喪祭儀考十二卷左傳風俗二十卷古音勸學三十卷史學蠡測三十卷供冀小言二卷古諺箋十一卷兩粵水經注四卷粵風四卷修本堂稿四卷詩文集二十四卷李黼平字繡子廣東嘉應州人幼穎異年十四精通樂譜及長治漢學工考證嘉慶十年進士改翰林院庶吉士散館授江蘇昭文縣知縣洎事一

以寬和慈惠爲宗不忍用鞭扑獄隨至隨結公餘卽手一編民間因有李十五書生之目以虧擲落職繫獄數年乃得歸會粵督阮元開學海堂聘閱課藝遂留授諸子經所著毛詩紬義二十四卷元爲刻入皇清經解中後主東莞寶安書院課士一本諸經人咸愛重之道道光十二年卒年六十三他著有易刊誤二卷文選異義二卷讀杜韓筆記二卷其論詩謂心聲所發含宮嚼羽與象簫胥鼓相應故所爲詩專講音韻能得古人不傳之祕有著花菴集八卷吳門集八卷南歸集四卷續集四卷 吳懋清字澄觀廣東吳川人嘉慶十五年舉人懋清聰敏力學年十二能誦十三經長益肆力於箋注義疏學政姚文田陳嵩慶亟賞之會試不第館京師爲連平顏伯燾海康陳昌齊定安張岳崧及同邑林召棠所推重名噪一時鄉試受知於胡承珙暇時出所學相質以是日益進其學巨儲而約舉喜深湛之思漢唐以來作者皆搜剔纂錄以爲生古人後讀書始得如是爲文淵深古茂力追先正性孝友樂善教人以敦行爲本時出所學誘後進學者以列弟子籍爲榮晚年著述自娛雖病目精思不衰道光二十五年卒年七十二著有尙書解五卷尙書古今文測七卷尙書三文訂譌六卷今古文尙書洞答二卷尙書訂定古本

七卷詩經解五卷詩經測九卷毛詩訂本七卷毛詩復古錄六卷周官鄭注訂詘十二卷儀禮測八卷大戴禮記測十三卷春秋傳注訂一卷纂輯十三經注疏十九卷四書解十二卷四書推解十卷論語考八卷孟子考八卷朱文公儀禮通解弗一卷國語章注訂詘四卷天洞測一卷詩賦雜文十八卷

魏源 鄒漢勛

魏源字默深湖南邵陽人道光二年順天舉人試卷進呈宣廟手批嘉賞名籍甚入貲爲內閣中書改知州二十四年成進士發江蘇以知州用權東臺興化縣事二十九年大水河督將啟開源力爭不能得則躬赴制府擊鼓總督陸建瀛聞報立往勘始得免啟七州縣士民皆德之未幾補高郵州坐驛遞遲誤免尋以緝獲梟匪功副都御史袁甲三奏復其官咸豐六年卒年六十三源經術湛深讀書精博初崇尚宋儒理學後發明西漢人之誼於書則專申史記伏生大傳及漢書所載歐陽夏侯劉向遺說以難馬鄭撰書古微十二卷於詩則謂毛詩晚出顧炎武闡若據胡渭戴震皆致疑於毛學而尙知據三家古義以證其源因表章魯韓墜緒以匡傳箋撰詩古微二十二卷於春秋則謂漢書儒林傳言董生與胡毋生同

業治春秋而何休注但依胡母生條例於董生無一言及近日曲阜孔廣森武進劉逢祿皆公羊專家亦止爲何氏拾遺補缺而董生之書未之詳焉若謂董生疏通大義不列經文不足頡頏何氏則其書三科九旨燦然大備且宏通精森內聖而外王蟠天際地遠在胡母生何休章句之上撰董子春秋發微七卷他所著有庸易通義說文擬雅兩漢經師今古文家法考論語孟子類篇孟子小記小學古經大學古本孝經集傳曾子章句明代食兵二政錄老子本義孫子集注元史新編多未成其例目見集中性兀傲高自標樹惟論古今成敗國家利病學術本末反復辨論不少衰四座皆屈嘗謂禹分天下下爲九州外薄四海咸建五長而朔南所暨說者謂北距大漠不能越乎其外至我朝而龍沙雁海之國萬潼億彘之民獨峯駝無尾羊之部奔走萬里臣妾一家因借觀史館祕閣官書參以士大夫私家著述故老傳聞排比經緯馳騁往復成聖武記十四卷統四十餘萬言又喜談經濟其論河務謂宜改復北行故道咸豐五年銅瓦廂之決河復北流由大清河入海適與所論相合又作籌鹺篇上兩江總督陶澍謂鹺政之要不出化私爲官而緝私不與焉自古有緝場私之法無緝鄰私之法鄰私惟有減價敵之而已非



減價何以敵私非輕本曷以敵減價非裁費曷以輕本非變法曷以裁費迨陸建瀛當漢岸火災之後始力主行之晚遭夷變謂籌夷事必知夷情知夷情必知夷形因據粵督林則徐所繹西夷之四州志及歷代史志明以來島志近日夷圖夷語成海國圖志一百卷番禺陳澧常歎以爲奇書又謂其調客兵不如練土兵及裁兵併糧水師將弁用舵工礮手出身諸條爲最善惟議攻篇以夷攻夷之說尙有可議後源至粵聞其說大悅因定交焉其虛心受善如此所自著有古微堂文內集三卷外集七卷詩集六卷而賀長齡所著皇朝經世文編亦源襄輯之力居多 鄒漢勛字叔績湖南新化人咸豐元年舉人父文蘇字望之歲貢生以古學教授鄉里關學舍曰古經堂制度悉依周禮與諸生肄士禮其中其考據典物力尊漢學而談心性則宗朱子道光十一年卒年六十三子六人皆以才稱漢勛爲最年十五通左氏義佐伯兄漢紀撰左氏地圖說博物隨鈔又佐仲兄漢潢撰羣經百物譜諸書年十八九撰六國春秋鄉居苦書少詣郡學借觀鬻畝購書未嘗計貧以漢去古未遠諸經注皆有師承故推闡漢學不遺餘力所著讀書偶識三十六卷自言破前人之訓故必求唐前之訓故方敢用違箋傳之事證必求漢前

之事證方敢從尤深音韻之學初著廣韻表十卷自敘謂五韻之別萬有二千經之以五紀之以三判之以八程之以廿奠之以五而萬有二千具矣何謂奠之以五五者五音也氏印上去入是也四聲本五誤切爲四與夫言六音七音八音十聲者皆非也何謂程之以廿廿者廿聲也喉舌脣齒是謂四聲有深喉淺喉舌頭舌腹齒本齒頭開脣合脣聲二之故八是應八音深喉舌腹譬之八音猶草木皆一聲餘六物猶金石絲竹匏土皆三聲一其二三其六故有廿聲何謂判之以八八者八呼也呼有內外有大小有輕重錯之則八釋家謂之八梵等韻家謂之八等漢晉之儒謂之橫口閉口籠口蹶口而皆有輕重總之曰外言內言何謂經之以五紀之以三均類之謂也韻有宮商角徵翳是謂五韻韻有三統五而三之則十又五類一曰戈黃鍾爲宮之類二曰孤林鍾爲徵之類三曰媯大蔟爲商之類是爲宮韻四曰岡大蔟爲宮之類五曰公南呂爲徵之類六曰肩姑洗爲商之類是爲商韻七曰官姑洗爲宮之類八曰昆應鍾爲徵之類九曰涓蕤賓爲商之類是爲角韻十曰乖林鍾爲宮之類十一曰傀大蔟爲徵之類十二曰該南宮爲商之類是爲徵韻十三曰高南呂爲宮之類十四曰甘姑洗爲徵之類十五曰弁應

鍾爲翳之類是爲翳韻此之謂經之以五統之以三晚爲五韻論說尤精粹時以江戴目之於史學長地理嘗謂知古者期以用於今今古之不相通官名氏族法制典章州郡地名皆是而地名尤叢雜難據故考覈獨詳性溺苦於學衣履垢敝不精修飾初應聘校刊王夫之之遺書凡五十一部三百餘卷均錄其序跋附以案語以是知名後應聘修寶慶及貴陽大定興義安順諸郡志所撰新寧形勢說及貴陽循吏傳皆洞中日後情事公車報罷訪同郡魏源於高郵互出所著相參訂漢勛研究曆算與源共譌堯典釋天一卷又爲繪天象諸圖會賊陷江寧乃間道歸長沙時弟漢章已隨江忠源守南昌漢勛上曾國藩以援堵守三策並用之說謂不援江西堵廣西湖南亦不能守國藩用其言命江忠淑偕漢勛率楚勇千人援南昌圍解敘勞以知縣用未幾忠源擢安徽巡撫約漢勛從既至廬州助守大西門賊三爲隧道攻之城圯數丈登陣矣漢勛力擊卻之忠源上其功有詔褒獎以同知直隸州用賞戴花翎凡堅守三十七日水西門地雷復發城遂陷漢勛憤甚痛飲拔所佩刀直前殺賊十數人力盡死之年四十九事聞贈道銜祀廬州及湖南昭忠祠生平於易詩禮春秋論語說文水經等書皆有撰述凡二十餘種

合二百餘卷同治二年土匪焚其居俱燬於火後人搜輯贖稿惟存讀書偶識八卷五韻論二卷顓頊曆考二卷數藝齋文三卷詩一卷紅崖刻石釋文一卷南高平物產記二卷

陳澧 侯康 侯度

陳澧字蘭甫廣東番禺人道光十二年舉人河源縣訓導澧九歲能爲詩文及長與同邑楊榮緒南海桂文耀爲友復問詩於張維屏問經學於侯康凡天文地理樂律算術古文駢文填詞篆隸真行書無不研究中年讀諸經注疏子史及朱子書日有課程遂輟作詩初著聲律通考十卷謂周禮六律六同皆文之以五聲禮記五聲六律十二管還相爲宮今之俗樂有七聲而無十二律有七調而無十二宮有工尺字譜而不知宮商角徵羽懼古樂之遂絕乃考古今聲律爲一書自周禮三大祭之樂爲千古疑義今考唐時三大祭各用四調而周禮乃可通以此知古樂十二宮本有轉調又據隋書及舊五代史而知梁武帝萬寶常皆有八十四調宋姜夔謂八十四調出於蘇祗婆琵琶近時凌廷堪燕樂考原遂沿其誤至唐宋俗樂凌氏已披尋門徑然二十八調之四韻實爲宮商角羽其四韻之第一聲

皆名爲黃鍾凌氏於此未明其說亦多不合且宋人以工尺配律呂今人以工尺代宮商此今人失宋人之法律呂由是而亡凌氏乃以今人之法駁宋人尤不可不辨若夫古今樂聲高下則有隋志所載歷代律尺皆以晉前尺爲比而晉前尺則有王厚之鐘鼎款識傳刻尙存今依尺以製管隋以前樂律皆可考見宋史載王朴律準尺亦以晉前尺爲比又可以晉前尺求王朴樂求唐宋遼金元明樂高下異同史籍具在可排比句稽而盡得之至於晉泰始之笛可仿而造唐開元之譜可按而歌古器古音千載未泯又切韻考六卷外篇三卷謂孫叔然陸法言之學存於廣韻宜明其法而不惑於沙門之說又漢志水道圖說七卷謂地理之學當自水道始知漢水道則可考漢郡縣湘鄉曾國藩見聲律水道二書服其精博南海鄒伯奇亦謂所考切韻超越前人其於漢學宋學能會其通謂漢儒言義理無異於宋儒宋儒輕蔑漢儒者非也近儒尊漢儒而不講義理亦非也著漢儒通義七卷晚年尋求大義及經學源流正變得失所在而論贊之外及九流諸子兩漢以後學術爲東塾讀書記謂孝經爲道之根源六藝之總會謂論語爲五經之館鏄謂中庸肫肫其仁此語最善形容可據以增成朱注愛之理心之德之說愛



是肫懇心德亦是肫懇論語言仁者五十八章以愛與心德解之而稍覺未密合者以肫懇之意增成之則無不合謂孟子所謂性善者人人之性皆有善荀楊輩所未知程朱謂論性不論氣不備然孟子言性非不兼氣質性中有仁義禮智者乃所謂善本無不圓備之病其論治經之法謂說詩者解釋辨駁然不可無紬繹詞意之功謂讀禮者既明禮文尤明禮意而禮意則鄭注最精謂鄭氏諸經注有宗主復有不同中正無弊勝於許氏異義何氏墨守之學時惠棟張惠言孔廣森劉逢祿之書盛行於世澧謂虞氏易注多不可通所言卦象尤多纖巧惠棟易學有存古之功然當分別觀之又謂漢書儒林傳云費直以彖象系辭十篇文言解說上下經此千古治易之準的謂公羊以叔術爲賢者此公羊之謬不宜墨守謂何劭公注有穿鑿之病謂孔廣森通義序云春秋重義不重事以宋伯姬爲證然若公羊不詳記此事則伯姬死於火耳何以見其賢又謂三傳各有得失知三傳之病而後可以治春秋知杜何范注孔徐楊疏之病而後可以治三傳三傳注疏之病動關聖人之褒貶宜棄其所滯擇善而從其論漢以後諸儒謂魏晉以後天下大亂聖人之道不絕惟鄭學是賴謂國朝考據之學源出朱子不可反詆朱子

嘗曰吾之書但論學術非無意於天下事也以爲政治由於人才人才由於學術吾之意專明學術幸而傳於天下此其效在數十年後故於論語之四科學記之小成大成孟子之取狂狷惡鄉原言之尤詳則意之所在也其教人不自立說嘗取顧炎武論學之語而申之謂博學於文當先習一藝韓詩外傳曰好一則博多好則雜也非博也讀經史子集四部書皆學也而當以經爲主尤當以行己有恥爲主爲學海堂學長數十年至老主講菊坡精舍與諸生講論文藝勉以篤行立品成就甚衆邵陽魏源著海國圖志初成中有可議者澧論辨之後源至粵見而大悅遂與定交並改其書寶應劉寶楠著論語正義未成而卒命子恭冕成之並言當就正於澧恭冕後寄書至粵道意光緒七年粵督張樹聲巡撫裕寬以南海朱次琦與澧皆耆年碩德奏請褒異奉旨朱次琦陳澧均著加恩賞給五品卿銜八年卒年七十三卒後門人請於大吏祀其主菊坡精舍所著讀書記已成十五卷又稿本十卷遺命名曰東塾雜俎他著有說文聲表十七卷水經注提綱四十五卷水經注西南諸水考三卷三統術詳說三卷弧三角平視法一卷琴律譜一卷申范一卷摹印述一卷東塾集六卷子宗誼字孝通性孝友勤學尤好讀朱子書

著朱子語類日鈔一卷年二十一卒 侯康字君謨亦番禺人道光十五年舉人少孤事母孝家貧欲買書母稱貸得錢買十七史讀之卷帙皆敝遂通史學及長精研注疏湛深經術時人比之孔廣森汪中與同里陳澧交最久澧嚴事之在師友之間嘗謂漢志載春秋古經十二篇者左經也經十一卷者公穀經也今以三傳參校之大要古經爲優穀梁出最先其誤尙寡公羊出最晚其誤滋甚乃取其義意可尋者疏通證明之著春秋古經說二卷又治穀梁以證三禮以公羊雜出衆師時多偏駁排詆獨多著穀梁禮證未完帙僅成二卷又以左氏傳注近儒多尊賈服而排杜然杜固有勝賈服者欲著一書以持其平亦未成其餘羣經小學皆有論說多前人所未發又欲做裴松之注三國志例盡注隋以前諸史嘗曰注古史與近史異注近史者羣書大備注古史者遺籍罕存當日爲唾棄之餘今日皆見聞之助宜過而存之因爲後漢書補注續一卷三國志補注一卷後漢稱續者以有惠棟補注三國志杭世駿注未完善故不稱續也又以隋以前古書多亡著書者多湮沒不彰補撰後漢三國晉宋齊梁陳魏北齊周十書藝文志而自注之後漢三國成經史子三部各四卷餘未成又考漢魏六朝禮儀貫串三禮著書

數十篇澧嘗歎以爲精深浩博初擅詩名又愛南北朝諸史所載文章爲文輒效其體爲粵督阮元所賞體羸弱而讀書恆至夜深以此致疾十七年卒年四十四弟度侯度字子琴與康同榜舉人以大挑知縣分發廣西署河池州知州州居萬山中無城廣西賊起度伐木爲柵因山勢聯絡堅固可守又使民十家爲牌民有從賊者做趙廣漢法使良民告奸民十得六七旣而賊攻桂林巡撫復命度守城宿堞旁數月賊退以病告歸至家遂卒時咸豐五年年五十七度洽熟經傳尤長禮學時稱二侯嘉興錢儀吉嘗稱其研覈傳注剖析異同如辨懿伯惠伯之爲父子三老五更之爲一人證明鄭義皆有據依所著書爲夷寇所焚其說經文刻學海堂集中

### 鄒伯奇

鄒伯奇字特夫廣東南海人諸生少聰穎絕人於諸經義疏無不孳究覃思聲音文字度數之原尤精曆算能薈萃中西之說而貫通之嘗作春秋經傳日月考以時憲術上推二百四十二年朔閏及食限然後以經傳所書質其合否乃知有經誤傳誤術誤之分又謂向來注經者於算學不盡精通故解三禮制度多所疏失

因作深衣考以訂江永之謬作戈戟考以指程瑤田之疏以文選景福殿賦陽馬承阿證古宮室阿棟之制以體積論槩氏爲量以重心論懸磬之形皆繪圖注說援引詳確又以甄鸞五經算術疏略王伯厚六經天文篇亦無辨證因卽經義中有關天算或先儒所未發或闡發而未明者隨時錄出之成學計一得二卷時番禺陳澧遂於經學兼明曆算與伯奇最契伯奇語澧謂墨子書有算術且有西法發書讀之相對撫掌澧因欲告儀徵阮元以墨子補入疇人傳會元卒乃已又嘗謂澧大戴禮說明堂所謂二九四七五三六一八者此當有圖而記其數橫書之自左而右及圖亡字存後人縱寫之自右而左故錯亂如此且圖有赤點白點以記戶牖故曰赤綴戶也白綴牖也綴者點也澧聞爲之驚喜後以告鎮江柳興宗亦驚喜爲錄其說而去其論算術謂董方立而後諸家極思生巧出於前人之外如華嚴樓閣彈指卽見實抉竅奧然恐後之學者不循途轍遽趨捷法將久而忘其所自是亦可憂人服其所慮之遠其於天象著甲寅恆星表赤道星圖黃道星圖各一卷又謂繪地難於算天乃手摹皇輿全圖其格緯度無盈縮而經度漸狹相視皆爲半徑與餘弦之比例橫九輻縱十一輻合之則成地球滂沱四類之形



又變西人之舊作地球正背兩面全圖其正面以京師爲中背面之中卽爲京師對衝之處旁爲廿四向審中土與各國彼此之勢經緯俱以十度爲一格因推演其法著測量備要四卷進備物致用四目一丈量之器二測望之儀三檢數之書四畫圖之具又按度考數四目一明數二步量三測算四步圖測量製器本與西人重學光學化學相連伯奇冥搜古籍深明其理故測地繪圖尤多創解時修南海縣志圖爲伯奇手勑密合無憾南豐吳嘉善錢塘夏鸞翔遊粵聞其名與訂交甚篤鸞翔客死爲刻其遺書同治三年侍郎郭嵩燾特疏薦之兩奉優詔令督撫送咨伯奇澹於仕進堅以疾辭江督曾國藩欲於上海機器局旁設書院延伯奇教授屬學使劉熙載致書亦不就八年卒年五十一所著又有補小爾雅釋度量衡一卷格術補一卷對數尺記一卷乘方捷術三卷存稿一卷

### 華長卿

華長卿原名長懋字枚宗直隸天津人道光十一年舉人咸豐三年選開原訓導在任二十六年以病告歸奉天學政王家璧以勤學善教薦奉旨加國子監學正學錄銜光緒七年卒年七十七長卿幼有宿慧工詩與任邱邊浴禮寶坻高繼珩

稱畿南三才子夙講小學於許書研究有年嘗按其偏旁別爲編纂以譜六書之統系爲說文形聲表十五卷又按畫分部詳注音義及所從之字於下爲正字原七卷又著說文引經考一卷又取爾雅十九篇專論字義與形聲表互相發明爲說雅十九卷生平敦行勵學究心經史其治經有古本周易集注十二卷尙書補闕一卷毛詩識小錄四卷春秋三傳異同辨二卷論語類編一卷其於史以自晉迄隋南北擾攘閱時最久統緒易紊年歲易淆名位易舛因仿五代史十國年譜始晉惠甲子終隋開皇八年爲兩晉十七國南北朝年表三卷又以五代當黜朱梁而以後唐繼唐黜石晉而以南唐繼後唐因取綱目事實始唐天祐四年終宋開寶九年筆削增改爲唐宋陽秋五卷自序謂誅亂討逆褒忠貶姦正名分以植倫常辨是非以定功罪不以建都爲統緒而以族姓爲紹述竊比蜀漢繼東都之例官開原時府尹倭仁奇其才聘纂盛京通志踰年成志彙三十卷開原地處邊隅向學者少長卿劇以經史士風日起尤好甄拔寒峻士有一藝之長莫不容接每談經籍夜分不倦他著又有歷代宰相表五卷文廟從祀考二卷石鼓文存一卷漢碑所見錄三卷疑年錄小傳四卷畿輔人物表六卷方輿韻編二卷姓數四

卷泉譜二卷韻籟四卷詩文鈔三十二卷詞鈔二卷同時獻縣劉書年字仙石道光二十五年進士官編修邃於經學有貴陽說經殘藁一卷爲吳縣潘祖蔭所稱

柳興恩 許桂林 鍾文丞

柳興恩原名興宗字賓叔江蘇丹徒人道光十二年舉人貧而好學敦實行受業於儀徵阮元初治毛詩以毛公師荀卿荀卿師穀梁穀梁春秋千古絕學元刻皇清經解公羊左氏俱有專家而穀梁缺焉乃發憤沈思成穀梁春秋大義述三十卷以鄭六藝論云穀梁子善於經遂專從善經入手而善經則以屬辭比事爲據事與辭則以春秋日月等名例定之其自序曰烏乎穀梁之學之微也久矣乃今而知春秋託始於隱之旨獨在此矣何言之公羊予桓公以宜立穀梁罪桓以不宜立宜立則罪在桓不宜立則罪在隱傳曰先君之欲與桓非正也邪也探先君之邪志以與桓是則成父之惡也如傳意則隱在惠公爲賊子傳曰爲子受之父爲諸侯受之君廢天倫忘君父如傳意則隱於周室爲亂臣孟子曰孔子成春秋而亂臣賊子懼夫所謂賊者豈待劓之刃乃爲賊哉成父之惡卽賊子矣所謂亂者豈但犯上作逆乃爲亂哉廢倫忘君卽亂臣矣烏乎以輕千乘之國者而不能

逃亂賊之誅然則千秋萬世臣子之懼心必自隱公始矣況傳曰先君既勝其邪心以與隱是惠公未失正也明其不必託始於惠也傳曰讓桓不正見桓之弑逆隱實啟之也併明其無庸託始於桓也且惠反諸正以與隱隱乃不行卽位之禮以啟桓是隱之納於邪也然則隱之元年尤邪正絕續之交春秋之託始於此卽於不書公卽位見之孔子志在春秋故知我罪我之言亦出於不得已此春秋之微言亦卽春秋之大義也其書凡例謂聖經旣以春秋定名而無事尤必舉四時之首月後儒謂日月非經之大例未爲通論穀梁日月之例泥則難通比則易見與其議傳而轉謂經誤不若信經而併存傳說述日月例第一謂春秋治亂於已然禮乃防亂於未然穀梁親受子夏其中典禮尤與論語夏時周冕相表裏述禮例第二謂穀梁之經與左氏公羊異者以百數漢書儒林傳云穀梁魯學公羊乃齊學也此或由齊魯異讀音轉而字亦分述異文第三謂穀梁親受子夏故傳中用孔子孟子說其他暗合者更多述古訓第四謂自漢以來穀梁師授鮮有專家要不得擯諸師說之外述師說第五謂漢儒師說之可見者惟尹更始劉向二家然搜獲寥寥其說已亡而名僅存者自漢以後併治三傳者亦收錄焉述經師第

六謂穀梁久屬孤經茲於所見載籍之涉穀梁者循次摘錄附以論斷并著本經廢興源流述長編第七書甫成就正於元元惜其見之之晚番禺陳澧嘗爲穀梁箋及條例未成後見興恩書歎其精博遂定交焉并出其說備采不復作他著有周易卦氣輔四卷虞氏逸象考二卷尙書篇目考二卷毛詩注疏糾補三十卷續王應麟詩地理考二卷羣經異義四卷劉向年譜二卷儀禮釋宮考辨二卷史記漢書南齊書校勘記說文解字校勘記宿臺齋詩文集光緒六年卒年八十有六弟榮宗字翼南著有說文引經考異十六卷同時爲穀梁之學者有許桂林鍾文烝許桂林字同叔江蘇海州人嘉慶二十一年舉人少孤孝於母及生母無間言家貧不以厚幣易遠游體素弱不耐勞惟讀書始精神煥發故日以詁經爲事道光元年丁內艱以毀卒年四十三桂林於諸經皆有發明尤篤信穀梁之學著春秋穀梁傳時日月書法釋例四卷其書有引公羊互證者有駁公羊而專主者陽湖孫星衍嘗以條理精密論辨明允許之又著易確二十卷大旨以乾爲主謂全易皆乾所生博觀約取於易義實有發明別有毛詩後箋八卷春秋三傳地名考證六卷漢世別本禮記長義四卷大學中庸講義二卷四書因論二卷嘗以其



餘力治六書九數著許氏說音十二卷以配說文又著說文後解十卷又以岐伯言地大氣舉之氣外無殼其氣將散氣外有殼此殼何依思得一說以補所未及蓋天實一氣而其根在西北極是也北極不當爲天樞而當爲氣母因采集宣夜遺文以西法通之著宣西通三卷又以算家以簡爲貴乃取欽定數理精蘊撮其切於日用者著算牖四卷生平所著書四十餘種凡百數十卷儀徵阮元嘗手書談天祕傳宣夜學海深須到鬱洲句贈之甘泉羅士琳從之遊後以四算名世鍾文烝字殿才浙江嘉善人道光二十六年舉人文烝於學無所不通而其全力尤在春秋穀梁經傳補注一書嘗謂春秋一書非記人事乃記人心也凡人事皆人心之所爲也惟穀梁子獨得此意又謂穀梁解春秋似疏而密甚約而該經固難知傳亦難讀學者既潛心於茲又必熟精他經融貫二傳備悉周秦諸子及二千年說者之得失然後補苴張皇可無遺憾因沈潛反覆三十餘年成書二十四卷序曰魯之春秋魯所獨也孔子之春秋孔子所獨也故梁鄭正其名石鶚盡其辭正隱治桓皆卓然出於周初典策之上夫梁鄭舊文也而名有所必正則其加損舊文者可知矣石鶚微物也而辭必有所盡則大焉者可知矣正隱治桓揭

兩字於卷首則全書悉可知矣然而斯義也左氏公羊不能道獨穀梁子稱述而發明之實爲十一卷大指總要之處推之千八百事無所不通故穀梁傳者春秋之本義也其書網羅衆家折衷一是其未經人道者自比梅鸞之辨僞書陳第之談古韻略引其緒以待後賢文烝兼究宋元諸儒書書中若釋禘祫祖禴證法以及心志不通仁不勝道以道受命等皆能提要挈綱實事求是又著論語序說詳正一卷光緒三年卒年六十

朱右曾

朱右曾字尊魯江蘇嘉定人道光十八年進士改翰林院庶吉士散館授編修二十五年召對稱旨授徽州府知府丁憂服闋補鎮遠府調遵義府所治連蜀境伏莽甚衆桐梓民楊鳳倡亂右曾堅守五閱月以失守屬邑罷官遵義圍解奉旨開復署大定府卒右曾覃思著述精於訓詁輿地之學以逸周書孔晁注疏略乃集諸家之說正其訓詁詳其名物爲周書集訓校釋十卷不言逸周書亦不言汲冢書者復漢志之舊題也又著春秋左傳地理徵二十卷據杜氏地名譜而進退之定著國邑土地山川名一千二百八十一闕者二百二十六考其封域詳其并吞

而繫以漢及今之郡縣又輯服氏解誼三十卷兼取劉歆賈逵鄭衆之說又詩地理徵二卷長洲陳奐治毛詩於其精當處引用頗多

鄭珍 王崧

鄭珍字子尹貴州遵義人道光十七年舉人以大挑二等選荔波訓導咸豐五年叛苗犯荔波知縣蔣嘉穀病珍率兵拒戰卒完其城苗退告歸同治二年大學士祁篤藻薦於朝特旨以知縣分發江蘇補用卒不出三年卒年五十九珍初受知於歙縣程恩澤語之曰爲學不先識字何以讀三代秦漢之書乃益進求諸聲音文字之原與古宮室冠服之制方是時海內之士崇尚攷据珍師承其說實事求是立異不苟同洞知諸儒者之得失復從莫與儔游益得與聞鉅儒宗旨於經最深三禮墨守司農不敢苟有出入儀禮十七篇皆有發明半未脫稿所成儀禮私箋僅有士昏公食大夫喪服士喪四篇凡八卷而喪服一篇反覆尋繹用力尤深又以周禮攷工記輪輿鄭注精微自賈疏以來不得正解說者日益支蔓成輪輿私箋三卷尤長於說文之學所著說文逸字二卷附錄一卷說文新附考六卷皆見稱於時他著有鳧氏圖說深衣考汗簡箋正說隸等書又有巢經室詩鈔文

鈔明鹿忠節公無欲齋詩注而所撰遵義府志古今文獻蒐羅精密好古之士比之華陽國志珍嘗謂遵義漢牂柯也自郡人尹珍道真從許慎應奉受經書圖緯教授南域後無有以經術發聞者於是以道真自命而取以爲名故學成而哀然爲西南巨儒焉子知同能傳其學 王崧字樂山雲南浪穹人嘉慶四年進士山西武鄉縣知縣滇士最爲樸陋崧獨徧覽羣籍學問淹通儀徵阮元總督雲貴延崧主通志稱其地理封建諸篇能得魏收杜佑之遺法著有說緯六卷

劉寶楠 子恭冕 潘維城

劉寶楠字楚楨江蘇寶應人父履恂字迪九乾隆五十一年舉人國子監典簿著有秋槎雜記寶楠生五歲而孤母氏喬教育之始從從父台拱請業以學行聞鄉里爲諸生時與儀徵劉文淇齊名人稱揚州二劉道光二十年進士授直隸文安縣知縣文安地窪下隄堰不修遇伏秋水盛漲輒爲民害寶楠周履隄防詢知疾苦爰檢舊冊依例督旗屯及民同修而旗屯恆怙勢相觀望寶楠執法不阿功遂濟嘗夜冒雨至大城助修固獻等隄堵塞演馬莊隄工決口在縣三歲皆獲有秋再補元氏會歲旱縣西北境蝗表延二十餘里寶楠禱東郊蜡祠令邨保設廠購

捕蝗爭投坑井或抱禾死歲則大熟咸豐元年調三河值東省兵過境故事兵車皆出里下寶楠謂兵多差重非民所堪雇車應差給以民價民得不擾在官十六年衣冠樸素如諸生時勤於聽訟官文安日審結積案千四百餘事每雞初鳴燭入噉食少許輿坐堂皇隨鞠隨結毋許吏胥撓言凡涉親故族屬訟者諭以睦婣概令解釋訟獄既簡吏多去籍歸耕曹舍晝閉或賃與人爲書畫肆遠近翕然著循良稱咸豐五年卒年六十五寶楠於經初治毛氏詩鄭氏禮後與劉文淇及江都梅植之涇包慎言丹徒柳興恩句容陳立約各治一經寶楠發策得論語病皇邢疏蕪陋乃蒐輯漢儒舊說益以宋人長義及近世諸家仿焦循孟子正義例先爲長編次乃薈萃而折衷之著論語正義二十四卷其最有功經訓者如謂有子言禮之用章是發明中庸之說夫子五十知天命是知天生德於予之義告子游子夏問孝是言士之孝乘桴浮海是指今高麗地興於詩立於禮成於樂民可使由之不可使知之是夫子教門弟子之法文王既沒文不在茲乎是指所得之簡策言樊遲從游於舞雩之下問崇德修慝辨惑是魯行雩祭樊遲舉雩祭之詞以問朋友切切偲偲兄弟怡怡是言朋友責善兄弟不可責善謂伯魚爲周南召南



是謂伯魚受室後示以闔門之戒四海困窮是指洪水之災堯舉舜敷治之凡此皆先聖賢之旨沈羶二千餘載一旦始發其蘊至八佾鄉黨二篇所說禮制皆至詳確因官事繁未卒業命子恭冕續成之他著有釋穀四卷於豆麥麻三種多補正程氏九穀考之說漢石例六卷於碑志體例考證詳博寶應圖經六卷勝朝殉揚錄三卷文安隄工錄六卷所爲文淵雅翔實有韞山樓詩文集子恭冕 恭冕字叔俛光緒五年舉人守家學通經訓入安徽學使朱蘭幕爲校李貽德春秋賈服注輯述移補百數十事後主講湖北經心書院敦品飭行崇尚樸學幼習毛詩晚年治公羊春秋發明新周之義關何劭公之繆說同時通儒皆躋之卒年六十著有論語正義補何休論語註訓述廣經室文鈔 潘維城字閩如江蘇吳縣人從同里夏文燾游繼受業元和李銳爲錢大昕再傳弟子得聞經師緒論謂論語爲何晏所亂惟鄭康成兼通古今文集諸儒之大成迺蒐輯鄭注又采漢魏古義及近儒之說爲古注集箋十卷子錫爵卒其業

龍啟瑞 苗夔 龐大莖

龍啟瑞字翰臣廣西臨桂人父光甸字見田嘉慶二十四年舉人歷官黔陽武陵

知縣乍浦台州同知所至斷滯獄修文教摘姦發伏以廉幹稱著有宰黔防乍錄及詩文集道光二十九年卒年五十八啟瑞道光二十一年一甲一名進士授翰林院修撰二十三年充順天鄉試同考官二十四年充廣東鄉試副考官二十七年大考翰詹二等七名以侍講陞用七月提督湖北學政湖北人士知禮尙文啟瑞專以根柢之學振之著經籍舉要一書以示學者又以學政之職有三要一曰防弊二曰厲實學三曰正人心風俗故所作文檄告誡周詳既復舉舊日所聞及近所施行者爲視學須知一卷三十年丁父憂回籍咸豐元年六月廣西巡撫鄒鳴鶴奏辦團練以啟瑞總其事二年七月省城圍解以守城敍功得旨以侍講學士陞用並賞戴花翎五年回京六年四月擢通政司副使十一月提督江西學政七年三月授江西布政使時髮逆踞東南江西僅省會暨一府未沒於賊庫藏久虛啟瑞焦勞籌度饟糈賴以不竭會歲旱蝗齋心祈禱力求驅捕之法蝗患頓除嘗勸民積穀備荒復以暇修普濟育嬰諸善政惠心澤民都邑感慕八年九月卒於官同治十一年奉旨入祀江西名宦祠啟瑞少與其鄉呂璜朱琦王錫振爲古文步趨桐城已從上元梅曾亮遊文日益進後交漢陽劉傳瑩切劇經義尤講求

音韻之學貫穿於顧江苗段王孔張劉諸家之書而著古韻通說二十部其論古韻寬嚴得失曰論古韻者自顧氏以前失之疏自段氏以後過於密江氏酌中亦未爲盡善顧氏規模粗備其考據精確有不可磨滅者段氏分之脂支三部發前人所未發餘所分者求之古經率多可據雖分配入聲未極精審不免千慮之失然而分合周備條理井然可謂文而不煩博而知要者矣後之陽湖張氏高郵王氏曲阜孔氏歙江氏諸子之學博足以綜其蕃變精足以定其指歸皆由段氏精而求之以極於無可復加之地至張氏之分爲二十一部與高郵王氏略同其依據說文折衷經韻使人觀形可以得聲之誤復審音可以定形之譌而於通轉流變之間尤能言之盡意同時武進劉氏復有詩聲衍之作觀其序論及標目部分蓋亦竊取張氏之意而爲之者也其論入聲同部異韻及異部同用較諸家尤爲明備覺段氏之精於說文猶未見及張氏有言凡言古韻者分之不嫌密合之不嫌廣惟分之也密故其合之也脈絡分明不至因一字而疑各韻可通亦不至因各韻而疑一字之不可通故今之集古韻也意主於嚴而其爲通說也則較之顧氏而尙覺其寬其分也有所以可分之由其合也有所以得合之故皆爲剖而明

之不敢拘前人成說不敢執一己私見亦曰參之古書以求其是質之人心而得其安而已論本音曰許書實兼音形義三者爲訓諧聲一門幾居全書之八然比而論之無不與經訓符合未有母聲在此而子聲在彼者間有出入即可據爲古音通轉之證中有讀若讀同之例雖偶用方言俗字未必盡出古音然要取諸同部其轉入他部者亦必有說每文下所載古文或體亦然今於經韻後載說文諧聲諸字以見音隨字寓之原而於偏旁讀若小異者皆爲梳鬢而證明之其有古今音變難爲強說者仍從蓋闕論通韻曰二十部大旨貴於密而不貴於疏然證之於古或齟齬而不合則不得不爲之說以通其變然其所通者必有其所以可通之故而非若唐人之通韻僅取便於時俗而已論轉音曰轉音卽雙音之異名天地間自有不可磨滅者古經中用韻及字書偏旁有不合者苟求之於是無不可通必謂古一字祇有一音非確論也此條所以濟本音通韻之窮而讀古書及說文者愈釋然而無疑矣論通說曰學者從事於二十部之古韻則於其紛紜轉轄者有若涇渭之難淆燕越之各判矣然於此而與之道古或不免拘執而難通又將諱其所不合以爲安則又與於誣古欺人之甚故爲之說有十以通之大都

本通韻之文爲之根柢通韻祇通其數字通說則舉其一字蓋全書皆嚴其所以分之界而於此終著其所以合之由是古韻之學之大成也故以名其全書焉啟瑞又以爾雅一書學者多苦其難讀因采邵郝盧阮諸說於發疑正讀之交講明至是間復參以己見著爾雅經注集證三卷他著有小學高注補正是君是臣錄班書識小錄通鑑識小錄諸子精言莊子字詁及經德堂詩文集十二卷 苗夔字仙籠直隸肅寧人幼卽嗜六書形聲之學讀許氏說文若有夙悟已又得顧炎武音學五書慕之彌篤曰吾守此終身矣舉道光十一年優貢生高郵王念孫父子聞夔之說禮先於夔與暢論音學源流由是譽望日隆夔以爲許叔重遺書多有爲後人妄刪或附益者乃訂正說文凡六朝五代以來聲傳訛者八百餘字爲說文聲訂二卷顧氏音學所立古音表十卷宏綱已具然猶病其太密而戈麻旣雜西音不應別立一部於是併耕清青蒸登於東多併戈麻於支齊定以七部隲括羣經之韻字以聲從韻以部分爲說文聲讀表七卷宋濂篆韻集鈔謂說文建首五百四十字卽蒼頡讀六朝五代人無能得其句讀者皆以俗韻失之也夔以毛詩韻部定其音紐爲建首字讀一卷詩自毛傳鄭箋而後主義理者多主聲韻



者少雖有陸元朗詩經音義亦不能專主古音然古音時有未盡改者夔治毛詩尤精於諧聲之學嘗以齊魯韓三家證毛而又以說文之聲讀參錯其間采太平戚氏之漢學諧聲詩經正讀無錫安氏之均徵爲毛詩韻訂十卷書出識者歎其精審他著有說文聲讀考集韻經存韻補正經韻鈎沈四種咸豐七年五月卒年七十五生平苦思專一雖處困約有以自怡將歿戒其子葬衆書叢中子玉璞乃擇書之尤嗜者納棺中殉焉 龐大埜字子方江蘇常熟人嘉慶二十四年舉人究心音韻之學嘗謂顧江戴段孔王諸家分部互有出入者以入聲配隸無準耳入聲有正紐反紐今韻多從正紐古韻多從反紐故用王氏說別出緝盍十八部第一部歌戈麻分支齊佳第二部魚虞模分麻其入鐸陌昔分藥覺麥錫皆喉音第三部蒸登分耕第四部之哈分皆灰尤其入職德分屋麥第五部東冬鍾江第六部尤侯幽分虞蕭宵肴豪其入屋沃燭覺分錫第七部陽唐耕第八部蕭宵肴豪其入藥分鐸屋沃覺麥錫第九部耕清青分庚第十部支佳分齊其入麥錫分昔皆鼻音第十一部眞諄臻文殷魂痕先分刪山仙第十二部脂微齊皆灰分哈祭其入質術櫛物迄沒黠屑分牽薛第十三部元寒桓刪山仙分先第十四部祭

泰夫廢分霽怪其入月曷末牽薛分黠屑皆舌齒音第十五部侵覃添咸凡分鹽第十六部緝合帖洽乏分葉第十七部談鹽銜嚴第十八部盍葉狎業分帖皆屑音祭無平上聲緝盍無平上去聲陽類陰類各九部陽奇陰偶兩兩相配一從陸氏法言所定爲正紐一從顧江戴王氏所定爲反紐其轉音之法有五一正轉同部者是也一遞轉同音者是也一旁轉相比及相生者是也一雙聲同母者是也大塋又謂欲明古音必先究唐韻乃可定其分合因取徐鉉所引孫愐音切參以徐鍇之篆韻譜按部排纂爲唐韻輯略五卷備考一卷又以說文正字按部排纂以聲相統而別出其流變之字爲形聲輯略一卷備考一卷又以說文諧聲經典用韻合之唐韻按部排纂以紐相承而表出其分收之字別收之字爲古音輯略二卷備考一卷其論等韻則謂字母三十六爲天地自然之音不可增減不可移易取切韻指掌圖四聲等子切韻指南參互考訂合門法爲八分十六攝爲六十一圖以唐韻廣韻集韻五音集韻及玉篇玉海之字按紐排纂附注切音爲總圖以提其綱爲略例以舉其凡爲備考以覈其實又推之玉篇廣韻皇極經世之論音以暢其說又推之天竺西番藏經十二家之譯字以盡其變爲等韻輯略三卷

他著有易例輯略五卷子鍾璐官至刑部尙書

陳立

陳立字卓人江蘇句容人道光二十四年進士改翰林院庶吉士散館授刑部主事洊陞郎中記名御史授雲南曲靖府知府召對時顯皇帝有爲人清慎之褒時以道梗不克之任流轉東歸所至賓禮先後受事皆刑名至重立處以詳慎於喪服變除宗法淆異多能折衷協於禮律少讀書過目成誦隨父客揚州師江都梅植之受詩古文辭師江都凌曙儀徵劉文淇受公羊春秋許氏說文鄭氏禮而於公羊致力尤深文淇嘗謂漢儒之學經唐人作疏其義益晦徐彥之疏公羊空言無當近人如曲阜孔廣森武進劉逢祿謹守何休之說詳義例而略典禮訓詁立乃博稽載籍凡唐以前公羊古義及國朝諸儒說公羊者左右采獲擇精語詳草創三十年長編甫具南歸後乃整齊排比融會貫通成公羊義疏七十六卷初治公羊因及漢儒說經師法謂莫備於白虎通先爲疏證以條舉舊聞暢隱抉微爲主而不事辨駁成白虎通疏證十二卷幼受爾雅因取唐人五經正義中所引健爲舍人樊光劉歆孫炎李巡五家悉甄錄之謂郭注中精言妙諦大率胎此附以

郭音義及顧沈施謝諸家切釋成爾雅舊注二卷又以古韻之學蔽蝕已久而聲音之原起於文字說文諧聲卽韻母也因推廣歸安姚文田說文聲系之例刺取許書中諧聲之文部分而綴紘之以象形指事會意爲母以諧聲爲子其子之所諧又卽各綴於子下其分部則兼取顧汪戴孔王段劉諸家精研而審覈之訂爲二十部成說文諧聲孳生述三卷爲文淵雅典碩不尙空言大抵考訂服制典禮及聲音訓詁爲多有句溪雜著六卷生平甘淡泊恥干謁與人交懇款惻怛客揚州久師門誼最篤卒年六十一

### 桂文燦

桂文燦字子白廣東南海人道光二十九年舉人同治元年獻所著經學叢書諭曰桂文燦所呈諸書考證箋注均尙詳明羣經補正一編於近儒惠棟戴震段玉裁王念孫諸經說多所糾正蒼萃衆家確有依據具見潛心研究之功二年正月應詔陳言四十條若津貼京員製造輪船海運滇銅諸奏先後得旨允行光緒九年選湖北鄖縣知縣留江夏治獄每決一獄大吏未嘗不稱善十年海上事起長江戒嚴文燦建議宜增槍隊練軍法並在田家鎮多設守禦方略以防未然又以

邪說誣民宜正人心爲急務擬宣講聖諭章程及履任無幕客無家人事無大小皆躬親之未及期年以積勞卒於任粵東自阮元設學海堂經學日興人才彬彬輩出其後承學之士喜立門戶遵朱者與鄭違遵鄭者又與朱違文燦追述阮元遺言謂周公尙文範之以禮尼山論道教之以孝苟博文而不能約禮明辨而不能篤行非聖人之學也鄭君朱子皆大儒其行同其學亦同因著朱子述鄭錄二卷他著有易大義補一卷書古今文注二卷禹貢川澤考四卷毛詩傳假借攷一卷鄭讀考一卷釋地六卷詩箋禮注異攷一卷周禮通釋六卷今釋六卷春秋列國疆域攷一卷圖一卷箴膏肓起廢疾發墨守評各一卷四書集注箋四卷論語皇疏攷證十卷重輯江氏論語集解二卷孟子趙注考證一卷孝經集證四卷集解一卷羣經補證六卷經學輯要一卷經學博采錄十二卷羣經輿地表一卷說文部首句讀一卷子思子集解一卷弟子職解詁一卷周髀算經攷一卷廣東圖說九十二卷四海記一卷海國表一卷海防要覽二卷掌故紀聞二卷疑獄紀聞一卷牧令芻言二卷潛心堂文集十二卷



陳奐字碩甫江蘇長洲人諸生咸豐元年舉孝廉方正奐始從吳縣江沅治古學金壇段玉裁寓吳與沅祖聲善嘗曰我作六書音韻表惟江氏祖孫知之餘鮮有知者奐盡一晝夜探其梗概沅嘗假玉裁經韻樓集奐竊視之加朱墨後玉裁見之稱其學識出孔賈上由是奐遂受學玉裁刻說文解字注校訂之力奐居多游京師高郵王念孫暨子引之棲霞郝懿行績溪胡培翬涇胡承珙臨海金鶚咸與奐締交引之著經義述聞每一卷成必出相質承珙撰毛詩後箋自魯頌泮水以下奐爲補編郝氏爾雅義疏胡氏儀禮正義金氏求古錄皆爲校刊以行奐嘗言大毛公詁訓傳言簡意該漢儒不遵行錮蔽久矣遂殫精竭慮專攻毛傳以毛傳一切禮數名物自漢以來無人稱引韜晦不彰乃博徵古書發明其義大抵用西漢以前舊說而與東漢人說詩者不苟同又以毛氏之學源出荀子而善承毛氏者惟鄭仲師許叔重兩家故於周禮注說文解字多所取說著詩毛氏傳疏三十卷敘曰鄭康成初學韓詩後見毛詩義精好爲作箋亦復閒雜魯詩併參己意故作箋之旨實不盡同毛義近代說詩兼習毛鄭不分時代不尙專修不審鄭氏作箋之旨而又苦毛義之簡深猝不得其涯際漏辭偏解迄無鉅觀竊以毛詩多記

古文倍詳前典或引伸或假借或互訓或通釋或文生上下而無害或辭用順逆而不違要明乎世次得失之迹而吟詠情性有以合乎詩人之本志故讀詩不讀序無本之敎也讀詩與序而不讀傳失守之學也漢書藝文志毛詩二十九卷毛詩故訓傳三十卷古經傳本各自爲書自傳與箋合併而久失原書之舊今置箋而疏傳者宗毛詩義也是書剖析同異訂證闕訛有功毛氏不淺如葛覃傳父母在以下九字爲箋語竄入引泉水箋爲證與我行其野篇宣王之末以下十九字爲傳誤入箋者皆確不可易毛於言告言歸下旣云婦人謂嫁曰歸於此則第訓寧爲安蓋歸寧卽序之歸安父母謂已嫁而可以安其父母之心卽所謂無父母遺懼也潛夫論斷訟篇云不枉行以遺憂故美歸寧之志一許不改蓋所以長眞潔而寧父母也此正足以發明序傳之義又如以煩擱解生民之蹂黍里旅證公劉之廬旅皆確有依據而以爾雅之不適不蹟不徹爲一句以釋日月沔水十月之交三詩尤爲精絕又以疏中稱引博廣難明更舉條例立表示圖爲毛詩說一卷準以古音依四始爲毛詩音四卷做爾雅例編毛傳爲義類十九篇一卷以鄭多本三家詩與毛異爲鄭氏箋考徵一卷又有詩語助義三十卷公羊儀禮考徵

一卷師友淵源記一卷禘郊或問宋本集韻校勘記其論尙書大傳與毛傳同條共貫論春秋之學從公羊以知例治穀梁以明禮穀梁文句極簡必得治禮數十年而後可明其要義論釋名與毛傳說文多不合然可以討漢末說經家之沿流論丁度集韻云集韻總字具見類篇先以類篇校集韻再參之釋文說文玉篇廣韻博雅則校讐之功過半矣又云陸氏釋文宋本當於集韻求之今尙書釋文經開寶中陳諤等刪改之本集韻則未經刪改者也皆爲後學開塗徑於子書中尤好管子嘗命其弟子元和丁士涵爲管子案四卷家居授徒從游者數十人同郡管慶祺馬釗費寶鏗浙西戴望蔣仁榮其尤著也同治二年卒年七十有八金鶚字誠齋浙江臨海人優貢生博聞強識邃精三禮之學受知於山陽汪廷珍至京師居廷珍第中與廷珍析難辨論成禮說二卷陳奐往見之與語恨相見晚嘉慶二十四年卒於京邸所著求古錄一書取宮室衣服郊祀井田之類貫串漢唐諸儒之說條考而詳辨之發明三禮不拘墨守奐書稱其鎔鑄故訓眞爲一代大作手胡承珙毛詩後箋中亦往往引用其說鶚又嘗輯論語鄉黨注蓋正舊說頗得意解卒後橐全佚奐求得之蓋爲求古錄禮說十五卷鄉黨正義一卷後吳縣

潘祖蔭復得其遺著彙刊之爲禮說補遺二卷 管禮耕字申季江蘇元和人歲貢生父慶祺受業長洲陳奐嘗手校陸氏釋文禮耕守家學尤長詁訓馮桂芬爲說文段氏注攷證屬成十五卷禮耕雖博通載籍而細謹不輕著書嘗言唐以正義立學官漢魏六朝遺說積久半闕不完凡所攷見獨存釋文而今本躋剝非其舊思綜稽羣籍爲校證未及半而卒年四十著有操菽齋遺書四卷 陸元綸字績銘江蘇長洲人道光二十三年副貢生充八旗官學教習咸豐元年舉孝廉方正辭不受九年卒年五十九少穎敏從吳鍾駿游肆力於經學中年於三禮義疏用力最深自馬鄭賈孔而下及國朝江永戴震惠士奇惠棟段玉裁諸家說禮之書無不考核屢訪陳奐研究六書奇訓學術源流晚更究心宋五子書以爲立身事親之法於廿四史通鑑綱目及他叢書中嘉言懿行可師可法隨筆手鈔名曰宗輝錄林則徐撫吳時深賞之朱培嘗謂束修自勵研經好學若陸生者吳中碩士也所纂有三禮彙鈔說文小箋著有御珍駕齋集

黃式三子以周

黃式三字薇香浙江定海人歲貢生事親孝父興梧性端嚴先意承志恆得歡心

嘗赴鄉試母喪暴疾卒於家馳歸痛絕誓不再應鄉試父老且臥病數年衣食禮洗必躬親之比歿持喪以禮於學不立門戶博綜羣經治易言卦辭一意相承六十四卦爻辭同者亦一意相承又釋繫辭傳衰世之意謂伏羲氏衰而神農作易之興也其於中古乎中古謂神農也以此申鄭君神農重卦之義著易釋四卷治春秋作釋救執釋人釋名釋殺盜釋入釋以以訂杜預釋例之訛謂魯春秋一國之史不赴告不書孔子修之不得增史之所不書傳引列國史文之異者以備參攷疑以傳疑其事不可牽合爲一必牽合反害於經也著春秋釋二卷尤長三禮論禘郊宗廟謹守鄭學論封域井田兵賦學校明堂宗法諸制有大疑義必釐正之其復禮說崇禮說約禮說識者以爲不朽之作生平於經說不拘漢宋擇是而從恆恐私智穿鑿得罪聖經中夜自思怵然不寐嘗著論語後案二十卷謂鄭康成就魯論篇章攷之齊古爲之注當時貴之魏末何平叔之徒酷嗜莊老而作集解以行世晉宋齊梁媚佛成俗聖教不明其始以儒亂釋其終遂以釋亂儒皇疏黜鄭注而宗何有由來矣邢氏祇刪皇氏而就簡耳自朱子注既出六百餘年之儒說羣奉正宗後之人補輯鄭君之遺逸考校何氏之異同各明傳家卒未聞有



繼漢軼魏實能駕朱子上者則朱子之所得大且多也雖然漢魏諸說之醇有存於何氏之解皇邢之疏及陸氏釋文諸書而不可盡廢者諸經注疏與子史中雜引經文及諸說解有可拾遺而補闕者元明數百年遵朱子注有能發明之而糾正之者近日大儒實事求是各盡所長有考異文者精訓詁者辨聲類者稽制度名物者譔聖賢事蹟者有考驗身心辨析王霸學務見其大者有不惑於老釋復明析於儒之近老釋學務得其正者凡此古今儒說之薈萃苟有裨於經義雖異於鄭君朱子皆宜擇是而存因廣收衆說附以己意而爲是書吳縣吳鍾駿上元朱緒曾皆以爲漢宋持平之著可垂國胄他著有尙書啟蒙四卷詩叢說一卷詩序說通二卷詩傳箋考二卷周季編略九卷傲居集經說四卷史說四卷嘗作求是室記曰天假我一日卽讀一日之書以求其是作畏軒記曰讀經而不治心猶將百萬之兵而自亂之蓋自道云讀史喜文獻通考而時論定馬氏之闕失嘗應聘佐軍幕當路以外寇問作備外寇議問者色沮式三曰不從此言數年後必有大寇事果驗同治元年卒年七十四歲從子以恭子以周俱能傳其學江東稱經師者必曰黃氏以恭字質庭光緒元年舉人著有尙書啟蒙疏二十八卷讀詩管

見十二卷八年卒年五十四 以周字元同同治九年舉人由大挑教職歷署遂昌海鹽於潛訓導補分水訓導光緒十四年以學政瞿鴻禨保薦賜內閣中書銜十六年復以學政潘衍桐保薦奉旨陞用教授旋補處州府教授二十五年卒年七十二性孝友四歲喪母長而追思不已事繼母如所生少傳父式三學與從兄以恭作經課互相質督學吳存義試寧波以明堂考命題以周據隋宇文愷傳謂考工記夏后氏世室堂修二七二爲衍文存義深賞之嘗居浙城聞兵警以周獨研索經義積十晝夜而知孟子夏五十殷七十周百畝之異異在步尺非在井疆自謂足破二千年之疑難其堅銳如此初治易著十翼後錄治羣經著讀書小記而三禮尤爲宗主以爲三代下經學鄭君朱子爲最而漢學家破碎大道宋學家棄經臆說不合鄭朱何論孔孟因守顧炎武經學卽理學之訓以追討孔門之博文約禮其考帝王禮典務在求通以告後聖可行如後世不明報祀立廟之典說之曰劉歆云天子七廟七者其正法數可常數者也宗不在此數中宗變也苟有德則宗之不可預爲設數故周公爲無逸之戒舉殷三宗以勸成王劉氏此說甚明蓋殷三宗周成宣後世宗其德別立廟以報祭之凡報必有廟特不在宮寢左

與正廟並爾展禽言虞報幕夏報杼商報上甲微周報高圉太王竊謂三宗祖甲亦商之所報也姜嫫亞圉成王宣王亦周之所報也魯頌闕宮毛傳以爲先妣姜嫫之廟在周左傳敢忘高圉亞圉賈逵服虔以爲周人不毀其廟而報祭之王子朝之亂單子盟百官於平宮杜預以爲平王廟時尙在則成王宣王亦必有宮矣又如舊說誤指饋食爲時享禮說之曰周官大宗伯分肆獻裸饋食時享爲三等禮經特牲少牢皆以饋食名篇非時享矣士虞禮云孝子某哀薦禘事適爾皇祖某甫以濟祔爾孫某甫皇祖者太祖也故稱新死者爲爾孫適爾皇祖者謂之太祖廟而合祭之也故曰哀薦禘事其祔祭之禮亦明云如饋食則饋食合祭也明矣特牲禮筮日筮尸之命辭云適其皇祖文同士虞禮少牢禮云用薦歲事於皇祖歲事者禘事也以薦歲事於皇祖告卽特牲禮告以適爾皇祖之義則特牲少牢饋食爲薦禘事也明矣自注疏不以饋食爲祭名編禮家遂以此爲大夫士之時祭禮而天子時享據此爲例則天子饋食禮遂失而時享一日歷七廟反有日力不足之疑矣時享之禮殺於饋食鄭注以饋食當時享失之時享日享一廟而七廟之牲可同日視之祭後有繹爲饋食時享無繹又如詳考明堂封禪之制則

曰封禪古禮也自漢人侈其志後世莫敢舉明堂古制也自漢人侈其事後世莫敢行皆議禮者之失也詳考學校選舉之制則以古學校必升士而斥漢以後學校不升士之弊以古鄉舉里選在學校賢能皆有學之人而斥漢以後選舉不由學校之弊凡此類皆務告古禮可行初讀秦蕙田五禮通考病其古禮好難鄭軍禮太阿鄭因著禮說略後乃放戴君石渠奏議許君五經異義爲禮書通故一百卷凡敍目四十九閱十九年而後成書自敍稱高密箋詩而屢易毛傳注禮而屢異先鄭識已精通乎六藝學不專守於一家是書之作竊取茲意論者謂其博學詳說去非求是足以窺見先王制作之譚輿比秦蕙田書博雖不及精或過之又以經有訓詁所以明經而造乎道也乃仿儀徵阮元性命古訓廣爲二十四目著經訓比義三卷論者謂陳北溪字義墨守師說戴震孟子字義疏證專難宋儒是書詳引諸經各注異於陳戴之自立一職有益後學生平以明經傳道爲己任辨虛無辨絕欲而以執一端立宗旨爲賊道鎮海胡洪安悅象山之言與以周繼言義禮以周曰經外之學非所知也江蘇學政黃體芳聘主南菁講舍凡十五年又兼課寧波辨志精舍諸生經成就甚衆晚以子思承孔聖以啟孟子著子思子輯

解七卷舉子思所述夫子之教必始詩書而終禮樂及所明仁義爲利之說謂其爲傳授之大旨書成年六十九矣他著有軍禮司馬法攷徵二卷儆季雜著二十二卷黃帝內經九卷集注九卷

李善蘭

李善蘭字壬叔浙江海寧人諸生甫入學偶受教官訓言遂辭出終身不就試少從長洲陳奐受經通辭章訓詁之學而於算術好之獨深年十歲竊九章閱之以爲可不學而能後得測圓海鏡句股割圓記所造漸精因思割圓法非自然深思得其理嘗謂道有一貫藝亦有一貫測圓海鏡每題皆有法有草法者本題之法也草者用立天元一曲折以求本題之法乃造法之法法之源也算術大至躔離交食細至米鹽瑣屑其法至繁以立天元一演之莫不能得其法故立天元一者算學中之一貫也並時明算如錢塘戴煦南匯張文虎烏程徐有壬汪曰楨歸安張福僖皆友善時相問難咸豐初客上海識英吉利偉烈亞力艾約瑟韋廉臣三人偉烈亞力精天算通華言善蘭以歐几里幾何原本十三卷續增二卷共十五卷明時祇譯六卷因與偉烈亞力同譯後九卷西士精通幾何者眇各國俗本多



擧去七八九十四卷其第十卷闡理幽元非深思力索不能驟解故譌奪甚多善  
蘭筆受時輒以意匡補譯成偉烈亞力言西士他日欲得善本當反求諸中國也  
偉烈亞力又言美國羅密士爲天算名家取代數微分積分合爲一書分款設題  
較若列眉復與善蘭同譯之譯成名曰代微積拾級共十八卷代數變天元四元  
別爲新法微分積分二術又借徑於代數實中土未有之奇祕善蘭隨題剖析自  
言得力於海鏡爲多又與艾約瑟譯重學二十卷附曲綫說一卷又與偉烈亞力  
譯談天十八卷又譯物學八卷以粵匪陷吳越從曾國藩安慶軍中相依數歲同  
治七年巡撫郭嵩燾以通算薦徵入同文館充算學總教習總理衙門章京積官  
至戶部郎中晉三品卿銜善蘭課同文館生以海鏡而以代數演之合中西爲一  
法成就甚衆光緒十年卒於官年垂七十矣所著羣經算學考未成燬於兵有方  
圓闡幽一卷弧矢啟祕三卷對數探原二卷垛積比類四卷四元解二卷麟德解  
三卷橢圓正術解二卷新術一卷拾遺四卷火器真訣一卷對數尖錐變法釋一  
卷級數回求一卷天算或問一卷附考數根法一卷統名則古昔齋算學善蘭聰  
彊絕人蓋有天授其於算能執理之至簡馭數之至繁故衍之無不可通之數抉

之卽無不可窮之理所譯各書皆信筆直書了無疑義世謂梅文鼎悟借根之出天元善蘭能變四元而爲代數蓋梅氏以後一人云

李聯琇

李聯琇字秀瑩江西臨川人父宗瀚由編修官至工部侍郎聯琇少失怙恃奮然自勵於學道光二十五年成進士改翰林院庶吉士散館授編修咸豐二年大考第一擢侍講學士三年提督福建學政遷大理寺卿五年調江蘇學政與巡撫趙德轍會疏請以宋陸秀夫從祀孔子廟廷詔從之以病告歸同治四年主講江南鍾山書院院長舊多大師聯琇績學敦行別擇精審來學者日盛兵燹之餘士氣復振總督沈葆楨稱其與故院長錢大昕姚鼐諸人埒光緒四年卒年五十九院中人士祀之講堂聯琇爲學自天文輿地名物訓詁典章制度旁及瑣聞軼事鉤鈎解釋洞見癥結所爲書數十萬言皆實事求是又遇事敢言於江西團練舉在籍紳士熊守謙等八人西北捻匪萌芽疏請山東巡撫視賊聚散而痛懲之舉滕縣知縣黃良楷專任捕務後良楷卒殺賊捍患顯名當世性澹泊寓江蘇二十年屏絕榮利貴要不通一書大學士曾國藩與語云將疏薦之辭退語人曰吾官侍

從因病乞休若再用薦起負平生所學矣且薦剡而謀之其人私也吾不可使相國有私其介特如此有好雲樓初二集四十四卷

### 吳樹聲

吳樹聲字鼎堂雲南保山人道光二十四年舉人以知縣分發山東攝沂水縣事土匪竄擾鄰邑震動率鄉勇擊走之勸農桑備水旱著沂水桑麻話備蝗略等書爲民謀者甚至調署肥城時粵匪方熾東省戒嚴肥邑故係土城又多圯特改建石城工竣而賊自豐口渡河而北城固得無恐補東阿縣調署壽光縣大計舉卓異又調章邱同治十二年卒於任樹聲精小學用宋戴侗六書故之例變說文部居成六書微一百一十卷首列建首字次列建首字所生之字後列新沾建首字總以子母相生爲例次諧聲次會意而全書大指則首重字形而聲與義次之參互錯綜仍歸建首一義條理秩然古人制字源流藉此可見又以顧炎武併唐韻五支之半及九麻之半各字與七歌八戈韻字爲第六部其五支韻中字皆改爲歌戈一類議者或譏其武斷江永古韻標準以平聲支脂之微齊佳皆灰哈尤魂戈去聲未怪韻字爲第二部以歌戈麻支紙寘韻字爲第六部與顧氏書雖微有

出入而大旨則同段玉裁以之哈韻字合爲第一部而爲第一類以歌戈麻支字合爲第十七部脂微齊皆灰字合爲第十五部支佳字合爲第十六部而總爲第六類以爲周秦之韻與今韻異者古本音也於古本音齟齬不合者古合韻也在段氏自有心得惟以古人聲歌必有一定之韻如後世之一東二冬且必有一定可合之韻如後世之通某轉某者則殊不然古人聲歌無非天籟既曰天籟則必有古音既不能以後世之音概古人之音又豈能以古時一方之音概古時天下人之音乎古人音韻皆矢口而成並無部類亦無同通之可言也其與今韻異者皆古音也不必言協亦不必言合其古音與古音異者皆方音也孔子繫易鄒魯之音也與三百篇除魯頌外出入者甚多屈宋南音也與兩漢續騷用韻亦多出入竊疑古者無歌麻兩部唐韻之七歌八戈九麻皆起於西域九麻之半車家等字皆自魚虞模轉入七歌八戈與九麻之半麻加等字皆自支韻施爲等字轉入因檢古書中韻語有歌麻字爲韻者一一拈出知古人自有此一類音韻成歌麻古韻考四卷援據賅審發前人所未發又輯古語二字合音如終葵爲椎蒺藜爲茨邾婁爲鄒之類成合音輯略一卷又撰詩小學三十卷訓釋字義純用雙聲疊

韻求之有不得通者始參用旁通引申之義謂詩中有古字有訛字有假借字皆言乎其形也其聲與義則有合音有一字數義一義數用一經誤讀便成舛誼乃疏通證明或因聲而定義或以義而知聲知其爲古字而後不誤於後世字知其爲訛字而後可求其正字知其爲假借字而後不牽混於所借之字知其字之形而後可以定其聲與義知其字之聲與義而後益無誤於字之形推明古訓實事求事其書出段玉裁毛詩小學上又著論語尊經錄五卷不主一說專尋繹經文而得其義他著有孟子小學一卷兩漢書小學五卷經傳釋詞續五卷皆熟精故訓爲專門之學

### 劉庠

劉庠字慈民江西南豐人祖衡已入循吏傳庠幼從父讀書京師執經於湘鄉曾國藩之門國藩稱其博學不倦以咸豐元年順天鄉試舉人官內閣中書充國史館方略館校對後歸里值國藩駐師撫州遣使迎之屢欲登薦庠以養親辭及移師祁門復欲招佐軍幕爲緩師期二日仍以父病不就父歿不復仕國藩聘主徐州雲龍書院值髮逆初定士習荒陋庠以經學授諸生士氣始振旋又主海州敦



善書院清江浦崇實書院先後三十餘年教人以勤學篤行爲主嘗嫉今之學者稍有所知卽泰然自封或更務爲高遠以欺世而盜名故其說經典綜漢宋兩家融會而貫通之晚悔攷據之無益謂其競尙攻擊務求勝人多至無所忌憚每見後進必勸以讀有宋諸子江淮髦俊遊其門者成就甚多著有儉德堂易說說文蒙求說文諧聲譜唐藩鎮名氏年表後漢職官考後漢郡國職官表通鑑校勘記班許水道類記文選小學漢魏音補輯意林補讀史隨筆詩文集

朱一新

朱一新字鼎甫浙江義烏人同治九年舉人官內閣中書光緒二年進士改翰林院庶吉士散館授編修十一年充湖北鄉試副考官轉陝西監察御史十二年上遇災修省疏劾及內侍懿旨詰責降主事告歸二十年卒年四十九二十三年以學政憚彥彬奏奉旨賞加五品銜一新生而穎異四歲與羣兒戲慮有傾跌者輒趨掖之長嗜濂洛關閩之學務通經以致用學政徐樹銘亟賞之鄉試受知劉有銘李文田官翰林時與袁昶朱采黃國瑾相友善嘗偕諸友游西山遇雨感疾狂言所語皆民窮財盡不力求振作非祇外患必有內憂而尤以俄爲慮聞者咸慨

其忠義憤發法蘭西窺越南上疏請擊之嘗畫海防策謂宜分北洋爲一軍江浙爲一軍閩粵爲一軍治水師扼險要儲將才精器械興團練開餉源而歸本於求實是而勵人才時論壯之及遷臺諫數上封事侃侃直陳惟論是非不計利害歸後兩廣總督張之洞延主廣雅書院講席院中額取兩廣生監百名分齋肄業一新設院規先讀書而後考藝重實行而屏華士仿古顛蒙之學分經史理文四者延四分校主之諸生人賦以冊記質疑問難以次答焉成就甚衆因輯其講學之詞成無邪室答問五卷其論學術謂近世漢與宋分文與學分道與藝分豈知聖門設教但有本末先後之殊初無文行與學術治術之別又以道咸以來士夫好講西漢公羊之學流弊至於蔑古荒經因反覆論難以正其失謂公羊家多非常可怪之論西漢大師自有所受要非心知其意鮮不以爲悖理傷教故爲此學者稍不謹慎流弊滋多近儒惟陳立深明家法不過爲穿鑿餘多蔓衍支離不可究詰凡羣經略與公羊相類者無不旁通而曲暢之卽絕不相類者亦無不鍛鍊而傳合之憑臆妄造以誣聖人二千年來經學之厄蓋未有甚於此者至其論西學西教新疆鐵路吉林兵防等數十條尤爲學識通達論日本民情浮動而狡悍好

勝與西俗同故西人之親中國不如其親日第日之患俄則視中國尤甚俄既得庫頁島勾結蝦夷爲居高臨下之勢則日之陸路可危以海參崴爲泊舟之地直指長崎一帆可達則日之水路可危故俄之經營海參崴中國之憂亦日人之患也乃不思脣齒輔車之至計轉爲遠交近攻之狡謀螳螂捕蟬黃雀在後愚亦甚矣彼惟刻不忘俄故竭力要結西人欲爲連橫之計其變服色易徽號皆所以媚西人耳抑知天下惟壤地相接者利害相同日處東海不能爲歐洲輕重歐美諸國惟利是視若有事時欲如英法之救土耳其豈可得哉雖然當今時勢旣不能閉關自治則交鄰之道固不能不講求日之交鄰雖云下策差愈於無策耳時中日之釁未兆論者歎其見之遠又著有奏疏一卷詩古文詞雜著八卷京師坊巷志四卷漢書管見四卷德慶州志東三省內外蒙古地圖考證